

# *MULIMU UIPATA ILIYENA MWA BUNYINYANI, NI KUIPATULULA ILIYENA MWA MUKWA OSWANA*

 Ni itumezi, Muzwale Neville. Mulena aku fuyole. Ki kakusasana, balikani. Kaniti ni talima taba ye kuba iliñwi ya lika zende hahulu mwa bupilo bwaka, fa kuba mwa tabernakele hape kakusasana cwana, ku to bona muyaho wa yona omunde, ni mulao wa bana ba Mulimu babainzi mwa ndu ya Hae kacenu.

<sup>2</sup> Ne ni komokile hahulu hane Ni fitile kwanu maabani ni kubona mibonahalelo ya muyaho. Ne ni sa lolangi kuli ika bonahala cwana fateni ka nzila ye. Hane Ni boni mapampili ana lukisizwe a yona, fani hane ba swanisize mubonahalelo wa yona, Ne ni boni fela sibaka nyana sesiñwi sene sili kwatuko, kono cwale Ni fumana kuli ki—ki sibaka se sinde. Mi luitumela ku Yamata kaufela ka sibaka sesinde se. Mi luna fa . . .

<sup>3</sup> Ni mi tiseza, kakusasana cwana, litumeliso zezwa ku musala ka ni banake, baba tabela kuba kwanu ka nako ya sebelezo ya kuneela yee, ni lisunda ze za kuipa ku Kreste. Kono banana bona bainzi kwa sikolo, mi ku tata nyana ku ba siya. Mi se ba katezi luli ka za kutonda ndu ya bona, kono luna haluna kukatala kuutwa maikuto a mina sicaba. Zeo hamutokwi ku katala ka zona. Kuna ni balikani baba cwalo. Mi Na—Na itumela kwa balikani, kai ni kai, kono kuna ni sesiñwi ka za balikani ba kale. Hakuna taba kamba mukaba ni balikani babanca, niteni ha ki bani ba kale shaa.

<sup>4</sup> Hakuna taba kamba Ni yambaela kai, sibaka se sikana sibanga se si kateleha. Kakuli, mwendi seli lilimo ze mashumi amalalu kwa mulaho, neli mwa simbotela sa sileze fela, Ne ni neezi sibaka se ku Jesu Kreste inge kusina sika kono neli fela si—si sileze mwa simbotela. Se neli simbotela fela. Ki kabakaleo mukwakwa ha u inezi neku la kwa kamba—. . . neku lani, mu—mu mukwakwa nona ni kupotoloha, ili kusaba simbotela sene sili fa. Mi mwahali mo, nekubanga mililima, mililima ya mwa simbotela ne imela mwateni.

<sup>5</sup> Mi haili—haili mulilima ki palisa ye ipitezi luli. Ni ha ipepelwa mwa sileze, ina ni kutundana inze ikasha nzila ya yona mwa sileze, mi kipeto ni kutaha mwa mezi ni mwa lizupa, kuli ukone kutaha fahalimu, kuto bonisa bunde.

<sup>6</sup> Mi Ni—Ni sepa kuli, kakusasana cwana, kuli zeo kona ze ezahalile ona mo. Kuli, kuzwelela nako yani, mulilima nyana wa mwa simbotela u ikatalize luli; mi cwale hautilo fita fahalimwa mezi, ubonahalize mafufa a ona kwande, mitai ya ona yenyinyani iotolohile, mi u bonahalize Mulilima wa mwa Mukulo. Mi cwale a ube oyemi fa nako yetelele cwalo! Mi haibe ndu ye neezwi ka kutala ku Mulimu!

<sup>7</sup> Haili tabernakele yona ne ineezwi ka 1933. Kono ka kunahana, kakusasana cwana, ikona kuba—kuba nto yende kwa sebelezo fela ye—ye yelikani ya kuneela hape, mi sihulu kwa sicaba ili bao, ka lilato la bona ni kuikataza ku Kreste, ya ezize lika ze ku konahala. Mi Ni bata kuitumela ku mañi ni mañi wa mina ka linubu za mina, ni zeñwi cwalo, ze mubeile kwa kuneela keleke ye ku Kreste.

<sup>8</sup> Mi Ni ya itumezi hahulu, mane ni lumba ni kopano, ka kubulela manzwi kuyemela kwateni mizwale ya luna yeminde mo mwa keleke, baba beile bupilo bwa bona ku se. Muzwale Banks Wood, muzwale wa luna yaishuwile; Muzwale Roy Roberson, muzwale wa luna yaishuwile; mane ni babañata babañwi bao, kusina buitati mi ki ka pilu iliñwi, ba beile likweli kweli mwa kuyaha sibaka se ka mo siinezi, ne ba pila kwanu kubona kuli sa yahiwa hande.

<sup>9</sup> Mi ha Ni kena, ku to bona katala ka, mukwa o Ni bile ni tabela kuba cwalo, bupilo bwaka kaufela! Ni... Muzwale Wood na ziba ze ne Ni tabela. Na si ka bulela kuli na ka iyaha, kono uiyahile ona cwalo.

<sup>10</sup> Mi Ni lemuhile muyaho hamoho cwalo ni muyahelo, luli ki, oh, ki o ipitezi. Mi cwale hakuna manzwi a kutilusa mo ni ikutwela. Hakuna mukwa fela wa kueza cwalo ka ona, mwabona. Mi, kono, Mulimu wa utwisisa. Mi cwale mañi ni mañi wa mina mu kutisezwe limpo za mina ni kaufela ze muezize fa kueza sibaka se ka mo siinezi, mwa mukwa wa kuyaha, ndu ya Mulena. Mi cwale Ni—Ni bata kubulela manzwi aa. Cwale, muyaho, ka bunde sina mo uinezi cwana, mwahali ni kwande...

<sup>11</sup> Muzwale waka mulamu, Junior Weber, nana ni balubi ba sileze bona bafolomi. Ha ni boni kuli kuna ni mukwa usili hape mo ne uka bela omunde kufita seo uli sona, ki musebezi opetehile.

<sup>12</sup> Muzwale yomuñwi yaliteni mo, Nali kuba ni kopane ni muuna wateni, u beile mwateni ze zamaisa manzwi. Kono ka kulemuha kuli nihaiba mwa muyaho o likanelela siyemo sa situwa cwana, Ni kona fela... Hakuna kulyangana kwa manzwi mwahala mihala ya ona. Iinzi mwa situwa moo, ka linzila ze shutana shutana. Hakuna taba kamba Ni yemi kai, kinto yeswana fela, mwabona. Mi sibaka sifi ni sifi si—si tamilwe, kuli libyana za manzwi lifumaneha ku zona, mi mwakona ku lieza ka nzila kaufela ye mubata ku li utwa ka yona. Ki, Ni lumela kuli

neli lizoho la Mulimu Yamata kaufela ya na ezize lika ze. Cwale haiba . . .

<sup>13</sup> Mulena luna ulufile muyaho o lu lukela ku Mu lapela ku ona, mwendi okona kunga, lilimo ze mashumi amalalu. Ne lukalile ka kulilafafasi ka mubu, ni bupi bwa kota, ni kuinanga fa limbaula za kale ze shwile. Mi muyahi, Muzwale Wood, alimuñwi wa bona, ni Muzwale Roberson, na ni bulelela kuli kone kuna ni mubu wa kulila wani, mane ni limbaula za kale ze ne luinanga fateni zani ni myambeso yene shela kafa ni kafa, ne itukile mi ya ca, mwendi ka liñokolwa zepeli kamba zetalu. Kiñi hane isika tuka lotee, ki Mulimu kiyena ya na i bulukile. Mi cwale kasamulaho wa kutuka cwalo, hamoho cwalo ni bukiti bwa tabernakele bunze bu yendamezi fateni, libaka hane isika wa, neli fela lizoho la Mulimu. Cwale mwa mubu kuna ni lisipi mi ikatezwi mwa mubu, iyahilwe ka kutiya.

<sup>14</sup> Cwale Ni sepa kuli ki musebezi wa luna ku lukisa mwahali, ka sishemo sa Mulimu, kuli lube baba itumela hahulu ku Mulimu kuli zaluna . . . Wo haina kuba fela muyaho omunde o luka tahanga ku ona, kono ibe kuli mañi ni mañi ya kena abone mukwa o munde wa Jesu Kreste ku mutu kaufela ya taha kwanu. Mi hasibe sibaka se si kateleha ku Mulena luna, ni sibaka se si ipeile se si kateleha. Kakuli, hakuna taba kamba muyaho ki omunde cwani, zeo awa luli lwa itumela, bunde bwa keleke ki mukwa wa sicaba. Ni sepa kuli ikana iba ndu ya Mulimu kamita, ya bunde.

<sup>15</sup> Cwale, mwa sebelezo ya kuneela kwa licwe la makalelo mwa lilulu hane libeilwe, pono yetuna ya taha. Mi ne iñozwi fa licwe la mwa lilulu lani, kakusasana ha Ni ineela.

<sup>16</sup> Mi hakulata mu bilaezi, fa mizuzu nyana ye fitile, hane Ni sweli kutaha cwalo. Musebezi waka wapili, sina ha Ni taha mwa keleke yenca, Ne ni nyalisize mucaha ni musizana inge luyemi mwa ofisi. Haibe mutala, kuli Ni be mukutazi ku Kreste, kuli ni lukise Munyaliwa kwa mukiti wa Lizazi lani.

<sup>17</sup> Mi cwale halu ezeni sina mo ne luezeza kwa makalelo. Hane lu kalile kwa kuneela keleke lapili, Nenili fela mucaha mi, mawi, mwendi lilimo ze twenti wani, twenti tu za kupepwa hane lutomile licwe la mwa lilulu. Mane ne Ni si ka nyala kale. Mi Ne ni bata kubona sibaka ha si ka ba mwa mulao hande, ku Mulimu . . . ku Mulimu kwa kulapelela, mwabona, ni sicaba sa Hae. Mi lukona fela kueza cwalo, ha ki ka muyaho, kono ki ka bupilo bo bu kenile kona nzila fela inosi yelukona kueza zeo ka yona.

<sup>18</sup> Mi cwale, lusika neela kale, lube ni tapelo ya kuneela, lubale Mañolo nyana, ni kuneela keleke ku Mulimu hape. Mi cwale Nina ni zeñwi . . . Nina ni Liñusa fa bulumiwa, kakusasana cwana, la kuyaha fa Liñusa laka le li ka tatama.

<sup>19</sup> Mi, busihu bo, Ni bata kunga kauhanyo ya 5 mwa Sinulo, yesweli kuzamaelela hande, kuzwa mwa—kuzwa mwa likeleke zesupa, kuya kwa Maswayo Asupa. Kuli Ni... Mi luka ba ni...

<sup>20</sup> La Mubulo busihu ikaba mupahami wa pelesa yesweu. La Bubeli busihu... Ki mupahami wa pelesa yensu, mane ni kushetumuka cwalo, bapahami babane ba lipelosa. Mi cwale ni Liswayo la Busilezi ha li kwaluha.

<sup>21</sup> Mi kipeto la Sunda kakusasana, la Sunda yetatama kakusasana, haiba Mulena alata... Luka bona kasamulaho, luka zibahaza kasamulaho. Mwendi, ka la Sunda yetatama kakusasana, lukaba ni mukopano wa litapelo wa bakuli mwa muyaho mo.

<sup>22</sup> Mi cwale la Sunda busihu, luka kwala ni... Mi Mulena alutuse kuli lu kwalule Liswayo la Busupa, kokuna ni fela timana ye kuswani. Mi I bulela cwana, “Nekuna ni kukuza mwa Lihalimu ka nako yelikana licika la hola,” ka kukuza kwani.

<sup>23</sup> Cwale, Hani zibi kuli Maswayo a atalusa sikamañi. Nina ni kwa mafelelezo a minahano yaka, ku ona, mane mwendi inge babañwi ba mina mo mubezi kakusasana cwana. Luna ni mihipulo ya bulapeli ye tahisizwe ki mutu, kono yeo haina nihaiba ku ngunyuta ku Ona. Mi haiba mu bona, Ana ni kutaha ka susumezo. Ilukela kuba Mulimu, Kasibili, ki yena Anosi fela Yakona kueza zeo, yena Ngunnyana.

Mi busihu bwa kacenu ki yona Buka ya Piliso yani.

<sup>24</sup> Cwale, ku ze, libaka le Ni sa zibahalezi mikopano ya litapelo za bakuli, kamba zeñwi cwalo, kakuli fo kikuli Na... Ni pila ni balikani, mi Ni fa muzuzu ufi kaufela wa nako yaka kwa kubala ni kulapela. Mi mwa ziba pono yene Ni bile ni yona ni si ka funduka kale kuliba kwa wiko, ka Mangeloi a supa ani anatile inza fufa. Kacwalo, muka utwisia zeo kasamulaho nyana.

<sup>25</sup> Kacwalo cwale, cwale, mwa muyaho cwana, Ni sepa kuli lu lukela kuba, mwahali mo, haiba u neezwi, kamba uka neelwa mwa mizuzu yelikani, kwa milapelo ya Mulimu, lu lukela ku ubeya ona cwalo. Halu lukeli kuleka kamba kulekisa mwa muyaho mo. Halu lukeli kueza litekisano za mukwa ufi kaufela mwa muyaho mo. Ha li lukeli kuezahala mwahali mo, fo kikuli, inge za ku lumeleza bakutazi kutaha ni kulekisa libuka ni lika zeñwi. Hakuna taba kamba ki sikamañi, kuna ni libaka zeñwi mwa kuezeza zeo. Kakuli, ha—ha lu swaneli kuleka ni kulekisa mwa ndu ya Mulena luna. Si lukela kuba sibaka sa—sa kulapelela; se si kenile, se si kateleha kuba sa musebezi ona woo. Mwabona? Cwale, U lufile sibaka sesinde. Ha lu si beyeni ku Yena, mi luife ili luna, ni sona, ku Yena.

<sup>26</sup> Mi cwale se sikona kubonahala inge kashwau nyana, kono, ha ki sibaka kwa ku to potelana. Ki sibaka sa kulapelela. Mane ha lu lukeli nihaiba kushobota linzwi mwahali mo, kwanda milapelo kihona, ku mutu ni mutu, konji haiba luli ki lingambolo

ze swanelia. Mwabona? Halu lukeli ku kibakiba mwahali. Halu lukeli kumata mwa muyaho mo, kamba kutuhelela bana ba luna inge ba mata mata mwa muyaho. Mi ka kueza cwalo, ne nina ni maikuto ha ki kale hahulu, kulika kueza se, ne lu uyahile ili kuli lukone ku ubabalela ni zaona kaufela. Cwale, luna ni sipula se kwanu. Luli, buñata bwa sicaba ki baenyi. Balikani ba tabernakele ye baziba cwalo, kuli muyaho uka neelwa kuba mwa sebelezo ya Yamata kaufela. Kabakaleo, lunze luipa ili luna, ha lu hupuleni, ha lu kena mwahali, luine ka kukuza, ku mañi ni mañi, mi lulapele Mulimu.

<sup>27</sup> Haiba lubata ku potelana, kuna ni libaka ko lukona ku yo potelana teñi cwalo. Kono, kutokwe, ni ya zamaya zamaya mwahali, kuli mane mupalelwa kuutwa minahano ya mina, mi kutaha batu babañwi mane ha ba zibi ni sa kueza, mwabona, ki lilata fela ni lika zeñwi. Zeo ki za butu fela, mi Ni liboni mwa likeleke kufitela li ni utwisa hahulu bumaswe. Kakuli, ha lu tahangi mwa ndu ya Mulena ku to bonana. Lu taha kwanu ku to lapela Mulimu, kutuha fo lukutela kwa malapa a luna. Ndu ye ibeezwi kuba ya litapelo. Mi... Muyeme fande, mubulele kaufela ze mubata, haibile fela ki ze swanelia mi ze kenile. Muye kwa malapa a mañi ni mañi. Mu potelane mwa libaka zeo. Kono ha mukena mwa munyako wani, mu kuze.

<sup>28</sup> Mutaha kwanu ku to ambola ni Yena, mwabona, mi ni Yena abulele hape ku mina. Butata bwateni ki kuli, luna lu bulelanga hahulu zeñata, kono haluna nako ya kuteeleza. Konakuli, halu kena mwahali mo, luswanelia kulibeleta ku Yena.

<sup>29</sup> Cwale, mwa tabernakele ya kale, hakulata hakuna mutu yaliteni mwateni ka nako ya kakusasana cwana yana liteni ka zazi la kuneela lani, fani Major Ulrich hana liza lipina. Mi Ne ni yemi kwa mulaho wa lifapahano zetalu kwanu, kuli ni to neela sibaka. Hani koni ku lumeleza mutu ufi kaufela... Balibeleli ne ba yemi fa munyako, kubona kuli hakuna mutu ya bulela bulela. Mi, hamuse mufelize lingambolo za mina fande. Mwa kena mwahali. Haiba mubata kukena, ka kukuza, mutaha kwa patafafasi mi mwa lapela ka kukuza. Mwa yema ni kukuta kwa sipula sa mina, mwa apula Bibebe. Za eza yali mabapa ni mina, ki za hae zeo. Hamuna sa kubulela mina. Haiba mubata kubulela ni yena, muli, "Ni ka mubona fande. Ni tile mo ku to lapela Mulena." Mwabala Linzwi la Hae, kamba muina ka kukuza.

<sup>30</sup> Mi, he, haili lipina. Kezeli Gertie, Hani zibi kuli uteni mo kakusasana cwana, kamba nee, Kezeli Gibbs. Piano ya kale, Na lumela, nainelanga kwa mulaho mwa lilulu le, kuya ka mo ni hupulela. Mi u lukela kuliza hande ka bunolo nolo, "Fa sifapahano fana shwezi Mupulusi waka," pina yeñwi yemunati, lipina zende, mi—mi, kipeto, konji haikwana nako ya sebelezo. Mi kipeto muopelisi wa lipina wa yema ni ku etelela mwa lipina nyana za kopano. Mi haiba una ni lipina zeñwi za baba tabelia kuikopelela, kipeto ba opela. Kono, hakuna mukwa wa busuleni

ka kueza lika. Mi kipeto minembo izwelapili kulila cwalo. Mi cwale ha Ni utwa zeo, Ni ziba kuli seli nako yaka ya kutaha.

<sup>31</sup> Mi mukutazi ha kena mwa kopano ya sicaba se si sweli kulapela, ni tozo ya Moya, mu lukela kuutwa ku zwa kwa Halimu. Zeo fela kona ze tokwahala. Hakuna mukwa wa kuinela kwahule ni zona. Kono haiba mukenela kutisa lifapahano, konakuli mwa—mwa...mu—mu lyangani hahulu, mi kipeto Moya wa filikana; mi halu lati zeo, batili. Lu bata kutaha kwanu ku to lapela. Luna ni malapa amande, zeo Ni ka bulela ka zona, ka muzuzu nyana, ni zeñwi cwalo; kwa malapa, ko lu potelana ni balikani ba luna ni kubaisa teñi. Ye ki ndu ya Mulena.

<sup>32</sup> Cwale, kuna ni bana babanyinyani, cwale, limbututu zenyinyani. Cwale, bona haba zibi shutano. Bona, mukwa fela obakona kuba ni se ba bata, ki ku si lilela. Mi fokuñwi ikona kuba mezi a kunwa, mi fokuñwi batokwa tuso. Ni luna lu cwalo, kono ka sishemo sa Mulimu, ne lu lukisize sibaka. Ne si bizwa kuli, fa mukoloko wa lika neli kuli, sibaka “sa kulila,” kono si kwa pata kuna. Sona, ka manzwi amañwi, ko bahame bakona kuisa limbututu za bona.

<sup>33</sup> Cwale, ha ki mizwale, mwendi, na kwanu kwa kata. Mwendi mane Hanina ku li lemuha, ka kuba ya tozizwe. Kono kuna ni batu babañwi babali bukaufi, mi za ba bilaeza, mwabona, mi ba taha kwanu ku to teeleza sebelezo. Konakuli ni bahame ba cwalo...Mbututu wa mina hakala kukataza; hamukoni ku mutuhelisa zeo. Kiñi, luli, ki...Mwa swanelia, mulukela kutaha ni yena. Me wa niti luli uka lata kulwala mbututu wa hae kwa keleke, mi yeo kona nto yeba lukela kueza.

<sup>34</sup> Mi luna ni lilulu kwani ko mukona kubona sibaka kaufela sa muyaho, muyaho kaufela ona; ni sipangaliko sa manzwi mwateni, ko mukona kusikulula muhuwelo wa manzwi mo mu batela; ni—ni kambuzi nyana kwa mafelelezo, ni sikotolo sa mezi, ni lika kaufela ona cwalo fela zetusa me zakona kuitusisa. Ni lipula ni lika zeñwi, mwakona kuina; sibaka sa kucinceza mbututu wa mina, haiba utokwa ku cinciwaa, ni lika zeñwi za kuina mwani. Kaufela li lukisizwe.

<sup>35</sup> Mi cwale, linako zeñata, bana babanca linako zeñwi ni babahulu, bakaba ni ku...Mwa ziba, babanca bakona kuñolelana tupepa, kamba za kupazula pazula, kamba nto yeñwi, mwa keleke. Cwale, mina muhulile mi mwa ziba za kueza kufita zeo. Mwabona? Mulukela kuziba zeñata kufita zeo. Mwabona? Hamu lukeli kutaha kwanu...Haiba mu libelela kuba muuna sakata zazi leliñwi, ni kuhuliseza lubasi kwa Mubuso wa Mulimu, kona kuli mukalise zeo isali kwa makalelo, mwa bona, mi—mi mueze hande ni ka swanelo, mi cwale, eni sha.

<sup>36</sup> Cwale, balibeleti ba fa munyako ba yemanga mwa malulu a muyaho, ni zeñwi cwalo. Mi haiba kuba ni kutaza lilata, bona ba—bona ba ketilwe, ka kuba musebezi wa bona, mi basepahali

bainelanga kwanu kwa pata, kuli mwa taba ya mutu yakona kuba ya sa utwi, ba filwe tumo ya kukupa mutu yani kuli akuze.

<sup>37</sup> Mi, haiba hana likute, ne kukaba hande kuli mutu yomuñwi abe ni sipula, kakuli kuna ni mutu ya bata kuteeleza. Kuna ni mutu ya tezi libaka leo, ku to teeleza. Mi seo kona se lubези mo, ili ku to utwa Linzwi la Mulena. Mi kacwalo mañi ni mañi utabela ku Li utwa, mi ba lukela kuba baba kuzize ka mo ba lukela kubela. Ka kukuza fela mo bakona kubela; seo kikuli, isiñi lwangasi lwa kutoliya ni kukiba kiba.

<sup>38</sup> Kakuli, ku mutu ya lapela Mulena, zeo za tokwahala. Cwalo kona mo li lukela kubela. Zeo kona ze mutezi kwanu, ki ku to lapela Mulena. Inge fea haiba muikutwa kuli mulumbeki Mulimu, kamba kuhuwa, muzwelepili fela, mwabona, kakuli zeo kona ze mubezi mo, mwabona, kono, ki kulapela Mulena ka nzila ya mina ya kulapela. Kono hakuna mutu ya lapela Mulena hamusweli kubulela bulela ni kutambekana tupepa, mi mutusa yomuñwi kuli azwe mwa milapelo ya Mulena, mwabona, kacwalo luikutwa kuli zeo likona kuba bumaswe. Mi lubata kueza zeo kuba mulao o busa mwa keleke ya luna, kuli mwa kopano ya luna, kuli, kwa muyaho wo, keleke ye ika neelwa kwa Mubuso wa Mulimu ni kwa kukutaza kwa Linzwi. Kulapela! Kulumbeka! Leo kona libaka le mu lukela kutela kwanu, ku lapela, kanti.

<sup>39</sup> Mi cwale nto yeñwi, mi sebelezo haifela, hañata batu mwa likeleke... Hani—Hani sepi kuli liteni mwahali mo, kakuli... Na kamita nibanga kusili, mwabona, kakuli Ni banga kwahule.

<sup>40</sup> Hañata, nihaba mwa kukutaza lisebelezo zeñwi, tozo ya tahanga, ni lipono za ezahalanga. Mi Na katalanga, mi kipeto Ni kena mwa sibaka. Mi mwendi Billy, kamba alimuñwi wa baana kwani, ba ni isa kwa lapa, mi ba ni tuhela kuli ni pumule hanyinyani, kufitela Ni katuluha, kakuli ki lika ze katalisa maswe maswe luli.

<sup>41</sup> Mi hape Ni boni likeleke, niteñi, ko banana ba lumelezwa ku kiba kiba mwa muyaho, mi—mi ni babahulu bali kuyema inge ba bulela ka kangauka mwahali mo, ku yomuñwi ni yomuñwi. Yeo kwateni ki nzila yende luli kwa kusinya sebelezo yekona kutaha busihu bwatene, kamba ikona kuba nako mañi kaufela. Mwabona?

<sup>42</sup> Mi sebelezo isa lukululwa fela, luzwa mwa muyaho. Mu felize, za milapelo cwale. Fohe kipeto muzwele fande mu yo ikambota ni mañi ni mañi, ni kaufela ze mubata kueza. Haiba muna ni ze mubata kuambola ni mutu, muyo—muyo mubona, kihande, muye ni bona, kamba kwa ndu ya bona, kamba ki kai kaufela, kono musike mwaæza zeo mwa muyaho wa milapelo. Wo kwateni lu uneele ku Mulimu. Mwabona? Se kona sibaka sa Hae mwa kukopanela, ko lukopana ni Yena. Mwabona? Mi Mulao

uzamaya kuzwelela mwa ndu ya litapelo, eeni sha. Mi Ni—Ni lumela kuli zeo li tabisa Ndata luna ya kwa Lihalimu.

<sup>43</sup> Mi cwale ha mukena, mi mukala kufumana kuli limpo lisweli kuwela mwahala mina... Cwale, hañata ki... Ni sepa kuli hakuna kuba cwalo mo; kono, haiba sicaba sina ni keleke yenca, taba yapili mwa ziba, kopano iba ye omelezi milala. Ha mulati kuli kube zeo. Nihakuba cwalo, se ki sibaka sa milapelo. Ye ki ndu ya Mulena. Ni haiba limpo za moyo likala kutaha mwahala mina...

<sup>44</sup> Na utwisisa, kuli ha Ni siyo, kuti sicaba situtezi kwanu kuzwa kwa libaka zeshutana za naha, ku to eza sibaka se kuba lapa la bona. Na itumela, ni itumela ku Mulimu, kuli, Na lumela cwalo...

<sup>45</sup> Kakusasana one Ni neezi ni kutoma licwe lamwa lilulu lani fani, inge nili fela mucaha, Ne ni lapelezi kuyema kwa yona kuli mane kubone Kutaha kwa Jesu Kreste. Mi hane Ni ezize cwalo, inge nina ni likoloti madollar a likiti kiti, mi fani... Nemukona ku amuhela lineo mwa kopano ye likana ni ye kono mufumana ma senti a mashumi amalalu kamba mashumi amane, kono zene lu banga ni zona mwendi iba mwanda ni mashumi aketalizoho, madollar a myanda yemibeli fa kweli. Kana Ne ni ka kona cwani? Mi Na ziba kuli Ne ni sebeza, mi Ne ni ka lifa likoloti zani. Na... Lilimo ze lishumi ni zesupa za musebezi wa bubuleli kusina kunga nihaiba senti iliñwi, kono inge ni beya mwateni kaufela zene Ni fumana, zaka kasibili, kwanda kubata mwa kupilela; mi zeo kaufela ne litahanga mwa kapongisi kakanyinyani kwa mulaho, kwa Mubuso wa Mulimu.

<sup>46</sup> Mi sicaba sa polofita ni kuakaleza kuli mwahala silimo silisiñwi fela neika fetuha kuba sibaka sa kulukiseza limota. Satani alika ku lu amuha sona nako yeñwi mwa butata nyana, bwa likoloti. Muuna yomuñwi na bulezi kuli na ikolofalize kwa lihutu hana sweli kubeleka, mi kipeto añala aya, mi kipeto... mi aya kwa kuta ni kubata kuli ange fela tabernakele. Mi ka lisunda sunda Na yema mwa sibaka. Kono ni ha ne kunani kusa utwisisa ni za kunuha zani, ni ze ne ba bulela, isa yemi ni kacenu sina iliñwi ya miyaho yeminde hahulu mwa United States. Yeo ki niti.

<sup>47</sup> Kuzwa kwanu kuile Linzwi la Mulimu yapila, mwa lifasi kaufela, mwabona, ni kupotoloha mwahala lifasi; ni litundamezi kuzamaya ka kupotoloha kwa Lona hala lifasi loote, kuzwa mwa naha ifi kaufela ye mwatasa Lihalimu, kuya ka mo lu zibela, kupotoloha ni kupotoloha lifasi. Ha lu itumeleni ka se. Ha lu itumeleni ka se.

<sup>48</sup> Mi cwale hase lubile ni sibaka mwa kuina, situwa mwatasa litoho za luna, ye kenile, mane ki keleke yende mwa kuina, halu ipeyeni sinca kwa musebezi, mi lu ipe ili luna ku Kreste.

<sup>49</sup> Mi Muzwale Neville, muzwale waluna ya ishuwile, mulisana wa niti, mutanga wa Mulimu ya pila. Kuya ka mwa zibela Liñusa

muuna yani, u Li sweli, ka zanani kaufela. Yeo ki niti. Ki mutu ya musa. Una ni sabo nyana, kamba, ha sabi; Hani talusi seo. Kono u cwalo, ki ya musa hahulu, yena fela, ha ki mutu ya ipulelela fela, mwa ziba, inge ku—ku bulela sika se si buhali ni kunyemisa, kamba, “Inafafasi,” kamba, “Kuza wena!” Ni—Ni lemuhile cwalo, mane ni teeelize ni kwa matepu ka zona.

<sup>50</sup> Kono kubanga kuli Na nakona kueza cwalo. Kacwalo Ni—Ni... Mi Ni—Ni bata kuli muhupule manzwi aka, mwa bona. Mi se ni sona sa tepiñiwa, mwabona. Lika kaufela za tepiñiwa. Mi, shangwe, mubone kuli dikoni ufi kaufela ayemele sibaka sa musebezi wa hae, mi muhupule kuli mu mwatasu tumo ya Mulimu, kuli muswale musebezi wo ka tokomelo. Mwabona? Musepahali kaufela, kinto yeswana. Mulisana una ni kutisa . . .

<sup>51</sup> Ha ki sibaka sa mulisana sa kubulela zeo. Ki basepahali . . . kamba, Ni talusa madikoni, kakuli bona ki mapokola ba keleke. Fo kikuli, haiba baba sa zo nyalana ha sa batahela kafoo kwahule inge baliza pala ya mota, mi, mwa ziba, mo ba evezanga zeo, kamba nto yeñwi ye cwalo, kwa mikopano, kamba kuzwela kwande cwalo. Mi me yomuñwi uluma musizana yomunyinyani kwani, mi kipeto uya ni mwanana yomuñwi ya sa utwi, ni kumatela kwa mota kafoo, kanti bomaha ba nahana kuli uteni mwa keleke, lika ze cwalo. Madikoni balukela kutokomela zeo. “Taha kwanu utoina fa, kamba Ni ka kubeya mwa mota yaka ni kuise kwandu ku bomaho.” Mwabona? Ki mina, mu swanelia kueza cwalo.

<sup>52</sup> Muhupule, lilato la sikulula, mwabona, kamita. Lilato la niti la sikulula, kacwalo mulukela kuitisa ha mu sikululwa. Mi, bahame, muzibe cwale kuli kuna ni sibaka kwani sa limbututu za mina. Mina banana muzibe shutano kuli hakuna za kumata mata mwa tuyaho mo. Mwabona? Ni mina babahulu muzibe shutano ka mwa kubulelela ni kushobota shobota lingambolo za mina mwa tuyaho moo. Mwabona? Musike mwa eza cwalo. Ku maswe. Zeo ha litabisi Mulimu.

<sup>53</sup> Jesu naize, “Ku ñozwi kuli, ndu ya Ka ika bizwa ndu ya tapelo, litapelo. Kwande . . . Ibizwa ndu ya tapelo, kwa macaba kaufela!” Kono bona ne ba leka ni kulekisa, mi ki Ha nga mihala ni kulekisa batu mwa tempele. Mi luna ha lulati kuli zeo liezahale mwa tempele ye. Kacwalo, halu beyeni bupilo bwa luna, keleke ya luna, misebezi ya luna, sebelezo ya luna, ni lika zeñwi kaufela ze lunani, kwa Mubuso wa Mulimu.

<sup>54</sup> Cwale, cwale Ni bata kubala Mañolo nyana lusikaba kale ni tapelo ya kuneela. Mi—mi, he, ki kuneela fela sinca, kakuli kuneela kwa niti ne kuezahalile lilimo ze mashumi amalalu kwa mulaho. Cwale mwa . . . Mi—mi halunze lu—lu bala Liñolo ni kubulela ka Lona ka mizuzu yelikani, Ni sepa kuli Mulimu uka tisa limbuyoti za Hae ku luna.

<sup>55</sup> Mi nekuna ni nto yene Ni bata kubulela. Eeni. Kone lubanga ni baba rekoda, ni zeñwi cwalo, neluna ni sibaka sa kamita kwani, ko baba bata kunga ze rekodilwe. Kuna ni mihala yeipitezi ye tamilwe, ni lika zeñwi kafani, ye zwelela kwa maiki ye utwahala kwanu, kukena mwahali mwani.

Kuna ni libaka, masila, lika kaufela za sebelezo ya kolobezo.

<sup>56</sup> Mi cwale nto iliñwi, batu babañata ba ni nyemezi hahulu, batu babañata luli bene ba sa zibi Mañolo, ka za kuba ni sifapahano mwa keleke. Ni hupula nako yeñwi sesiñwi ne si ezahalile kwanu ka zeo. Neni nani lifapahano zetalu, mi muzwale akatazeha maswe kakuli na utwile kopano yeñwi haibulela kuli sifapahano si yemela Katolika.

<sup>57</sup> Ni bata muituti yomuñwi, kamba mutu fela, kamba Mukreste ya pepilwe sincia, ya ka bulela kuli ba Katolika bana ni sa kueza ka sifapahano. Sifapahano sa Kreste ha si yemeli Bukatolika. Sani siyemela Mulimu, ona Mubuso. Cwale, bahalalehi kona baba yemela Bukatolika. Lu lumela kuli kuna ni "Muyemeli alimuñwi mwahala Mulimu ni mutu, mi yani ki Kreste." Kono ba Katolika bona ba lumela mwa bayemeli ba mifuta kaufela, basali likitikiti ni baana, ni lika zeñwi; Mukatolika yomunde kaufela, mane, ya shwa kaufela, ufetuha kuba muyemeli kuti. Cwale, sifapahano sa Kreste siyemela Jesu Kreste.

<sup>58</sup> Kana mwa ziba kuli Bakreste bapili, kuya ka—ka litaba za kale za keleke yapili, neba lwalanga lifapahano kwa mikokoto ya bona, kaufela kone ba ya, kubonisa ni ku ipaka ili bona kuli ki Bakreste? Cwale, Bakatolika ba bulela kuli bani neli bona. Kakuli, ba bulela kuli ki bona bapili, kono Bakatolika ne ba si ka ikopanya kale ka nako yani. Mwabona? Kono Bakreste neba lwalla sifapahano kwa mukokoto... Mu utwile batu haba bulela kuli, "mukokoto wa sifapahano." Mutamanya zeo kwa Katolika?

<sup>59</sup> Ki katolika ya niti, yona Keleke ya batu kaufela ba lifasi ya Moya o Kenile, kona ye lukile. Luna lu ba katolika. Ki luna makatolika ba makalelo, makatolika baba lumela Bibele. Mwabona? Ki yona keleke, Katolika, ya kopano. Lu lukuluhile ku zani. Luna lu zwelopili ya Tuto ya baapositola. Luna lu zwelopili ya kolobezo ya Moya o Kenile ni lika zeñwi kaufela zeo Keleke yapili ne iyemela, mi keleke ya Katolika mane haina ni yeñwi ya zona. Mwabona?

<sup>60</sup> Kacwalo, neba beile sifapahano fa, sene si tisizwe, sene si betilwe fa kota ya olive kwa na lapelezi Jesu. Sani kona sifapahano se siina myaha, mi ne ni filwe sona ki Muzwale Arganbright. Mi Ni bata ku sineela hamoho ni keleke ye.

<sup>61</sup> Mane ni mo kuswanehela, kuli, kamba ki mañi kaufela yana si lepelelize fani. Ha ni zibi kuli neli mañi, yana si lepelelize kwa—kwa nzohoto yaka. Na swalezi sisinyi sani ku la bulyo la Hae; yani ki na.

<sup>62</sup> Mi nto yeñwi ye si yemela, sina toho ya Hae hane iinami, sina hamubona manyando a Hae. Batu bafi kaufela babali... Ba talimela fa katala. Mi U mi bata kuba fa, muezalibi, mi Uka talimafafasi ku wena. Kasamulaho bakaba ni liseli nyana le li beilwe fa, kuli pizo ya aletare ha ibizwa, liseli la monyeha fateni fani, kuli sicaba hasili kwanu ka zeo...

<sup>63</sup> Mu li, "Kiñi hamutokwa zeo? Ha ulukeli kuba ni maswaniso."

<sup>64</sup> Kihande, he, yena Mulimu yaswana yana bulezi kuli, "Musike mwa ikezeza maswaniso a kubasa," ki yena Mulimu yaswana yana bulezi kuli, "Amu bupe likerubimi zepeli ze swalani mafufa hamoho, mi mu libeye fa sipula sa sishemo fo kulapelela sicaba."

Mwa bona, ki—ki, kusina kutwisiso. Mwabona?

<sup>65</sup> Kacwalo, sani si susumelizwe mi si nyendaela fa sibaka se siswanela. Mi Ni itumela hahulu kuba na yali kwa neku la silyo. Ni sepa kuli U ni swalezi, kakuli Na, kuya ka litaba za kuuzwa, ze Ni ziba, Nali kuba nieze zeo fateni mwa bupilo bwaka; kono Ni sinyize hahulu nako ya Hae kuli mane Ni uzwize ka nzila yeo. Mi Ni ezize lika zeñata ze Ni sa lukeli kueza. Mi Na itumela ku Mulimu, kakusasana cwana, kuli U ni swalezi libi zaka.

<sup>66</sup> Mi cwale Ni bata kubala mwa Buka ya Makolonika Bapili 17, mi ni bulele fela mwendi ka mizuzu yeketalizoho fa sebelezo ya kuneela, lu lapele, mi kona luka kena mwa Liñusa. Cwale, mwa Makolonika Bapili, ka—ka kauhanyo ya 17.

*Mi cwale kwaba kuli, Davida hasa keni mwa ndu ya hae, Davida ali ku mupolofita Natani, Bona, Na ni pila mwa ndu ya sidare, kono areka ya bulikani ya MULENA inizi mwatasa masila.*

*Natani ali ku Davida, Eza kaufela se si mwa pilu ya hao, kakuli Mulimu una ni wena.*

*Mi kwaba kuli ona busihu bwateni luli, linzwi la MULENA la taha ku Natani, lali,*

*Zamaya ubulelele mutanga ka Davida... Zamaya mi ubulelele Davida mutanga ka, (nitaluse), Kisona sa bulela MULENA, Ha ki wena yaka ni yahela ndu yeni kaina ku yona:*

*Kakuli Hani sika ina mwa ndu haisamba lizazi le Ni kambamisa Isilaele kuto fita ni lizazi le; kono nenze ni zwanga mwa tende yeñwi kukena ku yeñwi.*

*Kona mo Ni zamaezi cwalo ni Isilaele kamukana, kana kuna ni fo Ni bulelezi taba nihaili ku yomuñwi wa baatuli ba Isilaele, bene Ni beile kulisa sicaba sa ka, na li, Kiñi se mu si ka ni yahela ndu...?*

*Cwale bulelala mutangaka... Davida, Kisona sa bulela MULENA wa limpi uli, Ni kungile kwa milaka, kwa kulatelela lingu, kuli ni kubeye mulena wa sicaba saka sa Isilaele:*

*Mi Na ba ni wena kakai ni kakai kaufela ko zamaile, na feza... lila za hao kaufela fapila hao, mi na kuezeza libizo lelituna le li swana inge mabizo a... babatuna babaliteni mwa lifasi.*

<sup>67</sup> Ni tabela kubulela kuli, fa sibaka se, kuli—kuli Davida naboni nto yeswana ye luboni ni luna. Davida naize kuli, “Ha ku si ka luka kuli mina sicaba mu ni yahele ndu ya sidare, kono areka ya bulikani ya Mulimu yona iinzi mwatasasa masila.” Ani neli matalo ana lukilwe hamoho, a lingu ni lifolofolo. Mi ali, “Ha ku si ka luka kuli na nibe ni ndu yende, kono kanti areka ya bulikani ya Mulimu waka yona isiyale mwa tende.” Kacwalo, Mulimu na si beile fa pilu ya hae kuli ayahe tabernakele.

<sup>68</sup> Kono, Davida, kakuba mu—mu muuna wa—wa lilato ni yaipile ku Mulimu, kono ni hana suluzi mali amañata cwalo. Kacwalo ki hali... Davida, inza bulela taba ye fapila mupolofita wa lusika lwani, yani neli Natani. Mi Natani, na zibile kuli Mulimu na lata Davida, mi ali, “Davida, eza kaufela sesili mwa pilu ya hao, kakuli Mulimu una ni wena.” Ha ki pulelo ni yeo! “Eza kaufela se si mwa pilu ya hao, kakuli Mulimu una ni wena.” Mi ona busihu bwateni luli... Kubonisa kuipa kwa Davida kwa lilato la Mulimu.

<sup>69</sup> Mi cwale ni kubona, ona busihu bwateni, ka kuziba kuli nali mwa mafosisa, kuli na si ka lumelezwa kueza cwalo, Mulimu nana ni sishemo ku yena kuli atuluka ni kuto ambola ku Natani. Mi Na kamita nalata manzwi ao, “Zamaya u bulelele Natani wa Ka... Zamaya ubulelele Davida mutanga ka, kuli, ‘Ni ku ngile kwa milaka.’” Fela, na si sika batili.

<sup>70</sup> Mi Ni—Ni tabela kubeya seo fa, fa muzuzu fela. “Ni ku ngile fo kusina, mi Ni—Ni—Ni kufile libizo. Una ni libizo inge batu babatuna ba mwa lifasi.” Mi Ni tabela kubeya sani mwa—mwa sepo, ibo mwa—mwa nzila ya kubonisa taba hande. Ne ni sweli kunahana kuli...

<sup>71</sup> Lilimo nyana kwa mulaho, Ne ni yemi mwa muleneñi mo, mi hakuna mutu yana ni iseza ngana. Hakuna yana ni lata. Kono Na ne ni lata batu, kono hakuna mutu yana ni lata, bakeñisa makalelo a lubasi. Hani nyazisezi boma ni bondate babande bani.

<sup>72</sup> Mo Ni lakaleza kuli boma nebaka pila kufitela ba hata mwa tempele ye, kakusasana cwana. Buñata bwa sicaba sa kale bene ba tisize mashleñi a bona kuli kuyahiwe ndu ye, mwendi Mulimu, kakusasana cwana, uka ba lumeleza kutalimela banze bali mwabuse bwa museto.

<sup>73</sup> Kono lubasi lwa ba ha Branham nelusina libizo lelinde luli mwa sibaka se, bakeñisa bucakolwa. Hakuna mutu yana tabela kueza sina ni na. Mi Na hupula hane ni sweli kubulelela musalaka ha ki kale hahulu, ni hupuzi fela zeo kuli Ne—Ne ni sa konangi kuba ni wa kubulela ni na. Hakuna mutu ya na ni iseza ngana. Kono fa cwale ni nani kuipatanga, haiba ni bata kupumula nyana.

<sup>74</sup> Mi cwale Mulena ulufile sibaka sesinde se, ni—ni lika zetuna Za ezize ze. Mi Uni file a... Kwanda a—a libizo leli maswe, Uni file libizo sina baana babatuna. Mi U felize lila za ka kaufela ko Ni zamaile. Ha ku sikaba fateni sika se si yemi fapila Lona, kaufela ko Li ile. Kono, mane Ni itumezi hahulu ka seo.

<sup>75</sup> Mi cwale ne Ni ka ziba cwani; kakuba fela mwanana yomunyinyani kwanu, minzi yemibeli kamba yemilalu kuzwa kwanu, ku ya kwa Sikolo sa Ingramville, hane Ni sali fela yana sehiwa kwa sikolo, kuzwa kwa kuba ya shebile cwalo, ni sibapaliso fela fa simbotela sa kale? Kana Ne ni zibile cwani kuli mwatasa simbotela sani nekuna ni peu ya mulilima ono ka kona kupanya sina cwana? Mi kana Ni zibile cwani, zeo, kanti hakuna yana bulelanga ni na, kono kanti Yena na nifa—nifa libizo leli ka kutekiwa mwahala sicaba sa Hae?

<sup>76</sup> Mi, cwale, Davida na si ka lumelezwa kuyaha tempele. Na si ka eza cwalo. Kono Yena ali, “Ni ka nanula yazwa mwa lusika lwa hao, mi ki yena yaka yaha tempele, mi tempele yeo ikaba tempele yekaina kamita. Mi ku mwana hao, yena mwana Davida, ukaba mubuso okaina kamita; uka busa.” Solomoni, mwana Davida wa mushimani wa butu, wa mwa mata a hae, a yahela Mulena ndu, tempele.

<sup>77</sup> Kono cwale Peu ya niti ya Davida ya taha, yena Mwana Davida, Aba bulelela kuli ne kuka taha nako yekusike kwaba licwe fa halimwa leliñwi, fa tempele yani. Kono A lika ku ba supeza kwa tempele yeñwi.

<sup>78</sup> Joani, musinuli, mwa Buka ya Sinulo, na iboni Tabernakele ye. Sinulo 21, na boni, “Tempele yenca inge itaha, inze ituluka kuzwa kwa Lihalimu, ikabile sina munyalawa ya apalezi muuna hae. Mi Linzwi la utwahala kuzwa mwa Tempele, lali, ‘Amubone, Tabernakele ya Mulimu inzi ni batu, mi Mulimu ukaba ni bona, mi baka takulwa mioko yabona kaufela kwa meto a bona. Mi hakuna kuba tala, hakuna kuba maswabi, hakuna kuba matuku kamba lifu; kakuli za kale se lifelike.’”

<sup>79</sup> Mi cwale Mwana wa niti wa Davida, sina ha luka bona mwa lituto zetaha mwa sunda ye, uka taha cwale kwa Tempele Ye, yona Tempele ya Mulimu, ili Tabernakele ya niti yona Yailo yaha cwale. Kakuli, Na bulezi cwana, mwa Joani 14, “Mwa Ndu ya Ndate kuna ni miyaho yemiñata, mi Ni ya...” Ki sikamañi sa Na talusa ka sani? Li lukisizwe kale. “Mi Ni sa yo mi lukiseza Sibaka, kono ni ka kuta, ku to minga ko Ni kaba.” Mi, eeni sha,

lu ziba kuli zani likaba mwa Lusika lolutuna lo lutaha. Mi ni Peu ya niti ya Davida ika amuhela Lubona, yeli yena Jesu Kreste, mi ba ka busa fa Keleke, sina Munyaliwa wa Hae, mwa Ndu ni Yena, ni kubusa masika a lishumi ka amabeli a Isilaele, mwa nako ya Kuyakuile kaufela.

<sup>80</sup> Mi ona libaka zenyinyani ze; sina Davida, hana si ka yaha Tabernakele ya niti ya Mulimu, kakuli na si ka itukiseza yona. Nekusina sa na ka eza. Nali fela mutu wa nama, mane na suluzi mali. Kucwalo ni kacenu, ku luna, ha lu si ka itukiseza kuyaha Tabernakele ya Mulimu. Kuna ni fela Alimuñwi yakona kueza cwalo, mi I sweli Ya yahiwa cwale.

<sup>81</sup> Kono ye ki tabernakele yenyinyani, haizamaya hamoho ni tempele yana Mu yahezi Solomoni yani, mi hamoho ni zeñwi, ze ki libaka za swalelele fela mwa kulapelela kufitela nako itahe fo Tabernakele tenyene haika toma fa lifasi. “Mi kuluka kuka busa kuzwa kwa lihalimu leliñwi kuisa ku leliñwi. Mi hakusana kuba maswabi.” Hakuna kuba malilo aka kutazwa mwa Tabernakele yani. Hakuna kuba linawenga, kakuli Sinawenga ikaba Sinawenga silisiñwi se situna sa Kuyakuile. Ha ki nako ni yeo moika bela!

<sup>82</sup> Kono ha lu itameni mwa lipilu za luna, kacenu, mwa kunyakalala ni kulibelela kwa Tabernakele yani ye taha, kuli lukone kuipeya hahulu ili luna mwa Moya wa Hae, kuli lu lapele mwa sibaka se inge mone luka lapelela mwa Sibaka sesiñwi sani, lunze lu libelela kuli Sibaka sani sitaha.

<sup>83</sup> Cwale ha lu yemeni, mi sina ha Ni balile Liñolo le Likenile.

*Mi Na bona lihalimu lelinca ni lifasi lelinca: kakuli lihalimu la pili ni lifasi la pili neli felile; mi neku sina liwate ni lelikana.*

*. . . Na Joani na bona munzi o kenile, ili Jerusalema yomunca, ha utuluka kuzwa ku Mulimu kwa lihalimu, o lukisizwe sina munyaliwa ya kabiselizwe muuna hae.*

*Mi Na utwa . . . linzwi lelizwa kwa lihalimu lali, Hamubone, tabernakele ya Mulimu iinzi ni batu, mi uka pila ni bona, mi bakaba sicaba sa hae, mi Mulimu luli ukaba ni bona, mi abe Mulimu wa bona.*

Halu inamiseñi litoho za luna cwale.

<sup>84</sup> Ndata luna yakwa Lihalimu, lu yemi ka kukomoka. Lu yemi ka likute mi ili ka likute le li Kenile. Mi lwa Ku kupa, Mulena, kuli u amuhele mpo ya luna, kuli U lufile sishemo, masheleñi, a ku lukisa sibaka mwa ku Ku lapela. Hakuna sika, kamba hakuna sibaka se lukona kulukisa fa lifasi mubu, sesikona kuba se si swanela kwa—kwa Moya wa Mulimu kuli upile teñi. Kono lufa se ku Wena ka zibahazo ya lilato ni maikuto a luna ku Wena, Mulena. Mi lwa itumela ku Wena ka lika kaufela Zo lu ezelize.

<sup>85</sup> Mi, cwale, muyaho ni libaka ze neli neezwi kale kale koo, kwa sebelezo, mi lwa itumela ku Wena ka mihupulo ya zebile teni. Mi cwale, Mulena Mulimu, sina pono ha ibonahalile, lilimo kwa mulaho, inze ibonahalisa nto ye, kuli Ne ni boni miyaho ya kale mone kupilanga batu, mi se i lukiswa ni kupangiwa sinca, mi Na lumiwa kuya mwabuse bwa nuka.

<sup>86</sup> Cwale, Mulena Mulimu, Mubupi wa lihalimu ni lifasi, lu yema sina sicaba sa mutapi wa Hao. Lu yema sina—sina—sina—sina sicaba sa Mubuso wa Hao. Mi ni na kasibili, hamoho ni mulisana, ni keleke, ni sicaba, lu beya muyaho wo kwa sebelezo ya Mulimu Yamata kaufela, ka Libizo la Jesu Kreste, Mwana Hao, kwa sebelezo ya Mulimu, ni kwa buishuwi ni likute ku Mulimu. Mi cwale Evangelhi ha ibube luli kuzwa mwa sibaka se kufitela ieza lifasi kutaha kuzwa kwa maneku amane a lifasi, ku to bona Kanya ya Mulimu haizwa ku yona. Sina Mo ezelize kwa mulaho, mi zesa taha libe zetuna hahulu ni kufita.

<sup>87</sup> Ndate, luipa ili luna cwale kwa sebelezo, kuya ka Linzwi, ni zeli ku luna kaufela. Mulena, kopano ni sicaba, baipa ili bona, kakusasana cwana, kwa kuteeleza kwa Linzwi. Mi luna, kakuba bakutazi, luipa ili luna, “Kwa kutazo ya Linzwi; kuli lufumaneha ka linako zende, ni ka linako ze maswe; lunze lu sikulula, kukalimela ka pilutelele kaufela.” Sina ha ku ñozwi fa licwe la mwa lilulu lani, kuzwa ka lilimo ze mashumi amalalu kwa mulaho. No ize, “Nako ika taha fo batu habasike ba yemela Tuto yepilisa, kono ba ka ipundekela ili bona baluti, ni lizebe ze ñwaeza; mane ba keluswe kwa Niti, baye kwa matangu.” Mulena, sina ha lu likile kushaela Linzwi kwa sicaba, ha lube baba susumelizwe ni babafilwe mata ka musebezi omuñwi omutuna hape. Mulena, ka kuba siemba sa likalulo zepeli za Moya oka wela fa sibaka, eza kuli Moya o Kenile . . .

<sup>88</sup> Sina mone kubezi mwa mazazi a kuneela kwa tempele, fani Solomoni hana lapezi; Moya o Kenile, mwa mufuta wa Siita sa Mulilo ni Lilu, za taha fa munyako wa kwa pata, wa to pikuluha Likerubimi zani, ni kuya mwa Sibaka se Sikenile mi kwani Sa yo lula. O Mulimu! Solomoni ali, “Haiba sicaba sa Hao siba mwa butata kai kaufela, sitalime kwa Sibaka se Sikenile se ni kulapela, kipeto U utwe uli kwa Lihalimu.”

<sup>89</sup> Mulena, eza kuli Moya o Kenile, kakusasana cwana, utahe mwa pilu ni pilu kaufela, moyo kaufela o ipile oliteni mo. Mi Bibele ibulela cwana, ili, “Kanya ya Mulimu neli yetuna hahulu kuli babuleli ba palelwa nihaiba kukutaza, bakeñisa Kanya ya Mulimu.” O Mulena Mulimu, ha ikutelo hape hanze luipa ili luna ku Wena, hamoho ni keleke, mwa kuneela kwa sebelezo. Mi ku ñozwi kuli, “Mukupe, mi mu ka fiwa.”

<sup>90</sup> Mi luipa ili luna, ni neo ya keleke, kakusasana cwana, ku Wena, kwa sebelezo, kwa Maseli a lizazi la mafelelezo, kwa Maseli a nako ya manzibwana; kuli lukone kutisa tiisezo ni

tumelo kwa sicaba se si libelela ili se si libelezi Kutaha kwa Munyali, ku apesa Munyaliwa mwa Evangelii ya Kreste, kuli Mulena Jesu a amuhele. Lwa neela se, na kasibili, Muzwale Neville, ni kopano, kwa sebelezo ya Mulimu, ka Libizo la Jesu Kreste. Amen.

Mwakona kuina.

<sup>91</sup> Davida naize, “Ne ni tabezi hane ba ni bulelezi kuli, ‘Haluye kwa ndu ya Mulena.’” Mi halibe ni luna zeo kamita, kuli, ha li bulelwa, lukaba baba tabezi ku kopanelia mwa ndu ya Mulena. [Kopano ili, “Amen.”—Mu.] Amen.

<sup>92</sup> Cwale, kasamulaho wa sebelezo yelikani ya kuneela, Nina ni hola cwale.

<sup>93</sup> Mi, cwale, muhupule fela cwale se luipile ku sona; kwa likute, kukena, kukuza fapila Mulena, milapelo fapila Mulena. Mi ni kuba fela babana ni likute mo mukona kubela, mwa ndu ya Mulena. Mi, cwale, mi cwale sebelezo haifela, kapili sebelezo imano fela, muzwele fande. Mwabona? Mi seo sifa mulibelei wa fa munyako kukena mwahali ni ku lukisa hape za nako yetatama, ni ku itukisa. Mi cwale ha ku tokwi kuba kulyangana mwa ndu ya Mulena. Mi...?...Ni sepa mu...sibaka si ka fiyelwa hande mwa mizuzu ye lishumi ka yeketalizoho kasamulaho wa lisebelezo limana kufela. Mubone kuli muba ni moyo wa bulikani. Muitumelise mwa mazoho ni mañi ni mañi, mi mu meme mañi ni mañi kuli akute hape.

<sup>94</sup> Mi—mi lu kulubela kuba ni, biki yetaha ye cwale, iliñwi ya lisebelezo ze butokwa hahulu yekile yaba teni mwa tabernakele. Lu ilibezezi luli. Cwale, Ni—Ni... yali kuba ini fitele kufitela nto yeñwi... kufitela nako yetetele, busihu, lihola zenyinyani maabani busihu, mwa tapelo, Na kala kubona nto yeñwi. Kacwalo, Ni sepa kuli ye ikaba nako yende, yeo Ni lumela kuli ikaba cwalo, haiba Mulena uka lu tusa. Cwale, cwale, ha Ni bulezi kuli, “nako yende,” cwale, Ni ka bulela fa nto yeñwi ka sani, kakusasana cwana. Mwa ziba, seo mutu abiza “bunde,” fokuñwi ha ki sesinde. Kono seo Mulimu abiza “bunde,” mutu u si biza bukuba; mi seo Mulimu abiza kuli “bukuba,” mutu u si biza bunde. Kacwalo ha lu lemuheni zeo mwa munahano wa luna, lu pime Linzwi kaufela.

<sup>95</sup> Cwale, lisebelezo ki zetetele. Li ka ñoliwa, kakuli ki sebelezo yetata, ki tuto yetuna, ya kuipa. Mi fela Ni... .

<sup>96</sup> Sibaka ko Ni pila, batu ba lika fela, mi babata ku ni fepa lika kaufela, kono Ni... Bali, “Kihande, u fokozi hahulu, Muzwale Branham, lika kaufela.” Kono Ni bile kamita mwa sebelezo. Nina ni kuzwa kwanu ka la Sunda yetatama busihu, kuli ni ye ku yeñwi, kapili luli, mwa Mexico. Kacwalo, ki nto yetata fela. Kacwalo, kono Ni lika fela kusaba nyana kwa kuca hahulu, mi—mi ni itukise fela.

<sup>97</sup> Mi Ni tabile, kakusasana cwana, ku bona Muzwale Junior Jackson, ni—ni Muzwale Ruddell, ni—ni bakutazi baba shutana, ni babañwi cwalo, baba liteni. Mulimu ami fuyole kaufela.

<sup>98</sup> Cwale Ni—Ni bata ku—ku bulela ku mina kakusasana cwana fa tuto ye Ni na ni lika zeñozwi fa. Mi Ni bata kubala pili kuzwa mwa Buka ya Isaya, kauhanyo ya 53. Cwale, hamunze mu apula ku yona, Ni bata kufa zibiso, kamba zepeli.

<sup>99</sup> Kuli, busihu bo, Ni bata kubulela ka Buka *ye*, ka kuitamahanya mwahala lusika lwa mafelelezo lwa keleke kwa ku kwaluha kwa Liswayo. Cwale, kuna ni pakani yetuna fateni foo.

<sup>100</sup> Mi, mane, Hane ni yemezi fa masika a likeleke, Ne ni bulezzi hape fani ka lisunda ze mashumi asupile za Daniele, kapili kona ze tatami ku ona, kakuli ne li tamahani mwateni. Mi Ne niize, “Cwale, Haiba Ni kona kunga Maswayo Asupa, Nika tokwa ku zusa kwateni lisunda ze mashumi asupile za Daniele ze, ili kuli li tamahane hande ni Maswayo.” Kusiya nto iliñwi inge ikwaluhile, mi yani neli kauhanyo ya 5, ya Buka ya Maswayo Asupa. Mi luka ambola ka zeo busihu bo.

<sup>101</sup> Lu bata kulika kukalisa ka kuitahanelia nyana busihu bo. Kucwani ka na . . . U bulezzi kale zeo, nji cwani, lukale kapili? [Muzwale Neville uli, “Eeni.”—Mu.] Kucwani he, kana mañi ni mañi abe mo ka sebene kiloko? [Kopano ili, “Amen.”] Ku lukile. Halu kaliseni sebelezo ya kamita ka sikisi seti, sebelezo ya lipina, mi Ni kaba mo ka sebene. Mi cwale mwahala biki luka kalisa ka kuitahanelia. Mi—mi luna, cwale, lu taha . . .

<sup>102</sup> Hakuna ya lata kuopela sina Bakreste mo ba latela kuopelela. Lwa lata kuopela. Lwa lata lika zani.

<sup>103</sup> Kono cwale lu—lu keni mwa nto yeñwi cwale. Lu—lu mwa Linzwi, mwabona, kacwalo halu—halu pileni hande ni Linzwi lani cwale. Lukaba ni kueza cwalo. Lu—lu keni mwa tuto. Mi mwakona kulemuha mukatalo oli ku na, mwabona, kakuli, haiba Ni luta sika ka mafosisa, Ni ka yo ikalabela ka sona. Mwabona? Mi kacwalo ha Ni lukeli kunga za bulela mutu ufi kaufela. Ni swanela kuba . . . Li lukela kuba ze susumelizwe. Mi Ni lumela kuli Mangeloi Asupa ani, Ona asweli Mishika Yesupa yani, aka lumeleza cwalo. Mwabona?

<sup>104</sup> Mi cwale mwa Isaya, kauhanyo ya 53 ya Isaya, timana ya 1, kamba amabeli. Ni bata kubuza puzo ye.

<sup>105</sup> Cwale, se ha si ami Maswayo Asupa, ni hanyinyani. Le ki Liñusa fela. Kakuli, Ne ni ziba kuli Ne ni lukela kuba ni kuneela, mi Ni palezwi kukena ku Zona kakuli Hanikoni kuba ni nako. Kono Ni hupuzi kuli, ka sebelezo nyana fela ya kuneela, sebelezo nyana ya kupuzo ya keleke *ye*, kamba sebelezo ya kuneela, nitaluse, mi kona—kona . . . hakuna kunga nako mi lukaya ku ze Ni bata kubulela, mwabona, mwa Buka ya kukwalula *ye*,

kacwalo Nika eza cwalo busihu bo. Mi cwale ye ki sebelezo fela ye nyinyani, kuli, ika—ika tamahana hande ni Lona, niteñi.

<sup>106</sup> Kabakaleo, cwale, muiteeleze kwa Linzwi kaufela. Mu Li swale. Mi—mi haiba musweli ku Li teeleeza fa matepu, kamba sika kaufela, konakuli muine hande ni Tuto ya tepu yeo. Musike mwa bulela lika lisili konji zeibulela tepu yeo kihona. Mubulele fela ona cwalo se i bulela tepu. Mwabona? Cwale, kakuli, zeñwi za lika zani, luka utwisisa zeñata cwale ka zona, libaka le I pala ku i utwisisa. Mwabona? Mi mubone hande kuli, fela mubulele fela ona se ibulela tepu kihona. Musike mwa bulela lika lisili. Mwabona? Kakuli, Hani ipulelelangi Zona ka na fela. Ki Yena ya Li bulela, mwa bona. Mi linako zeñata hahulu, likañi, batu ba taha mi bali, “Kihande, mukete *Wakuli-ni-kuli* ubulezi kuli Li talusa sa *kuli-ni-kuli*.” Fela—fela mu I tuhele fela ona cwalo mo I inezi.

<sup>107</sup> Mwabona, cwalo kona mo lubatela Bibebe. Ona cwalo fela Bibebe mo ibulelela Likä, kona mo lu Li batela, fela—fela ibe ona Cwalo. Musike mwabeya toloko ya mina ku Yona. I tolokilwe kale, mwa bona. Cwale:

*Ki mañi ya lumezi se lu bulela? mi lizoho la MULENA li bonahalezi ku mañi?*

<sup>108</sup> Halu boneñi nibale fateñi hape cwale, muiteeleze.

*Ki mañi ya lumezi se lu bulela? (Puzo!) mi lizoho la MULENA li bonahalezi ku mañi?*

<sup>109</sup> Mwa manzwi amañwi, “Haiba mulumezi ze lubulela, kona kuli lizoho la Mulena li bonahalile.” Mwabona?

*Ki mañi ya lumezi se lu bulela? mi lizoho la MULENA li bonahalezi ku mañi?*

<sup>110</sup> Cwale Ni bata kubala hape mwa Buka ya Muhalalehi Mateu mwa Evangelí ya hae, kauhanyo ya 11 ya Muhalalehi Mateu. Mi, cwale, mutise mapampili a mina ni lika zeñwi, kakuli ka tundamo luka... Haiba hamuna za ku rekodela manzwi, mu—mu tise li... mapampili a mina kuli muñole. Kauhanyo ya 11 ya Muhalalehi Mateu, litimana za 25 ni 26, 11:26 ni 27. Ku lukile, Jesu wa bulela, mwa tapelo. Ni bata ku kalela mwa mulaho nyana a foo. Halu ezeni timana ya 25 ni 26. Ni lumela kuli kona ye Ni bulezi yeo, niteni, kakuli Ni iñozi mwa Bibebe yaka.

*Ka nako yeo Jesu abulela ali, Na ku lumbeka, O Ndate, Mulena wa lihalimu ni wa lifasi, kakuli litaba za hao ulipatezi baba butali ni baba talifile, mi uli patululezi bana baba nyinyani.*

*Ee, Ndate ku cwalo: kakuli ki mo ulatezi.*

<sup>111</sup> Muswale Mañolo amabeli ao. “Ki mañi ya lumezi se lu bulela? Mi lizoho la Mulena li bonahalezi ku mañi?” “Niteñi mane Jesu a lumba Mulimu kuli Na patile likunutu ze ku baba butali ni baba talifile, mi ali patululela kwa bana baba

nyinyani babakona kuituta, kakuli ki mwa na latezi Mulimu kueza cwalo.”

<sup>112</sup> Cwale, kuzwa mwa palo, kamba, ku ibiza cwalo, kamba kuzwa mwa palo ya Liñolo le, Ni nge yetwi: *Mulimu Uipata Iliyena Mwa Bunyinyani, Ni Kuipatulula Iliyena Mwa Mukwa Oswana*. Cwale, kwa matepu Ni kutele fateni cwalo, kabakeñisa matepu, mwa bona, kakuli basweli—basweli ku Li tepiña. Mwabona? *Mulimu Uipata Iliyena Mwa Bunyinyani, Ni Kuipatulula Iliyena Mwa Mukwa Oswana*.

<sup>113</sup> Kinto yenca ku nahana kuli Mulimu u ezanga lika ze cwalo. Mulimu u aipata Iliyena mwa sika sesiñwi se si nyinyani hahulu ka bunolo se si ka eza bo lule lule kupalemwa ku sibona; mi ni kukuta mwa mulaho, wa sona, sika se si bunolo mwa bunyinyani bwa nzila ya kubeleka kwa Hae, ni kuipatulula Iliyena ku sona hape. Ne ni hupula kuli si ezize mu—mu mukanga, kuli lukone kubala fateni lu sikaya kale kwa—kwa—kwa Lituto zetuna za Maswayo Asupa. Babañata ba palelwa ku Mubona ka nzila ya Ipatulula yena Muñi ka yona.

<sup>114</sup> Cwale, batu bana ni milelo ya bona ya mo Mulimu alukela kubela ni seo Mulimu aka eza. Mi sina ha Ni bulezzi pulelo ya kale linako zeñata, kuli, mutu ukana aba mutu ona cwalo. Mutu kamita ulata kulumbeka Mulimu ka Za kile aeza kwa mulaho, mi hape ni kutalimela kwapata ku Za ka eza, kono inge a sa tokomeli Za sweli kueza. Mwabona? Mwabona? Cwalo kona mo ba li mbwinjeza. Ba talimelanga kwa mulaho ni kubona nto yetuna Yakile a eza, kono ba palelwa kubona nto yebunolo Ya ezize ka yona, yona ya eza ka yona. Mwabona? Mi kipeto ba talimela kwapata ni kubona nto yetuna ye sa taha, ye ka ezahala, mi, linako zeñata mwahala linako ze lishumi, lisweli kuezahala mwahala bona ona foo. Mi ki nto yebunolo hahulu kuli ha ba li zibi. Mwabona?

<sup>115</sup> Zazi leliñwi, mu—mu muuna kwanu kwa Utica . . . Mi haiba babañwi ba sicaba sa habo bateni mo, Hani buleli se kwa—kwa kubonisa bukuba muuna yani. Nali mu—mu mutu ya twaezi Ndwa ya Naha. Mi Ni lumela kuli nali . . . Hani zibi kuli nali kwa neku lifi, kono Ni lumela kuli nali Mukwenuheli. Kono, na—na li mutu ya sa zibi za bulapeli, mi mane na bulela kuli hakuna sika sa kuli Mulimu. Na pila kwa Utica. Libizo la hae neli Jim Dorsey. Buñata bwa mina sicaba mwakona ku mu ziba.

<sup>116</sup> Uni file mahapu amañata, hane Ni sali mwanana fela. Na limanga mahapu kwa nuka kwani, mwa—mwa matapa kwani kwa sishanjo. Mi nali mulikana bo ndate. Kono ki hali, zazi leliñwi, iliñwi ya lika zetuna zabutokwa yene bulezwi ku yena, ka kubapanya. Cwale, Ne nili fela mushimani nyana fela mwa mazazi ani. Kono, ka kubapanya ni tumelo ya hae, sani sa mueza kuli aye kwahule ainamisa toho ya hae mi alila. Mi Ne ni utwisisa

sani, ka se, muuna wateni na tilo fetuhela ku Kreste ka kanya yetuna ka lilimo zekona kueza eite faifi za kupepwa.

<sup>117</sup> A buza musizana yomunyinyani, zazi leliñwi, yana zwa kwa sikolo sa la Sunda, kuli kiñi hana sinya nako ya hae ka kueza lika zecwalo zani? Mi ali, kakuli na lumela kuli kuna ni Mulimu. Mi Bo Dorsey ba bulela kuli, se bali, “Mwana, wa fosa luli, ka kulumela mwa lika zecwalo zeo.”

<sup>118</sup> Mi abulela kuli musizana yomunyinyani ainamafafasi ni ku kumula ka—ka palisa nyana mwa . . . mwa mubu, ku ka comola mwa mutai wa kona, mi ali, “Bo Dorsey, mwakona ku ni bulelala ka mo ka pilela?”

<sup>119</sup> Neli taba luli. Ha na kalile ku nahanisisa, na ka bulela sani ku mwanana, “Kihande, isweli kuhula mwa mubu.” Mi hape puzo neika mu kutela kuli, “Mubu no zwile kai? Peu yani neikeni cwani mwateni? Kanti ne li ezahalile cwani?” Fa, ni fa, ni fa, ni ku mukutiseza zona kufitela ha yo li bona. Mwabona?

<sup>120</sup> Mi lika zetuna ze makalisa hahulu ze lu nahananga ka zona, kono ki lika zebunolo zeo Mulimu aiponahazanga ku zona luli, mwa bunolo bwateri. Kacwalo, sa tabisanga Mulimu kuli aipatulule Iliyena, mi kipeto aipate Iliyena; ni kuipata Iliyena, ni kuipatulula Iliyena, mwa bunolo, lika zenyinyani. Ki—ki ze beilwe fahalimu a toho ya mutu.

Kakuli, haiba mubulela kuli, “Kiñi Mulimu ya lukile akona kueza cwalo?”

<sup>121</sup> Libaka kikuli mutu na bupilwe, kwa simuluho, kuli asike alika ku shimbuluka ku za hae. Mutu na bupilwe kuli ayendamene fela ku Mulimu. Leo kona libaka ha lu swanisiswa kwa lingu, kamba ngu. Ngu haikoni ku iketelela yona iñi; ina ni kuba ni mueteleli. Mi Moya o Kenile ulukela ku luetelela. Kacwalo, mutu ubupilwe ona cwalo.

<sup>122</sup> Mi Mulimu na ezeze misebezi ya Hae kaufela ka mukwa obunolo, kuli baba bunolo bakone ku utwisisa. Mi Mulimu uikezanga Iliyena kuba ya bunolo, hamoho ni baba bunolo, kuli akone ku utwiwa ki baba bunolo. Ka manzwi amañwi, Mi uli, cwana mwa Isaya 35, Na lumela. Naize kuli, “Ni ha ikona kuba sikuba, hasikoni ku lyanganeha ku zona.” Ki ze bunolo luli!

<sup>123</sup> Mi luziba kuli Mulimu ki yomutuna luli, kufitela mane ha lu likulubela kuli libe lika zetuna, mi lu latehelwa ki lika ze bunolo. Lu sitatala fa lika zebunolo. Ona cwalo kona mo lu mbwinjeza Mulimu, ki kusitatala ku zebunolo. Mulimu ki ya bunolo hahulu kuli mane ni baituti ba mazazi a, ni mazazi kaufela, ba palelwa ku Mubona ka limaili maili. Kakuli, mwa lingana za bona, ba ziba kuli hakuna lika ze cwale ka Yena, kinto yetuna; kono, mwa sinulo ya Hae, U lieza kuba zebunolo hahuli kuli mane ba hatikela fahalimwa zona mi ba li mbwinja.

<sup>124</sup> Cwale, mubale Seo. Mu Si bale kaufela. Mi mina sicaba babatilo pota kwanu, ha mu ka ya kwa limotela za mina kwa malobalo, munge lika zeo mi munahane fateni. Haluna nako ya ku Li shetumuna mo Li lukela kubela, kono Ni bata kuli mueze cwalo ha mu ka fita kwa malobalo a limotela, kamba hotela, kamba ki kai kaufela ko mu yo pumula, kamba kwa lapa. Mukopanye hamoho mi mu Li balisise.

<sup>125</sup> Ba Mu latehisa ka mukwa Wa ipatululanga Iliyena ka ona; kakuli Yena ki yomutuna hahulu, ibo, u ipatanga Iliyena mwa bunolo, kuli Aitibahaze ku baba nyinyani. Mwabona? Musike mwa lika kuba ni zetuna, kakuli Yena uyanga kufita fahalimwa zona. Kono muitelezange kwa bunolo bwa Mulimu, mi kipeto muka fumana Mulimu ona fo mwa nzila ye bunolo.

<sup>126</sup> Zibo yetuna, ye cuukile ya lifasi, ya kuituta, kamita ya Mu latehisanga. Cwale, Hani yo mo . . . Mi Ni ziba kuli kuna ni baluti ba likolo, bababeli kamba babalalu, bao Ni ziba, babaliteni mwahali mo. Mi Haniyo mo ku to kananisa sikolo ni tuto, ni kulika kuyemela ku sa ituta. Haniyo mo ka zeo. Kono, ki sikamarī seo, sicaba si beile hahulu lika ku zani kufitela baba, mane niheba mwa mikopano ya bulapeli ni zeñwi cwalo, ba latehisa sika sa luli seo Mulimu abeile fapila bona.

<sup>127</sup> Kona ha Ni lwanisi mizwale babali mwa likopano, kono Ni lwanisa mulao wa likopano, kakuli li lika kuipabaza zona liñi, mi—mi—mi ni kuluta bakutazi ba yona mwa sibaka sa *kuli-kuli*, kufitela, haiba habana sikolo hande ni tuto, kipeto ba lelekelwa kwande. Mi—mi bana ni kuya kwa kutatubiwa ki mualafi ya talima mubelekelo wa booko, ni zeñwi cwalo. Nali kuba ni nahane kuli neli tato ya Mulimu ya ku tatuba mukutazi ka ngana ya mo bu belekela booko, kono ki ku mu lika ka Linzwi. Mwabona? I—i—ikona kuba nzila ya Mulimu ya kutatuba muuna wa Hae yo Alumile, kuli abe ni Linzwi.

<sup>128</sup> “Kukutaza Linzwi!” Cwale, kacenu lu kutaza ngana ya mibonelo ya batu, lu kutaza lituto za litumelo ni buino bwa likopano, ni lika zeñata luli, ni kuzwa kwa Linzwi, kakuli ba bulela kuli ha I koni ku utwisiswa. Yakona ku utwisiswa. Na sepisize kueza cwalo. Cwale lu Mu kupa kuli aeze cwalo.

<sup>129</sup> Cwale lukanga batu baba likani nyana mo ka mizuzu ye likani fela.

<sup>130</sup> Halu lemuheni mwa mazazi a Nuwe. Lizazi la Nuwe, Mulimu na boni butali bwa lifasi kuli ne bu lumbiwa ni ku kutekiwa, Na lumile liñusa le li bunolo ka mutu ya bunolo, ku ba bonisa butuna bwa Hae.

<sup>131</sup> Cwale, lu ziba kuli mwa lizazi la—la—la Nuwe, ba bulela kuli zwelopili neli ye mata hahulu, nako yani, konji mane ni nako ye halu sika fita kale fa sibaka sani, mwa zwelopili ya luna ya kacenu. Mi Ni lumela kuli kalulo yani ika fitiwa teñi, kakuli Mulena wa luna naize, “Ona mo ne kuinezi mwa mazazi a Nuwe,

kona mo kukabela ni kwa Kutaha kwa Mwana mutu.” Na file litaba za mitala.

<sup>132</sup> Mi ne ba yaha ma piramidi ni mindandwe ye pahami yani mwa Egepita, mi ba yaha lika zetuna zeo lusina malaiti, kacenu, a kuyahisa ka ona. Nebana ni—ni—ni mulyani wa kuomisa, kuli nebakona kuomisa mubili, ku ueza kubonahala inge o iketile mane kutofita ni kacenu usali teni. Ha lukoni. Ha lukoni kueza situpu kuba cwalo kacenu. Haluna lika za ku si panga ka zona. Nebana ni mibala yene—yene ina nako yetelele, mwendi ka lilimo ze likana fo kamba faifi sauzande kwa mulaho, isali mubala oswana ni kacenu sina mone uinezi. Mwabona? Haluna lika ze cwalo kacenu.

<sup>133</sup> Ni lika zeñata za zwelopili yani li bulela ka za zwelopili ya luna ya kacenu. Mi konakuli mwakona kunahaniseza mo tuto ni sayansi, ya lizibahazo zetuna zani ze lu sile, kuli nekuna ni zwelopili yecwalo yani. Ha ki—ha ki zwelopili kwa butuna ni yeo mone ilukela kubela, kihande, likupuzo ze, kuli mane sayansi ni—ni zwelopili ya kacenu ni tuto neli—neli mu—mu mufuta wa kuswalisana ni batu. “Ba lukela kuba cwalo. Neina ni kuba cwalo.” Nekusina nihaiba yekana, Na sepa, ya litimbi mwahala bona, ni hanyinyani kutokwa.

<sup>134</sup> Mi kacwalo, Mulimu, inza bata bata mwa sifumu tuna sa lizazi lani sani, mwa milao yabona, ne kusina, mwendi, kufumana mufuta o lukela wa mutu, kufitela Afumana mutu yana si ka ituta, mwendi, njimi wa libizo la Nuwe, mulisana wa lingu. Mi Amufa liñusa la Hae kuli akutaze kwa sicaba, lene lili bunolo hahulu, ku za—ku za kuituta kwa bona kwa lizazi lani, kufitela batu ha ba sitatala bakeñisa bunolo bwa liñusa. Mi, kanti, liñusa nelili, fapila sayansi, “Le likutekeha! Neku kaba cwani pula mwa mbyumbiyulu, kanti nekusina pula kulo kwani?” Mwabona? Mi liñusa leli bunolo la—la kuyaha areka, kuyaha sika mwa kukena, kuli hakuna mezi a ku si kukisa. Kiñi, nabile mufitelezi wa tumelo. Mi ki haba mu—mu—mu—mu... sene luka biza kuli, haiba mwakona ku ni swalela ka pulelo ya kacenu, kuli “muicemeli.”

<sup>135</sup> Mi mane buñata bwa sicaba sa Mulimu ki “baicemeli,” mwabona. Ba cwalo. Ni tabile ka kuba alimuñwi wa bona. Kacwalo, mwa ziba, ba—ba shutana kwa—kwa mikwa ni likezo za kacenu, kacwalo baba baba ipitezi, mi babanca. Na bulezi kuli sicaba sa Hae neli “Sicaba se si ipitezi, sesi icemezi, mufuta usili; kono ki ba suprisita bwa moya, ili naха ya silena, yefa litabelo za moya ku Mulimu, miselo ya milomo, inze ifa milumbeko kwa Libizo la Hae.” Ha ki—ha ki sicaba ni seo! Una ni sona.

<sup>136</sup> Mi mulemuhe, cwale, ha ki nto kwa butuna ni yeo mone ilukela kubela mwa lizazi lani, kuli mufitelezi wa tumelo yomuñwi atahe kwa keleke; mufitelezi wa tumelo, mi akutaza evangeli yene bonahala kuba yezwile mwa nzila, mwa mukwa

wa kulumela kwa bona. Ni ba sayansi, “Kiñi, neli—neli fela bukuba.” Mone ba konezi kubonisa kuli nekusina pula kwani!

<sup>137</sup> Kono mulisana ya bunolo yo yena alumela, “Haiba Mulimu na bulezi kuli ika nela, ika nela.” Mwabona?

<sup>138</sup> Mi cwale mubapise fela seo ni kacenu, ka za mutu ya fola. Ba li, “Ki maikuto fela. Na kona ku mibonisa ka sayansi kuli kansa, kamba sika, kamba—kamba—kamba nto yani isali teni fateni.” Kono, ku mulumeli ya bunolo, uicongile. Mwabona? Kakuli, ha talimi fa sika, utalimela fa sepiso, inge fela Nuwe mwa na ezelize.

<sup>139</sup> Kona kuli hamuboni kuli, “Ona mone kuinezi mwa mazazi a Nuwe, kona mo kukabela ni fa Kutaha kwa Mwana mutu”?

<sup>140</sup> Kuya ka sayansi, hakuna mutu . . . Dokota wakona kubulela kuli, “Talima kwetu, kululuha kwa hao kusaliteni. Kansa ya hao isa siyezi. Lizoho la hao li sa li sihole ona cwalo sina mo ne libelanga kamita. Wa lyangana.”

<sup>141</sup> Mi, muhupule, wo ki ona moyo oswana ni ono liteni mwa mazazi a Nuwe, bene ba bulezi kuli, “Hakuna pula kwa halimu kwani. Lwakona ku kunupa fa kweli ka lipangaliko za luna, mi hakuna pula fateni.” Kono haiba Mulimu ki yena yabulezi kukaba pula kwani!

<sup>142</sup> “Kakuli tumelo ki kusepa ka kutiya ze libelezwi, ni ku kolwa ze sa bonwi.” Mi tumelo ilwala sibaka sa yona sa mafelelezo ni kuyendamena fa Linzwi la Mulimu. Fani kona fo ifumana sibaka sa yona sa kupumulela. Mwa utwisisa? [Kopano ili, “Amen.”—Mu.] Sibaka sa yona sa kupumula ki fa Linzwi la Mulimu.

<sup>143</sup> Fani kona Nuwe fa na pumulezi, “Mulimu na bulezi cwalo.” Ani neli mafelelezo. Cwale haiba mu lemuha hape, kanti, cwale, Nuwe, ka kulumela zeo, aba wa tumelo yefitelezi.

<sup>144</sup> Mi batu ba kacenu baba lumela mwa kolobezo ya Moya o Kenile. Cwale, keleke ili, “Batu ba ki bafitelezi ba tumelo. Ha ki sesiñwi kono ki sikuwa sa baikangabeki, ba maikuto, batu baba ipulaisa mabote mwa kueza lika.” Kono kanti ha ba zibi kuli Linzwi la Mulimu li luta ona cwalo. Ki sepiso.

<sup>145</sup> Mi, ku Nuwe, hakuna taba kamba ne ba bulezi cwani, “Muuna muhulu na iketile hande mwa munahano wa hae; kuli na fosize kuya ka sayansi; mi—mi—mi, ka ngana, na fosize.” Kono, ku Nuwe, neli Linzwi la Mulena, mi Nuwe apila ni lona. Kanti baba talifile ni ba ngana inge ba sitatala ka bunolo bwa lona, mi ba latehelwa ki buino bwa bona. Ha ki—ki—ki kalimelo ni yeo cwale, i cwalo, kwa lusika lwani!

<sup>146</sup> Batu babañata ba bulela kuli, “Kambe Ne ni pila kwa mulaho kwani!” Batili, no ka ba wa mukwa o swana. Kakuli, kacenu, mwa mukwa o swana luli osweli kubonahala kacenu,

fela ki mwa mufuta usili, ba sitatala ku Lona kacenu inge fela mo ne ba ezeza ka nako yani.

<sup>147</sup> Hakuna kukakanya, mwa mazazi ani, nebana ni bakutazi babañata, kono Nuwe na susumelizwe ki Mulimu. Mi Nuwe na talimela kwande ni kubona se ne si libelela kuezahala, ni kuziba kuli lusika lwa babuki ni lo lu lunya, sina lwani, kuli Mulimu nasike ku lu tuhela kupila. Konakuli ki sikamañi se lukona kueza, kacenu, kono kwanda kubona lika zeswana! Yona Sodoma ni Gomora za kacenu, mwabona, lunya, batu ba bubuki, baba ile hahulu fa pata mwa likolo kuli mane ba sitatala fa lika zebunolo za ponahalo ya Mulimu ka kubonahalisa kwa Sibupeho sa Hae ni Linzwi la Hae, kubonisa Linzwi la Hae.

<sup>148</sup> Hakuna mutu mwa lifasi, Rosella, kuli, kamba, ufi—ufi yakona kubulela cwana kuli—kuli haluboni mwahala luna Linzwi luli la Mulimu le liiponahaza. Yona sepiso ya mazazi a maungulo, ona Maseli a manzibwana luli ana lukela kubenya, lu batu babana ni litohonolo ka kubona sani. Mi, koo, lifasi la baituti babatuna hahulu, li patilwe ku bona. Jesu naize ku Mulimu, Ndate, Naize kuli, “Ki mo U latezi kuli ulipate ku bona. Mane ki fo, Ndate, U li ezize.” Uba tuhezi, ni butali bwa bona . . .

<sup>149</sup> Mwa bona, neli butali bone butisize butata mwa kutampakana kwa sibi, kwa simuluho; kakuli Eva na bata butali ha kopana ni Satani, mi Satani amufa bona, mwabona. Mi butali bwa lwanisana ni Linzwi. Ha lu kupiwi kuli lube ni butali. Lu kupiwa kuba ni tumelo ku ze bulezwi kale. Kacwalo, mwabona? Kono, kacenu, baituti ba Li kabisa hande mwa nzila ye cwalo, ni ku Li beya fahule nyana cwalo, ba beya toloko yabona fela ku Lona, kamita baeza cwalo. Ba eza lika zeswana ni kacenu; li mwa siyemo se si swana. Cwale, sicaba, kono haili . . .

<sup>150</sup> Kamba, ne ba li mbwinjize, inge fela mo ba li mbwinjeza ni kueza cwalo kacenu. Kinto yeswana. Baeza lika zeswana. Kakuli, bona . . . Kakuli libaka le ba li mbwinjelize, kakuli nebali baba butali hahulu kuli ba li lumele. Mwabona? Cwale, liñusa nelili bunolo hahulu, kuli baba butali neli baba talifile hahulu kuli balumele bunolo bwa liñusa. Oh, mawi! Mulimu na li ezize kuba leli bunolo hahulu, mwa Niti, kuli baba talifile ni baba itutile ba tokwa kulibona, kakuli nelili bunolo hahulu. Kihande, sani kona se si panga butuna bwa Mulimu kuba bobutuna hahulu; kakuli, kakuba yomutuna hahulu, ukonile kuikeza Iliyena ya bunolo.

<sup>151</sup> Batu kacenu, ka kubonisa kuli ha ki ba Mulimu, ki babatuna mi balika kuba babatuna ni kufita, ni kuikeza ilibona kuba babatuna, ni, “Bishopu Yomutuna, Dokota Popu Yakenile,” lika kaufela, baikeza ilibona kuba nto yeñwi ye ba si yona luli. Mi Mulimu, kakuba yomutuna hahulu, uitisa Iliyenafafasi ali ya bunolo. Bunolo kona butuna.

<sup>152</sup> Lwakona ku panga fulai ya jeti, lwakona kuluma fulai ye lubilo hahulu kwa...kwa...kamba kubeya bomba ya mi—mi—mi missile mwa nzila ya lizazi ni kweli. Mi mane lwakona kueza lika zeo kaufela, kono niteni, halukoni kupanga nihaiba kacwani kalikamu. Uh-huh. Amen. Kucwani he ka seo? Kono kufita kulika kukuta ni kubona se si panga bucwani bwani, ni kuamuhela yena Mulimu ya swana yana bupile bucwani bobu swana, lu lika kupanga missile yeka fita kwani kapili kufita mutu ufi kaufela mwakona ku pangela iliñwi. Mwabona?

<sup>153</sup> Luna ni butali hahulu lu talifile, mwa likeleke zaluna, kufitela lukona kuyaha muyaho ofeza ma dollar aesa milioni, kamba muyaho ofeza mali akuma fa ma dollar a ma milioni a lishumi, kono, niteni, ni kulika kuyaha omunde kufita wa ba Methodist, kamba ba Baptist ba yahe omunde kufita wa ba Presbyterian, ni ba Pentekota ni bona bakena mwa takano ya lipeba. Kono taba yateni ki kuli, ki ye; ki luna, ibo, luna ni butali hahulu ni kusepa linzila za luna kufitela lupalelwa kuikokobeza ili luna kuli lu lemuha Mulimu yali mwa tumo kokuñwi mwa lilulu. Mwabona? Yeo ki niti. Kihande, foo, lwa sitatala ku ze bunolo. Ba ezize cwalo kamita.

<sup>154</sup> Cwale, bona, bona nebali—nebali ni butali hahulu kuli ba lumele liñusa leli bunolo cwalo lani. Ne li sika kambama hahulu kwa lipatisiso za bona za sayansi zene banani. Nesi—nesi la bunangu, liñusa ne li si lelituna kulikana, ni tukiso ya lituto za bona zene banani mwa lizazi lani. Mwabona? Neba balile kuziba kuli nekuna ni Mulimu, mi ne ba balile ni kuziba kuli Nali yomutuna, mi balika kuicaha ilibona ka butuna kuya ku Yena. Mi kanti, nzila yekambama ki kushetumuka.

<sup>155</sup> Cwale, ki mañi ya ziba haiba Neku la Mutulo kona kwa Mutulo, kamba Neku la Mboela ki Mutulo; kamba Neku la Mutulo ki kwa Mboela, Neku la Mboela ibe Mutulo? Ki kai ko kuli fahalimu ni ko kulifafasi? Lu nyendaela mwa mbyumbiyulu. Lu li, “Neku la Mutulo li fa halimu.” Kana muziba cwani? Neku la Mboela lakona kuba Mutulo. Mwabona, ha mu zibi. Kacwalo ha lu hupuleni, mi Linzwi le...

<sup>156</sup> Muli, “Mi cwale ukona kubulela cwani, Muzwale Branham, kuli, ‘Fahalimu kifafasi?’”

<sup>157</sup> Ki kuya ka Linzwi la Jesu Kreste! Na bulezzi kuli, “Ya ikokobeza iliyena uka bubekwa, kono ya inuneka iliyena uka kokobezwa, a kutiswe mwatasi.” Kacwalo he, kaniti, fahalimu kifafasi, mifafasi ki fahalimu.

<sup>158</sup> Sina muhalalehi wa kale hana bulezzi kwa Chicago, kuli... Muuna, mukutazi yomuñwi yana zwa kwa kopano yeñwi, na yemi fapila Mapentekota. Nanani zelukela kupaka zibo kaufela hamoho. Ayema kwani mi aitusisa manzwi ene ba sa zibi Mapentekota ni hanyinyani, mi aya kwapili kwani, mi a bona kuli ne li sa zamaeleli ni sicaba sa Mapentekota. Mi ki ha

yema, inza tundulezi ni sifuba fande, mi neli “Dokota Yakenile *Wakuli-ni-kuli*,” mwa ziba, yana zwa kwa sikolo sesituna sa *kuli-kuli* kwani mwa Chicago. Mi ki ha talima kafa ni kafa, mi ni Mapentekota bani ne basweli fela kutalimana talimana. Mane ne ba sa zibi sa na sweli kubulela fateni; na li ya itutile hahulu, ya talifile luli, ya bunango. Ne ba sa zibi.

<sup>159</sup> Neli nto yeswana sina muyemeli wa tolopo cwalo, kamba muuna yana tukufalelwa za bueteleli bwa naha mi u luzize. Tuck Coots ki yena yana ni bulelela. Hane Ni kutaza kwa maswabi a Mama Ford, mi ne ni sweli kubulela ka za zuho, sepo ya zuho, “Inge fela ona mo li pazulelanga lizazi, kona mo Ni ka zuhela ni na. Ona mo bu shwela bucwaní mwa nako ya Maliha, mi ni litali liwa kuzwa kwa kota, la kuta hape. Fo lifasi ha liba hande inge li potoloha mwa nzila ya lona, lina ni kupazula hape.”

<sup>160</sup> Tuck ali, “Ni itumezi kwa Liñusa lani, Billy.” Muzwale Neville ni Na neluinzi hamoho mwa mota. Mi se Nili, “Tuck . . .” Yena ali, “Na itumela kwa Mañusa a hao.”

Se nili, “Tuck, Na hani sika ituta,” Na bulela.

Yena ali, “Seo kona siemba sesinde ka zona.” Mwabona?

<sup>161</sup> Mi, cwale, na bulezi kuli nailo bona . . . Kihande, Ni sepa kuli muuna yani ani swalele, Ha ni talusi . . . Adlai Stevenson, mwa ziba. Mi abulela kuli na mu utwile ka mizuzu ye lishumi ni ye ketalizoho. Mi Bo Stevenson ki babuleli baba na ni ngana hahulu, ba lukela kuba cwalo, mwa ziba, kufitela Tuck . . . Ni sepa kuli una ni tuto kuyofita kwa koleji. Abulela kuli nainzi fani mane alobala. Mi abulela kuli a lobala, inza mu teezeza, mwa mizuzu ye lishumi ni ye ketalizoho. Kono ali, “Ni tuto ya kwa koleji, Ne ni si ka utwisisa kwanda manzwi alikani fela ana bulezi; ne bali baba itutile hahulu.” Mi ali, “Ha u si ka ni bona fateni kulobala mwa lisebelezo za hao, nji uniboni fateni, Muzwale Branham?”

<sup>162</sup> Kacwalo, mwabona, ki bunolo bwa Lona, ki bunolo fela, fani kona fo kufumaneha Mulimu.

<sup>163</sup> Cwale, nebali ba—nebali ba babutali hahulu, mwa lizazi lani, kuli ba lemuha nzila ya Mulimu ya kueza lika ka bunolo. Ne li si ka ba ni bunango ku bona. Lina ni kuba ni bunango, Lina ni ku lungiwa hahulu zende, kusi cwalo ba li mbwinja. Cwale, kono, Jehova yomutuna na patilwe mwa Linzwi la Hae. Mi A itibahaza kwa sicaba sene si lumela mwa Linzwi la Hae, ka kuba pilisa, ni kutisa patalaza liñusa le li bunolo. Liñusa le libunolo la Nuwe, Mulimu na li tisize la to ezahala. Cwale mulemuhe zeo.

<sup>164</sup> Cwale, he, hape mwa lizazi la Mushe, mulemuhe nako yeñwi ya kupiliswa.

<sup>165</sup> Mulimu haiba sali bukaufi ni kueza sika kuli alamulele sicaba sa Hae, Mulimu ulumanga Liñusa kwa sicaba. Mi, Libanga leli bunolo hahulu, inge mo lu ka bonela mwa

kukwaluha kwa Maswayo aa. Kona libaka ha ni tisize le pili. Kuli, lufumana kuli kukwaluha kwa Maswayo ani ku bunolo hahulu, ba—ba—ba babutali ba Li mbwinja, ka limaili ze milioni kafoo. Mwabona? Ni sepa kuli Mulimu a ni toze ka Lona. Mwabona? Mwabona? Li fitanga fela fa litoho. Mi leo kona libaka ha Ni hupuzi kuli Liñusa le, kakusasana cwana, lika swanelia, kuli litome mutomo, fa bunolo bwa Mulimu, mwabona, ka mo Mulimu aipatelanga Iliyena mwa bunolo.

<sup>166</sup> Munahane fela, bakona ku kwalula tutowati ni kueza lika zeñwi kaufela; kono ha li fita kwa kuswala bupilo, habakoni neba kubulela ko buzwelela. Katali kakalikani fela ka bucwanii, mi Mulimu umwahala kona. Bakona kuluma fulai ya lubilo lo lutuha kwa kweli, mi—mi ni kukunupa siiponi fateni, kamba sika kaufela, kono niteni habakoni kutatulula bupilo bo bu mwa litali la bucwanii. Yeo ki niti. Mwabona? Kakuli halikoni ku tolokiwa. Ki ze bunolo hahulu, haba li isezi ngana zeo.

<sup>167</sup> Cwale mulemuhe Mushe, ka lizazi leo Mulimu na ka lamulela bana ba Isilaele, kuya ka Linzwi la Hae. Yena, ki sikamañi sa Na ezize? Na ketile lubasi lo lu bunolo. Haluna pihoo ya bona. Mwabona, baha “mwana Levi fela wa mushimani,” kona ze luziba kihona. Mwabona? Mi kacwalo lwa . . . ni musala hae. Ba basina mayemo asabisa, mwendi ikona—kuba balubi ba sileze, sina lifasi mo likona ku nahanelia, kwande baba foloma masitina a sila. Nali fela mutanga yana sina mayemo a sabisa mwa Isilaele, kono Mulimu akena mwa lubasi lwani kuli ka lona kutahemulamuleli; neli lubasi lo lusina mayemo amatuna lwa Sijuda. Na si ka yonga wa lusika lwa silena ni muika cwaloo, kamba nto yeñwi, kamba nihaiba kunga muprisita yomuñwi. Anga fela yasina kabubo, lubasi lo lusina mayemo sakata. Mwabona? Bunolo! Mulemuhe sa Na ezize, nako yani, Apepa mwana, mutu wa butu butu fela. Na si ka . . .

<sup>168</sup> Na ka—Na ka keta lizazi, haiba Na ka lata cwaloo, kuli aba lamulele. Na ka keta moyaa kuli u ba lamulele. Na ka keta Lingeloi ku ba lamulela. Oh, haleluya! Mulimu wakona kueza kaufela Sa bata kueza.

“Kihande, cwale uziba cwani he, Muzwale Branham?”

<sup>169</sup> Mulimu hana kutuhela tukiso ya Hae. Ki kabakaleo lwa ziba cwaloo, lizazi le, Lina ni kuba leli bunolo. Mwabona? Cwale, Yena kamita ubulela mwa bunolo. Kono Mulimu, kwa simuluho, yana ka eza lizazi kuli likutaze Evangelii, kamba moyaa kuli ukutaze Evangelii, kamba Lingeloi kukutaza Evangelii, kono Na ketile baana kueza mulelo woo, mi Yena ha cinci. Ali kuba atome kuli mwa . . . Na si ka keta likopano. Na si ka ongaonga likwata za batu. Na ketile batu kuli ba kutaze Evangelii; isiñi lipangaliko, lipangaliko za malaiti, kamba sika kaufela sa Libupiwa za Mangeloi. Neli mutu!

<sup>170</sup> Mi cwale Amano tisa tukuluho kwa sicaba kwani, Na lumile mutu ya bunolo, yana pepilwe mwa lubasi lolu bunolo mwahala sikwata sa batanga. Oh, mawi! Ha ki Mulimu ni yo ka Mwa inezi, inza ipatulula Iliyena mwa bunolo!

<sup>171</sup> Cwale mulemuhe. Mi Na mulutile kuya ka butali bwa lifasi, ili kuli a palelwe, ni kubonisa kuli ha ki butali bo luka lamulelwa ka bona. Ki ka tumelo ha lu lamulelwa. Na mu tuhelezi kukena ku zona ni kuba ni tuto yecwalo kufita mane a kona kuluta Maegepita butali; nali ya butali hahulu. Mulimu nali ni lubasi lwani Io lu bunolo ili bao, mwendi, mane ne ba sa koni nihaiba kuñiola mabizo a bona. Mi Mushe na kenyizwe mwa sikolo se si pahami hahulu ku zeneli teni, ka tuto yetuna cwalo yani, kufitela mane aluta butali bwani kwa baluti. Na lutile licaziba. Eeni. Mi Mulimu amu lumeleza kuya ka nzila yani ili kuli Aipatulule ka kuishuwa, kubonisa kuli butali habuna sa kueza ni zona. Mi Mushe a palelwa habutuku mwa butali bwa hae. Na mutuhelezi kuli aye ka nzila yani ka mulelo wa Hae, kuli a palelwe. Mi a palelwa, mane na palezwi.

<sup>172</sup> Kacwalo, ku bonisa kuli, "Ha ki ka mata, ha ki ka bundume," kono ha ki butali bwa Eggepita, isiñi ka butali bwa likolo za luna, isiñi ka mata a likolo zaluna za bulapeli, kono ha ki ka butuna bwa kopano ya luna, ha ki ka tuto ya likolo za luna, "kono ka Moya wa Ka, kubulela Mulimu." Butali bwa Hae ne bufitile kwa mafelelezo, mi hana kopani ni Mulimu mwa sicacani sa mulilo kwani. A tubula makatulo a hae ni kuikokobeza ili yena ka kuishuwa, ni kulibala za butali bwa hae boo.

<sup>173</sup> Mulimu, ka kutisa tukuluho, nana ni ku muluta mwa butali, kuli awe, kubonisa kuli hamukoni kusepa butali bwa mina, kamba kutwisiso ya mutu ufi kaufela. Kumuhuhula kuli awe, kuli abonise lizoho la Hae. Kana mwa li bona? [Kopano ili, "Amen."—Mu.] Mulelo wa Mulimu wa kueza cwalo, neli kuiponahaza Iliyena mwa buishuwi. Mi A lumeleza Mushe kuba yomutuna hahulu, kufitela aba yakona—aba yakona kutatama ku faro. Nali ndwalume yamata luli. Kuya ka litaba za kale, na komile, Mushe yena kasibili, linaha za fakaufi. Mi cwale hana sikuluhezi kwa musebezi wa Mulena, ni talenta ya hae kaufela, Mulimu na mu lumelelize kuba ni kuwa, ili kuli A muise kwande kwa lihalupa kwani ni kuzusa zani kaufela ku yena; mi hape ni kubonahala ku yena, mwa kuishuwa, ni kuluma kwateni ni kota mwa lizoho la hae, ku yo lamulela sicaba.

<sup>174</sup> Mi, na si ka eza ka lituto za busole bwa hae, kuya ka tuto, ka tuto ya za sayansi. Ni ka mata a za busole apaelwa ku li kondisa. Mi Amufa kota ye sikami sikami yezwa mwa lihalupa, mi Akona ka yena. Mulimu mwa kuishuwa, mwa bunolo! Mulimu nali mwa kota ni ku Mushe. Mi haibile fela Mushe nana ni kota, kona kuli ki Mulimu yana isweli, kakuli Mulimu nali ku Mushe. Luli.

<sup>175</sup> Mulemuhe, “Ha ki ka mata, kamba kuba—kuba ka bundume, kono ki ka Moya wa Ka.” Kono ka tumelo yebunolo!

<sup>176</sup> Mushe nana ni kutwisiso kuli na lukela kuba mulamuleli, ka lituto zezwa ku bomuhe. Mi aituta za mata a busole, kuli aeze cwalo, kono kwa pala. Mwabona? Nana ni kutwisiso, nana ni tuto, kono zani ne li sika beleka. Kacwalo aba ni ku libala lika zeo kaufela, mi ataha kwa nto yebunolo ya kunga Mulimu ka Linzwi la Hae, mane a yo lamulela sicaba. Eeni, sha.

<sup>177</sup> Mulimu ulamulelanga ka (sikamañi?) tumelo mwa Linzwi la Hae. Kamita ubile cwalo. Nelu ka talima fateni kambe luna ni nako. Luna ni mizuzu ye mashumi amabeli ye siyezi cwalo. Lu nani . . .

<sup>178</sup> Nelukona kunga ka—ka kutalima nyana ku Kaine ni Abele, kuli mane—mane Kaine na likile kutabisa Mulimu ka bunde.

<sup>179</sup> Nzila yeñwi, sicaba si nahana kuli, “Ka—ka butuna, likopano ze kabisizwe hande, ka muprisita ni—ni . . . bakutazi ba mikanjo, ni baopeli ba mikanjo, hamoho ni—ni ze tiniwa zani, ze tabisa Mulimu.” Kana mwabona ko li zwelezi? Kaine na likile lika zeswana. Mi a mu yahela aletare, hakuna kukakanya kuli na iyahile ka bunde.

<sup>180</sup> Mi muuna wateni na ikolwisisa kusina kuzwafa. A lapela. Mi a hupula kuli, “Haibile fela Na kolwa cwalo, hakuna shutano ni yekana.” Kuna ni shutano. Mwakona kuba baba ikolwisisa luli kono ka mafosisa.

<sup>181</sup> Mulemuhe, na—na yahile aletare ye mi ki ha, eza zeñata, abeya lipalisa ni ku li kabisa, mi abeya miselo yeminde, mi ahupula kuli, “Luli, yena, yakenile, yasina litiba, Mulimu yomunde uka amuhela sitabelo se.” Kono, mwabona, na liezize ka butali bwa hae fela. Na li ezize ka mihipulo ya hae fela.

<sup>182</sup> Mi cwalo kona mo kuinezi ni kacenu. Na—na . . . Ba li eza ka butali bwa bona fela, ka sikolo sa bona, ka tuto ya bona ni lika ze ba itutile za bupilo bo.

<sup>183</sup> “Kono Abele, ka sinulo, ka tumelo, afa ku Mulimu sitabelo se si kateleha luli.” Hakuna ze ne kenile ka sona, kuya ka mo ne si bonahalela, kubulela ka ngana ya butu. Mutu wa mwanana yani, mi aiswala fa mumizo ni ku itateza mutai, sina *cwalo*, ni ku ihohela kwa aletare ye. Nekusina sika sesinde ka yona. Ayo ibeya fa aletare, ni ku puma mumizo wa yona ka—ka licwe le li buhali, konji mali a muhasaka fa mubili kaufela, ni yona ya lila, inze ishwa. Neli pono ye sabisa, mwabona, kubona cwalo. Nekuli bunolo, niteñi.

<sup>184</sup> Mwa bunolo, na zibile kuli na pepilwe ka mali a bondatahe, na pepilwe ka mali a bomuhe, ka mali a bondatahe; mi neli mali ana tisize kuwa, konakuli neli ana ka litakula fateni. “Kacwalo afa Mulimu sitabelo se si kateleha hahulu, kakuli ne si patuluzwi ku yena.”

<sup>185</sup> Mi babañwi ba mizwale, kacenu, baba nahana kuli ne ba cile ma apule ni litolwana zeñwi! Mi Ne ni boni nto yeñwi ye icemezi luli zazi leliñwi, mwa pampili. Neba bulezi kuli, "Cwale neba toloka kuli ne si apule yana—yana cile Eva." Kuti, Ni—Ni sepa ba bulela kuli, "Ne li tolwana ya apulikoti." Kacwalo, oh, mwabona ko ku zwelela moyo wani!

<sup>186</sup> Mi ba bulela, kuli, "Mushe na si ka sila Liwate Lelifubelu. Kuti, neli fela li—li bunda la mataka kwani, liwate la mataka. Mi akenya bana ba Isilaele mwa liwate la mataka. Kwani kwa mafelelezo a—a liwate, kuna ni mataka a nuka amañata hahulu kwani. Mi Mushe asila liwate, kono neli liwate la mataka a nuka la na silile; mwa ziba, bucwani, bo butelele, inge mamenge ni lika zeñwi, kuti kona mo ne ba silile mo ku cwalo." Ha ki bukuba ni boo!

<sup>187</sup> Kanti, "Mezi," Bibele ibulela kuli, "na ikabile kuzwa kwa silyo kuya kwa nzohoto, mi Mulimu aeza kuli—kuli moyo omutuna wa kwa upa u a kauhanye." Mwabona? Mwabona?

<sup>188</sup> Bona, ba bata kulika kuli akalezanga ka mukwa wa bona. Mi yani kona nzila ye ba palezwi ka yona kamita, mi bakana ba palelwa ona cwalo. Mwa ziba, ona lika ze kaufela!

<sup>189</sup> Mi Kaine nali mufuta luli wa mutu yana ni ngana ya butu fela wa kacenu, yali wa bulapeli fela kwande. Ubata kueza sika sesiñwi kwande, kono yena u . . . Uya kwa keleke, mi—mi uka eza lika zeñata kwa—kwa muyaho.

Kuna ni fela Keleke iliñwi, mi ha muikopanyi ku Yona.

<sup>190</sup> Ze ki libaka za malobalo. Mwabona? Muikopanya kwa malobalo a ba Methodist, malobalo aba Baptist, malobalo aba Presbyterian, malobalo aba Pentekota.

Kono mupepwa mwa Keleke. Eeni, sha. Mwabona?

<sup>191</sup> Ze kaufela ki mandu a malobalo. Ha ki likeleke. Ki malobalo. Mi hakuna sika sakuli Methodist ki "keleke," kamba Pentekota ki "keleke." Batili, hakuna nto ye cwalo. Batili, zeo kaufela ki mafosisa. Mwabona? Ki cona . . . Yeo ki niti. Zona, ki malobalo mo ba ikopanya fela batu.

<sup>192</sup> Kono mu pepwa mwa Keleke ya Mulimu yapila, mi wani kona Mubili wa kunutu wa Jesu Kreste osweli kubupiwa.

<sup>193</sup> Cwale, kono, ne si tabisize Mulimu kuli apatulule kunutu ya Hae ku Abele, ka tumelo ye bunolo mwa mali a suluhile. Oh, Ni lakaza kuli kambe Ni na ni nako yeñata nyana. Mwabona?

<sup>194</sup> Ibo, ni Kaine, ni butali bwa hae kaufela, muuna ya butali! "Oh," mu li, "cwale, Muzwale Branham, ubulezi kuli na . . . Ulika ku mueza kuba ya itutile hahulu?" Nali cwalo. Nali ya butali . . . Mulatelele mu—mulatelele mukwa wa hae. Mutualimele fa bana ba hae. Mañi ni mañi wa bona neli wa sayansi, ni madokota, ni baana baba talifile mukwazo, mañi ni mañi.

<sup>195</sup> Kono, mu latelele lusika lwa Seta, nebali baba ishuwile, linjimi fela, ni balimi, ni zeñwi cwalo, ku yo punya ni kwa sinyeho.

<sup>196</sup> Kono bana ba Kaine ne ba talifile, sikwata sa linangu. Bona mane, neba bulela kuli, neba lafa butale, mi neba tula lisipi; ni bayahi. Mi neli batu baba butali.

<sup>197</sup> Kanti—kanti, batu babañwi bani bona ne ba pila mwa litende, ni kulisa lingu za bona, ni kutiyela fela fa lisepiso za Mulimu. Mwabona? Mwabona? Mwabona seo nesili sona? Cwale mulatelele fela masika ku ashetumuna cwalo, mi mubone haiba yeo ha ki niti. Mwabona? Ne ba tiyezi fa lisepiso za Mulimu.

<sup>198</sup> Cwalo kona Nuwe mwa na ketezwi, kuzwa kwa mufuta wa batu baba cwalo bani. Kona ni Paulusi mwa na ketezwi mwa mutapi wa habo. Mwabona? Kona ni, John Wesley, Martin Luther, ni mañi kaufela. Kona mo mutezi kutoba yo muli yena kacenu, mwabona, ki nto yeswana, kuikokobeza, ku lumela sepiso ya Mulimu ye bunolo.

<sup>199</sup> Cwale, mulemuhe, ne si tabisize Mulimu ku—ku zibahalisa. Cwale, Mulimu kamita ukana a paka haiba ki Niti kamba nee. Mwabona? Cwale, batu babañata ba kalika kuikeza ili bona kuba mwa lika zeo Mulimu abulela lika zeshutana ka limaili ze milioni kwahule ni zona. Yeo ki niti. Kono ha mubona Mulimu inza kuta hape, abulela Sika . . . u Si bulela, kuli, “Yeo ki niti, Yeo ki niti, Yeo ki niti,” kona kuli muka ziba kuli Ki sa niti.

<sup>200</sup> Cwale, litabelo hanelili fa aletare, Mulimu ahana maikuto a mutu ka za Mulimu. Kono ha Na boni Abele, ka tumelo ye bunolo kulumela kuli ne si ma apule kamba miselo ya mwa simu, kono neli mali; ka tumelo a lumela cwalo, ka sinulo yezwa ku Mulimu. Mulimu na pakile Adama ka sitabelo sa hae. Mwabona?

<sup>201</sup> Foo kona fo lunahana za kulapelela bakuli, sika sifi kaufela. Jesu naize, “Ha muina ku Na, ni Manzwi a Ka aina ku mina, mukupe kaufela se mu lakaza mi si ka ezwu ku mina.”

<sup>202</sup> Cwale lwa taha lu shetumukafafasi, kapili cwale, luna ni mizuzu ye mashumi amabeli ye siyezi.

<sup>203</sup> Mulemuhe, lizazi la Elia, Mulimu na ketile kuipata Iliyena ku mutu ya bunolo. Cwale munahane fela ka zona. Mulimu na ketile. Yani neli keto ya Hae. Muhupule, nebana ni baluti, baprisita. Neba na ni baana babatuna mwa mazazi ani. Niheba Mulena Akabe, kasibili, nali Mujuda. Nana ni baana babatuna mwa naha, mwa lizazi lani. Kono Mulimu aipata Iliyena ku mutu ya bunolo; isiñi muituti; batili, isiñi muuna wa kabubo wa lifasi, mutu yomuñwi muika wa za busole kamba nto yeñwi; batili, nekusina libizo lelituna. Mane haluzibi kuli ndatahe ni mahe neli mañi. Hakuna se lu ziba ka lusika lwa hae. Neli mulimi wa kale fela kokuñwi kihona, yani na tezi musebezi wa kuba mupolofita. Mulimu na mutuhezi inza ipilela fela anosi mwa lihalaupa. Kona fela nto ye luziba, na shokomokile fela ko ku

sa zibahali, ataha mwahala bona ni ku nyaza mulao wa bulapeli bwa bona kaufela. Mawi!

<sup>204</sup> Mi kana mwa ziba zene ba hupula ka yena? “Ki sikolo sifi kwa zwelela?” Mwabona? “Ki kopano ifi ya fumaneha ku yona? Kana ufumaneha kwa Bafarisi nji, naa ki Basaduki,” kamba ki likamañi zene ba nani hape? Na siyo ku ifi ya zona kaufela, kono na nyazize lika kaufela. Mwabona? Mulimu na ketile kueza cwalo.

<sup>205</sup> Kono, mutu ya bunolo, yasina tuto. Haluna sibaka se si paka kuli kona sikolo kwa na kenezi. Hakuna se lunani ka yena. Ki mutu fela ya bunolo, kono Mulimu na latile kuipata ku mutu ya bunolo cwalo yani. Mulimu, kwa mulaho kwani, ni yena muuna ya bunolo yo, inza ipatile ku mutu. Kana mwa utwa? [Kopano ili, “Amen.”—Mu.]

<sup>206</sup> Mulimu kuipata ku “muicemeli ya si ka ituta,” kwa lifasi. Kakuli, mwa ziba, neba—neba mu tameleza lika zeñata, mane niheba kuba “muloi,” Elia. Bapolofita kaufela ba tamelezwangwa, cwalo, mwabona.

<sup>207</sup> Kacwalo, Jesu na tamelezwa kuba ya cwalo, mwa bona, “Baalezebubi; kuli wa pulumuka.” Ali, “Kiñi, u pulumukile. Eehe, luziba kuli una ni dimona. Wena—wena u lyangani mwa toho.” Mwabona?

<sup>208</sup> Kwani kona kwa Na ba bulelezi, “Hane Li nako ya mafelelezo, kuli ba nye-...sani ne sikaba bonyefuli, ka kueza cwalo.” A ba swalela, kono halina kuswalelwa mwa mazazi a mafelelezo aa. Li lukela kuba ni tifo, ka kauhano ya Kuyakuile, “Halina ku swalelwa, mwa lifasi le kamba lifasi le li taha.”

<sup>209</sup> Kono Elia na talimwa kuba muuna ya lyangani. Kana mwakona kunahana kuli inza yemi fa...Ba—ba basali neba sweli kukuta milili ya bona inge mazazi a cwale, Na sepa, ni kuipenta sina Jezabele, musala mueteleli wa mwa naha. Mi—mi bakutazi kaufela ne se ba keni fela ku za lifasi ni lika kaufela. Mi kipeto ki sikamañi sene si ezahalile? Ki ha sekutaha Elia muuna muhulu, yanatilo nyaza lika zani kaufela, kukalela ku Jezabele kushetumukafafasi.

<sup>210</sup> “Kiñi,” ba hupula kuli, “halu lukeli kuteeleza ku wena! Luna ni balisana.”

<sup>211</sup> Luli, neba sa lukeli kuba cwalo, kono nali mulisana wa bona nihakuli cwalo. Nali mulisana wa Jezabele. Na sa lati cwalo. Hakulata nana ni lika ze shutana mwa mufuta wa zona. Kono, kono, ya lumilwe ki Mulimu, neli yena. Mwabona? Nali mulisana ya lumilwe ki Mulimu ku yena. Na mu toile, kono nali mulisana wa hae ni hakuli cwalo. Mulemuhe.

<sup>212</sup> Mi Elia aikokobeza iliyena mane apila ni sa na mu bulelezi Mulimu kuli abulele, mi ka nzila yeo, sa tabisa Mulimu kuli ange ona Moya oswana wani ku Elia ni kusepisa ku U tisa halalu

mwahala musipili kuzwa fani. Mwabona? Amen. Mi A eza cwalo. Amen. Luli, Na ezize. Luli. Na sepisize Cwalo, kuli ne U ka taha. Mi Wa taha ku Elisha, yena yana muyolile; mi wataha hape ni ku Joani Mukolobezi; mi, kuya ka Malaki 4, U lukela kuba fa mwa lizazi la maungulo. Mwabona?

<sup>213</sup> Mulimu na latile Moya onoli ku mutu ya bunolo yani, ya si ka ituta muuna wa mishitu yana zwelela mwa mushitu mwani kokuñwi. Mi, kacwalo, Ne uli ona ni likute hahulu kwa Linzwi la Hae, kuli Na bulela kuli, “Elia, eza *cwana*,” ni Elia ueza ona cwalo. Mi Mulimu naipatile Iliyena mwateni, mwa bunolo bo bu cwalo!

<sup>214</sup> Kaufela bona ne ba mu bulelezi kuli, “Yena muumbulu wa kale yo, usike waba ni sa kueza ni yena,” ni zeñwi cwalo.

<sup>215</sup> Kono zazi leliñwi, hana—hana sa supezi, ni toho ya hae yaba fela sitenda, mi ni—mi ni mahaha a hae inge a lepelela, limbi twaa, ni milili nyana yana nani inge ilepelela fa maheta a hae; mazoho abonahala busisan ya otelezi cwalo, ni nama inge ilepelela ku ona cwalo; ataha inza zamaya mwa nzila mwani kuya kwa Samaria, ni meto ani inza talima mwahalimu kwa malu, ni kota yesikami sikami mwa lizoho la hae. Nasi ya buheha kuli na ka talimwa, kono nasweli za kuli “KISONA SA BULELA MULENA” ya lizazi lani. Na si ka ba ni sikukuma ka Lona. Na si ka kaña kaña. Na si ka bulela kuli, “Cwale, Akabe *yomutuna*.” Na ile kwateni mi ali, “Mane hakuna nihaiba puka ye ka wa kwa lihalimu haisi ha Ni ka ibiza.” Haleluya! Mwabona? Mulimu na kutekile bunolo bwa hae.

<sup>216</sup> Cwale, mwa bona, hane lili cwalo mwa nzila yebunolo, mane mañi ni mañi—mañi ni mañi na mu lwanisa, mañi ni mañi nabata fela ku mu kama mwa kañoto. Tutengo twa bakutazi kaufela, lika zeñwi kaufela, neli mu yemela fa kañoto, yeo ki niti, kulika kuli ba mu kuzise ni lika kaufela. Kono, mwahala bunolo bwani, nihane ba sina kutwano ni mikopano ya hae ni zana nani kaufela. Mutu kaufela na hupula kuli nali silyangu. Mulimu naipata Iliyena mwateni.

<sup>217</sup> Kono hane se ili nako yakuli peu yani ibuzwe, yene cezwi, Mulimu a iponahaza Iliyena ka kuluma Mulilo kuzwa kwa Lihalimu ni ku to omisa sitabelo. Mulimu uipata mwa bunolo, ni hape uipatulula Iliyena hape. Mwabona? Luli. Ne si tabisize Mulimu kueza cwalo. Na nza liezanga ona cwalo ka nzila yeswana. Eeni, sha. Cwale, lu fumana cwana kuli Na—Na sepisize lika ze.

<sup>218</sup> Butata kikuli, kacenu, mwahala buñata bwa luna luli batu, lu bata kubanga hahulu, mwa ziba, mwa mikopano ya bulumiwa-, ni ya likopano-, ni ngana yetezi lituto, kuli mane Mulimu ha sa itusisa luna. Mulimu wakona kufa mutu kukala kueza sika, ni ku mufa bulumiwa; taba yapili mwa ziba, ukaya kwa kulikanyisa ze ba bulela babañwi, mi, taba yapili mwa

ziba, uka swaseha mwa lika zetuna hahulu. Mi kipeto Mulimu uzusa fela fateni lizoho la Hae ku yena, ni kumusiya fela anosi. Mwabona? Mwabona?

<sup>219</sup> Mi kipeto Uka lika ku I pumanela mutu usili, yomuñwi yaka kona kueza lika. Mwabona? U na ni kufumana sika se si kaba ni—ni ya kanga Linzwi la Hae, yakanga sinulo ya Bumulimu mi asike a zukuzeha ni Yona, uka ina hande ona fa Limzwi lani. Cwalo kona mo kuinezi ka Mwa—Mwa ezezanga lika. Yena ubile aezanga cwalo kamita.

<sup>220</sup> Kacwalo he mutu haba ya itutile hahulu mi ya butali, kuli, ulika kubeya mwateni toloko ya hae. Kihande, sina moba bulelelanga kuli, “Kolobezo ya Moya o Kenile,” baka li, “oh, zeo neli za lizazi lisili.” Kono, haiba iba cwalo, kihande, “Ne si za lizazi lisili, kono, Ni ka mi bulelela, Ne isika taha inge mo ne I tezi ka Lizazi la Pentekota. Lwa amuhela Moya o Kenile ha lu lumela.” Mi—mi ni lika kaufela ze cwalo, mwa bona. Ni kubulela ka za kolobezo ya Libizo la Jesu Kreste, neba... koo Bibebe iluta ka yona ona cwalo; kihande, mu li, “Kihande, kono, sikolo sa za bulapeli sili! Mi Wakuli-ni-kuli ubulezi kuli!” Ko ki ku keshebisa. Mwabona? Mulimu hakoni kuitusisa mutu ya cwalo. Mwabona?

<sup>221</sup> Wakona kutuhela mutu inza natakiwa mwa naha kaufela ona cwalo, ni muuna wateni ya kendilwe ni ku sehiwa, ni ku boniwa bukuba, ni lika zeñwi kaufela ona cwalo. Kono cwale ha kutaha kangisano ya luli, Mulimu wa yema ni ku iponahaza Iliyena mwa bunolo bo buswana ona cwalo.

<sup>222</sup> Wa nanuha cwalo, inge palisa. Ki peu, kubonala mane inge kuli ku felile, ya shwa ni kuwela mwa mubu. Mukate peu yani kuipumbula, mi ibolile, mi ibonahala inge busafa. Kono kuzwa mwahala yona kutaha bupilo bobutisa palisa yemu hape.

<sup>223</sup> Mulimu mwa bunolo. Ueza lika zeswana. Nzila ye kambama ki kushetumuka, kamita. Muikokobeze ili mina. Musike mwa bulela kuli, “Kihande, Nina ni se ni sani.” Hakuna se munani. Fela—fela muhupule, haiba muna ni sishemo sa Mulimu, muitumele ka sona, mi muikokobeze ka sona. Mwabona, muzwelepili fela kuikokobeza ili mina.

<sup>224</sup> Cwale Ni lukela kuakufa, kakuli waci isweli... Hani lati ku mi inisa nako yetelele hahulu, kakuli Hani lati ku mi katalisa, mwabona. Luna ni nako yeñata mwahala biki.

<sup>225</sup> Cwale, mi cwale lufumana kuli batu babanga baba butali hahulu ni baba itutile.

<sup>226</sup> Cwale Ni bata ku mi bonisa nto yeñwi. Ye—yeñwi kwa neku leliñwi luli, bafetuha bafitelezi ba tumelo, baba lika kuba ba bulapeli. Cwale, luziba kuli luna ni sikhata sani. Mwabona? Baya kwa sibaka sisili.

<sup>227</sup> Fani kona fo Ni shutanela ni sikuwata sa mizwale ye zwile mo ha ki kale hahulu kuzwa mwa—mwa nzila ya Liseli. Bona, ne ba sa boni likezahalo ze ezahala kwanda kuli baikeze kuba sikuwata, kacwalo ba kopana kwa Canada mi—mi ba eza sikuwata sa batu kuli nebana ni kufiwa kuba baapositola ni bapolofita ku yomuñwi ni yomuñwi, ni lika zeo. Mi za wela mwahali. Mwabona? Mi kamita likana liba cwalo. Mwabona? Bafetuha... Ba ikutwa kuli bakeñisa kuli ba...ba habana...Ba nyaza hahulu lika zeñwi, mi—mi lika zeo, kufitela ba yo wela kwa neku leliñwi. Mwabona?

<sup>228</sup> Kuna ni neku lililiñwi la bunangu fela, kubata ni kusa iseza ngana, ba latula lika kaufela za mwateni. Mi babañwi baya kwa neku lisili, kwa neku leliñwi la sikuwata sa batu ba buicemeli ka maikuto, mi ba latula Linzwi.

<sup>229</sup> Kono haili Keleke ya niti ya inelela hande fahala mukwakwa. Cwale, haiba mulemuha, ki—ki—ki kuba ni zibo ya Bibele ka za bulezzi Mulimu, mi ki—ki za moyo hahulu kuli libe ni mufutumala mwa pilu, mi kanti ki nzila fela. Isaya na bulezzi kuli kukaba ona cwalo. Na ize kuli, “Ku kaba nzila...”

<sup>230</sup> Mi baba fuyozwi, baba kenile, balikani babande ba keleke ya Nazarene, muzamao nyana o likani o Mulimu na kalisize, kono ki sikamañi sene ba amuhezi? Mulimu ha kala kubulela ka malimi mwa keleke, neli ba bulapeli hahulu mane baba omelezi hahulu milala, kuli ba li biza kuli “ki diabulosi.” Mi mwabona sene si ezahalile ku bona? Mwabona? Mwabona? Bona, bona, “Ukeni kufita mo uinezi.” Mi—mi kacwalo lufumana kuli ona lika zani kaufela liya kwa peu mi za shwa hape. Mwabona? Mi ni—ni neku leliñwi.

<sup>231</sup> Cwale, siemba silisiñwi siba sa kufiteleza tumelo. Siemba sesiñwi siba se si bata ni sa milala ye omelezi.

Cwale Isaya na bulezzi kuli, “Kukaba nzila ye kambama...”

<sup>232</sup> Mi ba Nazarene, ni batu babañata ba za kukena ba kale, bene ba bulelanga kuli, “Nzila ya kale ye fuyozwi! Kanya ku Mulimu! Lu zamaya nzila ye kambama ya kale ye!” Kono, mwa hupula, zani haki zona za na bulezzi.

<sup>233</sup> Na bulezzi kuli, “Kukaba nzila ye kambama, ni,” *ni* ki linzwi le li kopanya, “ni nzila.” Mi haina kubizwa likululu le li lukile, kono, “Nzila ya kuluka.”

<sup>234</sup> Cwale, nzila ye kambama ya kuluka, batu balika kuikeza kuba ba bakenile. Mi ha mueza cwalo, kuswana sina ha Ni bulezzi kale, kuswana sina...Ikona kuba inge sibungu se si comeka mafufa a liiba ku sona, kuli siikeze kuba inge liiba, kanti sibupeho sa sona ki sa sibungu. Mwabona? Sona, ki... Ikona kuba inge liñwalala leli lika kubeya—kubeya mafufa a nkwilimba ku yona, kamba a ngangalukunyi, mi sibulele kuli, “Mwa bona, Ni nyunywani yende.” Mwabona, ki sika fela sa kucomeka comeka fela.

<sup>235</sup> Kono ngangalukunyi hailukeli kubila kamba ikaba ni mafufa a ngangalukunyi kamba nee. Liiba ha li lukeli kubila kamba likaba ni mafufa a liiba kamba nee. Haibile sibupeho sa lona ki sa liiba, likaba ni mafufa a liiba.

<sup>236</sup> Mi, mwabona, batu ba za kukena ba bulela kuli, "Basali ba lukela kuba ni milili yemitelele ni liapalo za mazoho a matelele, mi—mi ni lika ze kaufela, ni likoci zetelele, mi basike ba apala liapalo za sinawenga ni masila a mifuta kaufela." Mwabona, iba kuluka kwa kuikupulela. Mwabona? Mwabona? Kwani—kwani ki—kwani ki kukena kwa kuikezeza. Kono Keleke ya luli ya Mulimu ya pila . . . Mi mutualime ze ezahalile kwa kopano. Cwale kaufela bona ba kuta milili ya bona, sina Mapentekota, ni—ni zeñwi cwalo. Mi—mi kaufela bona, kuli mane, kutina maseka ni zeñwi cwalo. Mutualime Mapentekota, lilimo limo kwa mulaho, mone ba ezeza lilata ka zeo, mwabona, mi, "Luna, ki luna keleke! Luna, ki luna keleke!"

<sup>237</sup> Keleke ki Mubili wa Kreste. Ki mutu anosi, mwahala batu babañwi, baba pepezwi mwa Mubuso wa Mulimu. Zeo litaha kwande kuzwa mwahali. Za ipilela ona cwalo luli.

<sup>238</sup> Hamu kupi ngu kuli ibeye booya, kamba, kupanga booya, Ni taluse. Ngu hailukeli kupanga booya. Kipeto ibulele kuli, "Cwale, muñaka ubata kuli nibe ni booya silimo se. Ni lukela kuba ya patehile." Batili, nto fela inosi yeina ni kueza ki kusiala ili ngu ona cwalo. Yeo ki niti. Booya bu ka imelela fela . . . Buka ba—buka na . . . Ika ba ni booya kakuli . . .

<sup>239</sup> Kono ha lu kupiwi kuli luipangele miselo. Lu lukela kuba ni muselo, mwabona, kubeya miselo. Mwabona? Lu lukela kubeya miselo. Mi haibile fela ki muselo wa Mulimu, ka Linzwi la Mulimu, Linzwi la Mulimu lika ipaka Ililona. Likabea miselo haibile fela ki Linzwi lelili ku lona. Jesu naize, "Ha muina ku Na, ni Manzwi a Ka aina ku mina, mukupe kaufela se mu lakaza mi sika ezw." Mwabona? Ha mu ipangeli lona. Ha ki mina baba ikataza kukena mwateni. Zona liteni kale mwateni, ni kuzwelapili ona cwalo kwapili.

<sup>240</sup> Cwale halu yeni, lu akufe fela cwale, ka mizuzu fela ye siyezi, mi kihona luka kwala.

<sup>241</sup> Cwale, cwale, babañwi baya kwahule hahulu kwa kuba bafitelezi ba tumelo. Cwale, ba ya kwa neku la kwande. Mi ba nahana kuli, bakeñisa fela kuli bakona kutulaka mwahalimu nifafasi, kamba kuba ni mufuta omuñwi wa kuakaleza kamba maikuto, lu bulela ka malimi, kamba—kamba—kamba lwa fa sipolofita se si lukile, kamba nto yeñwi cwalo, ba nahana kuli sani ki Sona, kuli—kuli bana ni Sona. Kono, ha ki cwalo.

<sup>242</sup> Jesu naize, "Babañata baka taha ku Na mwa lizazi lani, mi bakali, 'Mulena, kana ha Ni si ka polofita ka Libizo la Hao?' Ka Libizo la Hao ni ezize misebezi yemiñata, ni ku leleka mioya ye

maswe?” Mi ali, “Amuzwe, nali kuba ni mi zibe.” Mwabona? Ha ki cwalo. Ha ki cwalo, mulikani.

<sup>243</sup> Ki kabakaleo . . . Mi, malimi, ki bupaki? Ni lumela mwa kubulela ka malimi, kono ha Ni lukeli kunga kuli kona bupaki fela bwa Moya o Kenile. Batili, sha. Muselo wa Moya kona bupaki. Mwabona? Eehe. Cwale, mwa bona, leo kona libaka ha Ni shutanelia ni ba muzamao wa ba Pentekota, mwa mukwa o cwalo, kuli ba bulela kuli, “Haiba mutu ubulela ka malimi, una ni Moya o Kenile.” Na shutana. Sani ha ki sisupo sa Moya o Kenile. Mwabona?

<sup>244</sup> Ni utwile mioya ye maswe haibulela ka malimi kapili luli mo ilukela ku ezeza, kunwela mali mwa katendele ka mutu, ni kubiza diabolosi.

<sup>245</sup> Ni boni ma Indian habanga linoha ni kuitata zona mwa teka, mwa—mwa—mwa pula inge ba bina kwani kwa Arizona; kuyemisa mazoho a bona mwahalimu *cwana*, ni kumata mata cwalo. Liñaka za taha, ku zhima katata za hae. Ni kubeya potolotofafasi, mi iñola ka malimi asili, ni kufa toloko ku yona. Mwabona?

Kacwalo, musike, musike mwa ni bulelela cwalo. Ni supezi hahulu ka kueza zeo. Mwabona?

<sup>246</sup> Kacwalo he—he muselo wa Moya kona bu-... Jesu naize kuli, “Ka miselo ya bona,” isiñi ka malimi ni maikuto, “kono ka muselo wa bona mu ka ba ziba.” Mwabona? Kacwalo kona muselo wa Moya. Ki Mulimu yasweli ku ipatulula Iliyena, bunde, zazi ni zazi kinto yeswana. Kuna ni sika sesiñwi ka zona, mutu yiplina hande ni Linzwi. Nako kaufela yeo lika ze halibona Linzwi, u Li bulela ka “amen,” hakuna taba kamba batu babañwi ba bulela sikamañi. Kuli, wa Li lumela, mwa bona. Ku lukile. Mwabona?

<sup>247</sup> Kono luya kwahule hahulu, mi, ku yendamena fa tumelo yefitelezi, mi Satani ukena mwahala sicaba. Wani kona musebezi wa Satani. Mi ki muuna yomutuna wa pisinisi. Mi ukena mwahala sicaba sa hae, kuba eza kuli ba nahane kuli bana ni Sona bakeñisa fela kuli bakona kutulela mwahalimu ni fasasi. Mi ni kutoya yopila ni yena mabapa? Batili. Mwabona? . . . ku—ku bulela lika, ni kubulela ka malimi handende fela, ni lika ze cwalo.

<sup>248</sup> Mi, muhupule, wakona kubulela malimi a niti a Moya o Kenile kono niteni hauna Moya o Kenile. Bibele ibulezi ona cwalo. “Niha Ni ka bulela ka malimi a batu ni a Mangeloi, kono hanina lilato, ha li ni tusi sesiñwi. Ni ba fela mulangu olila, ni ngongi ye mulumo omutuna.” Makorinte Bapili 13. Mwabona? Kacwalo musike . . . Sani ha si boni lika, mwabona.

<sup>249</sup> Ba Methodist bali, “Ha ne luhuwa, ne luna ni Zona,” kono neba siyo cwalo. Ba Nazarene bali, “Hane ba pilile ka kukena, neba na ni Zona,” kono ne ba siyo cwalo. Ba Pentekota bali,

“Luna lu bulela ka malimi; luna ni Sona,” kono ne ba siyo cwalo. Mwabona? Mwabona?

<sup>250</sup> Mulimu, inza ipatulula Iliyena, isiñi mwa maikuto. Batili, kuli . . . Maikuto, ibo, ni Sona. Mwabona sibaka sateni? Si fita fela fa kuikokobeza kuli mañi ni mañi wakona ku Si bona, haiba mu—haiba ha muliki kubeya, za kukenya mihipupo ya mina bañi ku Lona, mwabona, ni minahano ya mina fela. Ki Mulimu.

<sup>251</sup> Cwale, mi bakona kuba sishañata sa bafitelezi ba tumelo. Mi, ki neku *le* baika baba bata kwa neku *le*; ki ba bafitelezi ba tumelo kwa neku leliñwi *le*; mi ki yo Munyaliva ya zamaela mwahala zona kaufela, inza bizwa kuzwa kwa maneku amabeli kaufela. Yeo ki niti. Mulimu inza Li paka Hanza ya cwalo, Linzwi la Hae.

<sup>252</sup> Cwale, oh, Ni lukela kutula zeñwi kakuli Ni nani zeñata hahulu fa. Mi Ni—Ni nani . . . Nako yaka izamaya ifela. Nika akufa kapili fela mo Ni konela cwale.

<sup>253</sup> Kuzwa kwa Edeni, kuzwa kwa Edeni little, kubile—kubile ku polofitwa ka za kutaha kwa Mesia; nzila ye kaufela kuzwa kwa Edeni.

<sup>254</sup> Cwale Ni ka tula Mañolo nyana o Ni nani a ñozwi fa, ni litaba zeñwi, kuli Liñusa li fele fela, ka nako, haiba Ni kona. Mulimu inza ipata mwa bunolo. Cwale, Ni ka bulela kapili, kono, ibo, Ni—Ni bata kuli mutokomele seo. Mwabona?

<sup>255</sup> Ku kalela koo kwa Edeni, ne ku polofitilwe kuli ku kataha Mesia. Ne ku bulezwi kuli U kaba mutu wa mufuta o cwani. Ne luka ina nako yetelele fo. Mwa ziba Bibebe, Mushe naize kuli, “Mulena Mulimu wa mina uka zusa Mupolofita, yaswana sina na.” Neba ziba kuli Mesia yani na lukela kuba mupolofita, mufuta wa bulumiwa wa Na ka tabela kuba ni Ona. Bapolofita kaufela nebabulezi ka sa Na ka eza. Neba bulezi ka zona mwa mifuta. Mi sa bafita fa litho za bona, ni kufita mwatasasa babañwi ba bona. Mwabona? Mwabona? Ne li fitile mwatasasa yomuñwi, ni kufita fahalimwa yomuñwi. Mwabona?

<sup>256</sup> Ka nako ya Na tilo fita mwa sibaka ka nako yateni, ona sicaba kwa Na lomezwi ne si na ni toloko ya sona ka mwa Na kabela, mwa minahano ya mutolokelo wa sona.

<sup>257</sup> Bibebe ha isika cinca fateni. Bibebe yona ya swana kamita. Ki kabakaleo ha Ni bulela kuli, “Mañolo aize, mi Ni ina ni Sani, ‘Bibebe haina mutolokelo wa kwa mukunda.’”

<sup>258</sup> Kacwalo, ba Methodist, ba Baptist, ba Pentekota, musike mwa lika kubeya toloko ya mina ku Yona, muli, “Ha si talusi Seo. Si talusa se.”

<sup>259</sup> Si talusa ona cwalo fela mo Si bulelala, ona cwalo fela. Yomuñwi naize, “Kana sikona kuba cwani?” Ha ni zibi. Ha kina yalukela kubulela cwalo. Ki Mulimu ya lukela kutokomela zeo. Ki Yena ya na li bulezi, haki na, mwabona, mi Uka tokomela beli Ba Hae.

<sup>260</sup> Kono cwale, kono, Mesia yo na polofitilwe. Bapolofita neba bulezi hande ka swanelo mwa Na ka tela, sa Na ka eza ha Sa tile. Kono, litoloko za bona za teni, mwahala sicaba! Mi ha Na sa tile, Nali mwa buino bo bu bunolo hahulu, mwa bunolo, kufitela sikuwata kaufela sa keleke ha si sitatala fateni. Kana ku cwalo? [Kopano ili, “Amen.”—Mu.] Kwani, ona baana bani bene ba lutilwe... .

<sup>261</sup> Mutu nasakoni kuba muluti, kuba muprisita, konji haiba upepilwe mwa lusika loluñwi cwalo, lwa ba ha Levi. Mi, munahane fela, kuku-wabo-kuku-wabo-kuku-wabo-kuku wa hae nali muprisita, yana lobala ni Linzwi lani, mwa tempele, musihali ni busihu.

<sup>262</sup> Inge muprisita wa Katolika ya—ya tambeka ku mukutazi, kuzwa mwa lusika, kutaha kwa likeleke zeñwi cwalo, ni zeñwi cwalo, “Bo-kuku-wabo-kuku ba baana neli bo bishopu ba Methodist. Bo kuku neli bo bishopu, ni zeñwi cwalo.” Mwabona?

<sup>263</sup> Bao kaufela, ne ba pila hande mwa Linzwi, kono neba ipangezi nzila ya bona mwa kuezesa lika. Mi bana ba bona ne ba li amuhezi ka nzila yene ba li lutive bondata bona. Kufitela, bashemi ba bona haba li luta ka nzila isili, mi baeza kopano yecwalo ka zona, niteñi, fani Moya ha no tisa Niti, ne ba si ka U amuhela.

<sup>264</sup> Mi yani kona nto yeswana ni kacenu. Ha ni talusi ka kuba yasina likute, kono ki niti. Ki nto yeswana ni kacenu. Ba lieza kuba hahulu—hahulu tata, mi—mi ni ka linzila zeñwi. Ba luta za bona . . . Kuswana fela inge ha se ku bulezwi kuli, “Mulimu hana baikulu.” Mwa ziba cwalo? Mulimu una ni bana ba bashimani, mi una ni basizana, kono isiñi baikulu ba bashimani ni baikulu ba basizana. Mutu kaufela ulukela kulifa tekó yeswana ni kutaha ka nzila yeswana. Inge fela bondata mina mone ba ezelize, ni mina mulukela kueza cwalo.

<sup>265</sup> Cwale, kacwalo, Na li ya bunolo hahulu. Fani Mesia yo . . . Ka lilimo zaluna ze sikit, mupolofita kaufela na bulezi ka Yena; Davida uopezi ka Yena, ni babañwi kaufela kushetumuka cwalo. Mi ha Na tile, batu nebana ni mihupulo ya bona isili, sa Na lukela kueza, mwa Na ka ezeza. Mo ne li tolokezwi kaufela zona, kuswanisiwa fa bipepa ni fa lika kaufela, kufitela, ha Na tile ka nzila ye bunolo yani, neli fela—neli fela kusinya lituto za bulapeli za bona. Mwabona, ne ba si ka li ziba.

<sup>266</sup> Na tile ka ku zamaelela ni Linzwi. Cwale, kana mwa lumela kuli Mulimu na bulezi ka bapolofita, kuli Mesia yani na ka taha ka nzila yani? Ki bumai hahulu kuli halusana hola yeñwi ya kukena mwahala zona ni ku tatulula mo ne kuinezi. Mwabona? Kaufela luna lwa ziba mone kuinezi, niteni, buñata bwa luna. Mo Mulimu na bulelezi kuli kona mwa Na ka tela, mane ni kuli, “Wena, Betelehema wa Judea, ha u yomunyinyani . . .” Ni zeñwi

kaufela mwahali mwani, ni mwa Na ka ezeza, ni sa Na ka eza. Mwabona?

<sup>267</sup> Mi, kanti, Nali ya bunolo hahulu! Kufitela, baituti babatuna bani ha ba lyanganiswa ki zona, mane ba li mbwinja. Kono, mwa ziba Jesu na si ka taha ka kushutana ni Linzwi. Na tile kuya ka Linzwi, kono ne ku shutana ni mutolokelo wa bona. Mwabona? Na lutilike zene Iwanisa lituto ni za bulapeli bwa likutazo za bona ka Yena.

<sup>268</sup> Cwale, neba bulezi kuli, cwale, ka mutuala, “Mi Mesia ha ka taha, kaniti, Uka taha kwa tempele ni ku to bulela kuli, ‘Kefasi,’ kamba ki mañi kaufela muprisita yomuhulu yakaba teni, ‘Ni tile.’ Uka taha ni Mangeloi akuma ku bo lule baba lishumi sikuwata luli. Mulimu uka bulela kuli, ‘Ku lukile, balikani, ki fo he, mina luli mu—mu keleke yetuna. Mu sicaba sa Ka. Ni ka kwalula sinotolo fa ni ku shetumuna malibela a Lihalimu fasasi. Ni mi lumela Mesia, kakusasana cwana. Ni ka li wiseza mwa patelo yeo, mi sicaba kaufela si kopane.’ Sili, ‘Dokota Wakuli-ni-kuli, wena Dokota Wakuli-ni-kuli, mina kaufela mwakona kuyemela kwa toho, kuli mu Mu lumelise pili, mwa bona.”

<sup>269</sup> Cwale seo ikona kuba sika mwendi se ba nahana kacenu. Cwale, Ni ziba kuli ki hanyinyani... I utwahala kuba buhali nyana. Kono Ha ni... Ni lika kutisa taba kuli iutwahale.

<sup>270</sup> “Mi—mi, kwani, cwalo kona mo ku kabela. Mi haiba halibi cwalo, konakuli ha li si ka luka; ki antikreste. Mwabona? Haiba hasi tahi kuya ka nzila ona yeo, ki za antikreste, mwa bona, kona kuli hasina kuba. Mi kacwalo, he, ku kaba ni... Mi, taba yetatama yetaha, ikaba mwendi Mangeloi a kuma ku bolule baba lishumi sikuwata luli, ni liharepa za ona. Mi aka tuluka mwa patelo mwani, koo Solomoni na yahile tempele, mi, oh, kaufela ona fahalimu ni fasasi kulo kwani, sibaka se si kenile se koo bahalalehi ni baba butali ne ba shwezi, ni babañwi cwalo!”

<sup>271</sup> “Eeni,” Jesu naize kuli, “mina baipi! Mina bana ba diabolosi!” Ali, “Mu kabisa mabita a bapolofita, kanti bondata mina kona baba ba beile mwateni.” Yeo ki niti. Yeo ki niti. Mwabona? “Ki baana baba kai baba kenile ni bapolofita baba lumezwi ku mina, kono niteni mubulaile mañi ni mañi wa bona!” Mwabona? Kono ki sikamañi sa Na ka biza “kuluka”? Bona, bone ba bazize kuli, “bafitelezi ba tumelo ni bilyangu.” Eeni.

Kwani, ne ba hupula kuli ne li ka taha ka nzila yani.

<sup>272</sup> Kono, fani, Hana tile mwa sicelo, apepwa ki—ki mwalyanjo, ana ni fela mubeti ya zibahala ka kuba ndatahe wa mutose, mi ni—ni mwanana, wa musizana yana sa zibwi. Mwabona, isiñi mwana musizana wa muprisita yomuhulu, kamba mañi kaufela. Na—Na tile kakuba... kuzwa ku musizana yomunyinyani yana pila kwani mwa—kwani mwa munzi omunyinyani, wa kale ono bizwa Nazareta. Mi nali fela muuna ya shwezwi; musala hae na shwile. Na pepile bana; Josefa. Mi—na beeelize. Mi ki Ha taha

ka libizo le li nsu lani, ka kukala. Ne ba bulezi kuli Na pepilwe ali mwana wa mwa bucwani. Oh, mawi!

<sup>273</sup> Zani ne li natile katata fa kuituta kwa bona. Mwabona? Lituto za likolo za bulapeli za bona ne li sa koni kuswala zani. Toloko ya bona ya Mañolo neisina se iziba ka zona, kono ni cwalo neli kuli KISONA SA BULELA MULENA. Oh, mawi!

<sup>274</sup> Za ni sabisa, ka kunahana, ni kubona nto yeswana ha iezahala hape. Mulimu hakoni kucinca.

<sup>275</sup> Seli twelufu kale kale, kono Ni... Kikuli mukaba fela, kamba, mwendi Ni tuhele, kamba ni zwelepili fela? [Kopano ili, "Batili."—Mu.] Sani... Ni itumezi. Muine fela mukuzize fa nako nyana, mwabona. ["Zwelapili fela kuya."] Cwale, se kwateni, Ni toma sesiñwi fa kwa Liñusa leli tatama, mwabona. Mi Ni ka lika ku mi lukulula kapili, mwendi ka mizuzu yelishumi kamba ye lishumi ni ye ketalizoho, haiba lu kona. Mulimu ami fuyole.

<sup>276</sup> Mulemuhe, cwale, ki nto ye bunolo hahulu, kuli i—i—i zwile fela fo ne kutokwahala, ku bona. Kono ya nata fana bata Mulimu. Mwabona, neilo nata fa Linzwi. Na tile ona cwalo fela mwa Na bulelezi. Kono, bona, toloko ya bona ka zona ne ifosahalile hahulu. Toloko ya mulamuleli mwa nako ya Mushe neifosahalile. Toloko ya mwa nako ya Nuwe neifosahalile, mwabona, kono Mulimu utahanga kuya ka Linzwi la Hae.

<sup>277</sup> Mi cwale Jesu ataha, mi Yena—mi Yena aluta lika ze ne shutana kwateni. "Haiba ki Wena Mesia, eza sa *kuli-ni-kuli*," mwa bona. "Haiba ki Wena, tuluka fa sifapahano mi u lubonise cwale." Mwabona? Kono Mulimu hana nako ya kubapala ni batu. Mulimu uezanga fela lika ze tabisa ni ze lukile.

<sup>278</sup> Neba hupuzi kuli Yacwalo yani ukaba ni kutaha ni sikwata tuna sa Mangeloi. Kono Yena ataha mwa sicelo. Mi, kuya ka lituto za bona za bulapeli, neli nto ye bukuba ku mutu wa fela fela kuli anahane kuli Mulimu Yamata kaufela yani, yena Jehova yomutuna, Muña lifasi mi yana bupile lika kaufela, apalelwé kulukiseza sibaka sa Mwana Hae Luli kuli aepelwe mwateni, sesinde kufita mulaka wa likomu fa musutelo. Na ka kona kwani...? Mwabona?

<sup>279</sup> Neli sikamañi sani? Mulimu mwa bunolo. Sani kona sene si Muezize yomutuna. Mwabona, lituto za zibo ya za bulapeli halikoni kuikokobeza zona liñi cwalo; mwabona, halikoni ku yemela zeo. Kono Mulimu ki yomutuna hahulu kuli Na ikusufalize Iliyena kutaha ku ze cwalo, kupalelwa nihaiba liapalo za ku Mu tinisa Mwana Hae. Munahane fateni! Mi ni lifasi... Nekusina sibaka mwa ndu ya baenyi. Mi ki Haya mwa sicelo sa likomu, kaemba ka kanyinyani—ka kanyinyani, ka—ka kañope kaka nyinyani, cwalo, kwa mulaho wa lilundu. Mi ona bulobalo bwa bucwani bwani Mwana Mulimu ataha. Oh, yani neli shutano yetuna hahulu kuzwa kwa mukopano kwa halimu kwani...

<sup>280</sup> Mi Bomahe bene ba lukela kuba bomahe. Ba fumanwa kuli ne ba swanela kuba me, oh, likweli nyana fela kwa mulaho neba beechezani kuli ba nyalane, kamba, mane nihaiba kunyalana. Mwabona? Na lukela kuba me. Mi sicaba sa li bona, mi sa ziba kuli ne lili ka nzila ye. Mi, Maria, mwa pilu ya hae, na ziba sene si ezahala.

<sup>281</sup> Mi Josefa na si ka utwisia. Kono Lingeloi la Mulena la taha ku yena busihu, lali, “Josefa, wena mwana Davida. Si sabi ku ikungela Maria musala hao, kakuli sani ha si si ka fosahala, kono sani ki sa Moya o Kenile.” Ani neli mafelelezo. Muuna yani, Josefa, ana ni tamahano yecwalo ni Mulimu, kufitela Mulimu a bulela ku yena.

<sup>282</sup> Kono kacenu lu ikungela libaki za luna za bulapeli ku lihohela hahulu bukaufi ni luna kufitela mane kutokwa kuba ni sika se si bulela ni luna, kwanda sikwata sa za bulapeli ko lu fumaneha. Ha ni lati kuba ya halifa kamba ya buhali, konakuli Ni siyela seo ona foo. Mulemuhe. Kono mwa utwisia se Ni talusa. Mulemuhe.

<sup>283</sup> Sicelo sa likomu ne si sehisa, ku bona, baba talifile bani. Luna mane haluna nihaiba sikolo silisiñwi kwa Na kile a kena sikolo nihaiba zazi lililiñwi fela; kono mane, ka silimo sa bulishumi ni zepeli za kupepwa, Mushimani ya bunolo akomokisa baprisita mwa tempele, ka tuto ya Hae. Oh, mawi! Neli sikamañi sani? Ki Mulimu yaipata Iliyena mwa kuishuwa. Ni ikutwa kuba wa bulapeli onafa cwale. Mulimu kuipata Iliyena mwa sikungu. Mulimu kuipata Iliyena ku Mwana yomunyinyani. Mwabona? Mutualimele, li ka bonahala, kasamulaho nyana, niteni, mwabona.

<sup>284</sup> Nana ni kuli- . . . Na . . . kwa Na ile kwa mikwakwa. Bashemi, hakuna kukakanya, neba ambola ni kubulela kuli, “Musike mwa bapala ni mwanana yani. Musike mwaba ni sa kueza ni yena. Mahe ha ki sesiñwi kono ki lihule fela le li itobalela fo lilata, mwabona. Mi, ndatahe ni mahe, mbututu na pepilwe . . . Mane ba si ka nyalana kale, na lukela kuba me. Musike mwa ba ni sa kueza ni yena.”

<sup>285</sup> Sa na hupula Maria! Kono, kaufela, hakuna taba kamba ba kwande ne ba hupula sikamañi, a nahanisisa fa lika ze kaufela. Ba li pata mwa lipilu za bona. Ne ba zibile. Nekusina ze maswe ze ne ba bulela ka zona.

<sup>286</sup> Mulimu ubulelanga ku mutu wa Hae, fokuñwi, ubulela kuli, “Ikete libelela. Usike wa bulela sika ka zona.”

<sup>287</sup> Ni bile ni sicaba mwa mukopano baba bulela kuli, “Kihande, haiba u mutanga wa Kreste, uziba kuli se sikaba teni.”

<sup>288</sup> Luli, Ne ni ziba kuli ne si ezahala. Kono cwale ki sikamañi se mu ka eza Ha bulela kuli, “Ikete libelela. Usike wa bulela sika ka zona”?

<sup>289</sup> Ne ni ile ni baana babañwi zazi leliñwi, mi na ba bonisa, mwa buka. “Sesiñwi sa bulela, lilimo za kwa mulaho,” Se nili.

Nali, “Kihande, Ha ni si ka utwisisa.”

<sup>290</sup> Se nili, “Mwa bona fani?” Ki se fa, kwa mulaho kwanu, ne luna ni zona ka lizazi le litomilwe ki lika kaufela, hane li ezahalile kwa mulaho kwani. Batu babañata ne ba li boni fa buka kwani. Se nili, “Ku ka to ezahala kuli *se* si ka ezahala ka nzila ye ni ka nzila *yani*.”

<sup>291</sup> Kuli, “Kihande, kiñi ha u sika bulela sika ka zona?” Ne lika- . . . Ne lika kuba ona cwalo. Mwabona?

<sup>292</sup> Mi Josefa na zibile shutano. Na zibile Yanali muña Mbututu yani. Maria na zibile Ya nali muña Yona. Jesu na zibile Ya nali Yena Ndatahe. Ki sikamañi sa Na bulezi? “Ni lukela kueza musebezi wa Ndate Luli.” Isiñi kusaha likota ni kupanga sikwalo; kono kutokomela musebezi wa Ndatahe Luli. Amen. Abulelela cwalo Bomahe, “Kana ha mu utwisisi seo, Na, seli nako kuli Ni tokomele musebezi wa Ndate Luli?”

<sup>293</sup> Cwale, ne ba hupuzi kuli, “Yena Mwana yomunyinyani yo ya pazauhile cwana . . .” Mwana kaufela ya pepezwi mwa bunyazi ki mutu ya ipitezi, kinto ye buhiwa, niteñi. Mi kifo cwale, mwabona, kono, Mulimu wa ipata Iliyena. Muteeleze. Mulimu uipata Iliyena ku ze ne hupulwa, mwa lifasi, kuba, “Masila, kubola, mwana wa mwa bunyazi.”

<sup>294</sup> Mutualime, Mulimu uipata Iliyena mwa kubola kwa peu ye shwile, ili kutisa bupilo. Mwabona? Kana mwa utwa nji?

<sup>295</sup> Mulimu uipata Iliyena mwa bunolo, musali yomunyinyani ya maswabi. Kamba muuna yasina kabubo ni mukiti wo mwa lizoho la hae, atubete musala hae ni bana kuli musiyale foo, kamba mwendi aipate Iliyena ku mutu yani ya eza sika seo bishopu yomuhulu asina sa ziba ka sona. Mwabona? Hamuna ku Mu utwa inza liza pala ni ku li hasanya. Yena, Mulimu, kunga fela kanya, kipeto kufelile. Baba bunolo ba liutwa mi ba tabela, mwabona.

<sup>296</sup> Cwale, Mulimu na sweli kuipata Iliyena mwa bunolo bwa Mbututu, kuipata Iliyena mwa bunolo bwa—bwa lubasi lo lu zibahala. Mulimu! Mi za bulapeli, ni baana babatuna, ba bunangu, bo caziba, ni—ni bona bani kaufela, ni bo Heroda, ni babañwi cwalo, ba lizazi lani, ni bo Nero, mi kaufela bona ba litalimela fela ka lisheha. Mulimu uipata mwa bunolo.

<sup>297</sup> Cwale, kapili. Joani Mukolobezi, mwa Isaya 40. Lwakona kuibala haiba mwa bata. Malaki 3. Kaufela, eehé, mu liñole haiba mwa lata. Isaya 40, kaufela, mwa ziba, kubulela ka kozo kwa . . . ka mo kuinezi. Mwendi Nika . . . Kwakona kuba hande kuli Ni—Ni—Ni ibale fela kwanu, haiba muna—muna ni nako yeñata. [Kopano ili, “Amen.”—Mu.] Halu ezeni cwalo, fa muzuzu fela. Lu apuleni mwa Buka ya Isaya, kauhanyo ya 40, ni—ni kubala fateni mi lubone fela sa bulela ka se cwale. Mutualime

kwanu, "Amu tiise pilu, amu tiise pilu ya sicaba saka." Cwale, muhupule, ze neli lilimo ze mianda ye supile ni ze lishumi ka zepeli. Mutualimele fa toho ya taba foo, mwabona. Lilimo ze mianda ye supile ni ze lishumi ka zepeli asika pepwa kale, ki yo fa mupolofita wa bulela za hae.

*Amu tiise pilu, amu tiise pilu ya sicaba saka, kubulela MULENA.*

*Mu bulelele Jerusalema ze kolisa pilu ya hae, mi mu shaele ku yena, kuli ndwa ya hae ifelile, kuli mulatu wa hae u swalezwi: kakuli u a muhezwi... habeli mwa lizoho la MULENA ku se si likana ni libi za hae kaufela.*

*Linzwi la yomuñwi... lihuwa mwa lihalaupa lili, Mu lukise nzila ya MULENA, mu sungamise likululu, la Mulimu wa luna mwa liuwa.*

*Mi musindi kaufela uka yumbelwa, mi lilundu ni kalundu nyana lika ulululwa: ze kopami lika otololwa, mi matulungundu... aka patamiswa:*

<sup>298</sup> Oh, mawi, mawi! Ki muuna ya cwani yana kaba yena yani! Mwabona? Cwale muapule mwa Malaki, hamoho nina, Buka ya mafelelezo... wa mafelelezo kwa bapolofita ba Testamente ya Kale. Cwale, mwa Malaki, muteeleze fa. Malaki wa i pamula, kwa mafelelezo fela a nako, kuli musike mwa ilibala. Malaki, kauhanyo ya 3.

*Amubone, Ni luma numwana waka, mi uka lukisa nzila fapila ka: mi Mulena, ye mu bata, uka kena mwa tempele ya hae kapili, yena numwana wa bulikani, ye mu lata: amubone, uka taha, ku bulela MULENA wa limpi.*

<sup>299</sup> U sa bulela ka za Joani, "Ni luma numwana waka fa pila Ka, ku to lukisa nzila." Jesu na bulezi ka zona, mwa Mateu 11:10, ili:

*Haiba mwakona ku liamuhela, bani ki bone li bulezwi ku bona, Amubone, Ni mi lumela numwana fapila ka,...*

<sup>300</sup> Mwabona? Yeo kona niti. Cwale, ka mo li bulelezi ze kaufela! Fani, hane se kubile lilimo ze mianda yesupile, ne ku lukela kutaha mutwaleti kusikaba kale Mesia. Kono ha na tilo bonahala, mwa bunolo bwani, ba mu timelelwa. Ba mu timelelwa.

<sup>301</sup> Cwale, muhupule, nali mwana muprisita. Kihande, mutualime mo ne libezi ze bukuba kuli asike a latelela ofisi ya bo ndatahe, akutele kwa sikolo sa za bulapeli. Kono musebezi wa hae neli o butokwa hahulu. Ka lilimo ze naini za kupepwa, aya mwa lihalaupa. Mi ayo kuta, ataha inza kutaza. Ba mu timelelwa. Nali ya bunolo hahulu, ya bunolo luli, kwa sikolo sa bona se si pahami hahulu kuli ba lumele ya cwana yo. Neba hupula kuli, muuna yo hana tile...

<sup>302</sup> Ku cwani ka za, “Libaka kaufela ze pahami ze ka patamiswa, libaka kaufela za misindi li ulululwe, libaka zena ni matulungundu kaufela li otololwe”? Davida na liboni, mi ali, “Ma—ma malundu na takisa sina lingunyana, mi matali na kambela inge mazoho.” [Muzwale Branham wa kambela kukuta kutela—Mu.]

<sup>303</sup> Sikamañi? Kana ne li ezahalile? Mutangana yana ni mahaha cwalo ya hulile yani, yasina nihaiba tuto, ni siemba sa litalo la ngu inza tamile sona, ataha inza icuncula mwa lihalaua la Judea, inza li, “Mubake, kakuli Mubuso wa Lihalimu u fakaufi. Cwale mina sishañata sa linoha, musike mwa nahana ni kubulela kuli, ‘Ni wa kopano ya kuli.’ Mulimu wakona ka ona macwe aa kuzusa bana ba Abrahama.” Mawi!

“Kihande, yani ha ki yena fani. Lwa ziba kuli yo ha ki yena batili.”

<sup>304</sup> Kono neli yena! Mwabona, na sweli ku lukisa nzila. Mwabona? Fani kona fo ne li lukiselizwe hande linzila. Fani kona libaka ze lumbile fo ne li patamiselizwe. “Musike mwa hupula kuli muna ni Abrahama kuba ndata mina. Musike mwakala kuni bulelela lika ze cwalo, kakuli Mulimu wakona ka ona macwe aa kuzusa bana ba Abrahama.” Libaka ze lumbile za patamiswa. Oh, mawi! Ki cona luli. Eeni. Mwabona shutano kana? Na bulezi kuli sani kona sene si ka ezahala.

<sup>305</sup> Mi cwale ha ba taha, ba hupula kuli, oh, mawi, ne ba itukiselize fela ku mu amuhela, hana ka taha kwa kopano ya bona. Kono kakuli...Na tile ona cwalo, mwa mukwa o bunolo cwalo. Ibo, ka kutoloka Mañolo, libaka ze lumbile ne li patamisizwe. Ne ba sa lati ku li amuhela, kono nebali cwalo.

<sup>306</sup> Mushimani, na li kashelize kusili. Na buhile litalo la bona. Ali, “Mina sishañata sa libili! Mina linoha mwa bucwan! Na mi bulelela, silepe se si yendekilwe kwa mubisi wa kota. Mi kota kaufela ye sa beyi miselo, ya lemiwa ni ku nepelwa mwa mulilo. Ni ka mi kolobeza ka mezi, kono kuna ni Alimuñwi ya taha mwa mulaho waka, Ya ni fita kwa mata e Ni filwe; Uka mi kolobeza ka Moya o Kenile ni Mulilo. Mi liselo la Hae limwa lizoho la Hae. U ka huhula fa sihoto sa hae. Mi U ka kubuka... mi acise muuku mwa mulilo; mi akubukanye mabele mwa lituli la hae.” Amen.

<sup>307</sup> Fani kona fo libaka ze lumbile ne li patamiselizwe, mwabona, kono sicaba ne si si ka liamuhela. Kono kona ona cwalo fela kuya ka Linzwi, ona cwalo fela Linzwi mo ne li bulelezi. Ka bunolo fela, kuli mane ba li timelelwa. Ne ba si ka li bona.

<sup>308</sup> Musike mwaba libofu ze cwalo. Mwabona? Musike mwaba libofu ze cwalo. Kacwalo, muiteeleze, cwale.

<sup>309</sup> Ne ba li latehile. Nali ya bunolo hahulu, ka kulumela kwa bona ko ku bunolo kwani kwa mutu ya cwalo yani, kuli ba li latehisa. Hape, ki sikamañi seo? Mulimu, ili Linzwi, le li ipatile

mwa bunolo; isiñi muprisita ni kola ya hae ye futukile, ya talifile, ya nani tuto.

<sup>310</sup> Jesu na ba buzize lika ze swana. Na bulezi kuli, “Ki sikamañi se muilo bona?” Fani balutiba ba Joani ha ba kuta. Ali, “Ki sikamañi se muilo bona? Kana muilo bona muuna ya apezi mwa liapalo za muprisita, mwa ziba, ni litino zetelela hande,” Ki hali, “mu—mu—mu—mufuta wa mukutazi ya cwalo nji?” Ki hali, “Kana kona ze muilo bona zeo?”

<sup>311</sup> Ali, “Batili. Ba ba cwalo bao kona baba tubetanga limbututu, mi, mwa ziba, ni kupumbeka bafu. Bona, hakuna se ba ziba ka za mukwale o lozizwe kafa ni kafa mwa mafulo a ndwa. Nebali kwande kafoo ni mubulelelo o munde, kwa sibaka sesiñwi sa Kiwanis Club kamba kokuñwi, mwa ziba. Kaufela bona bateni kwani. Kono cwale ha litaha kwani kwa ndwa, ku talimana ni yona, hakuna ze ba ziba ka yona. Bona—bona, ba fumaneha mwa mandu a malena. Bona ba fumanehangni batu ba mifuta yeo.”

<sup>312</sup> Kono ali, “Konakuli ki sikamañi se muilo bona? Kana muilo bona lutaka lo lu zukuzwa ki moyo? Muuna yana kona kubulela... Yomuñwi ali, ‘Wa ziba, u wa siemba sa—u wa siemba sa ba Oneness; kono kambe no ka taha kwanu ku ba Assemblies, Ni ka ku bulelela se ne Ni ka eza, luka—luka eza kuli...’ ‘Ni lumela kuli Ni ka eza cwalo.’ Huh! Lutaka, lo lu zukuzwa? Isiñi Joani. Batili, batili. Batili, batili. ‘Haina no ka taha, ube Musaduki mi isiñi kuba Mufarisi, kamba nto yeñwi, kifoo?’ Ha mu si ka bona mutu ya zukuzeha ni moyo; isiñi Joani.” Batili, sha, muzwale; ha ki yena.

<sup>313</sup> Na ize, “Kona kuli ki sikamañi se muilo bona? Ki mupolofita?” Sikona kunga mupolofita fa kueza sani, mwabona. Na ize... Cwale, sani neli sona sisupo sa mupolofita, mwabona, Linzwi la Mulimu kuba ni yena. Linzwi li tahanga ku mupolofita. Mwabona? Naize, “Ki sikamañi se muilo bona? Mu polofita nji?” Ali, “Eehe, yeo ki niti. Kono, Ni li ku mina, mane uftita mupolofita, kakuli nali cwalo.”

<sup>314</sup> Ki kabakalañi ha na fita mupolofita? Nali mulumiwa wa Bulikani, luli nali cwalo, ku to kopanya nzila mwahala mulao ni sishemo. Nali yena licwe la butokwa, mwahali mwani, lene li bulezwi.

<sup>315</sup> Mi ali, “Haiba mwakona ku li amuhela, yo ki yena ya bulezwi ki bapolofita habaize, ‘Amubone,’ mwa Malaki 3, ‘Ni luma numwana wa Ka fapila Ka, mwabona, mi uka lukisa nzila fapila Ka.’” Mwabona? Oh, nali ya bunolo hahulu. Mulimu hape inza ipata mwa bunyinyani ka bunolo.

<sup>316</sup> Konakuli mutualime sa na ezize. Na kutilize Kreste yana taha ka mata yani, “Una ni liselo la Hae mwa lizoho la Hae. U ka... U taha inza huhula mwa nzila ya Hae. Mushimani, Ni talusa kuli, U ka huhula ka tokomelo fa sihoto sa Hae. U ka kubukanya

muuku, ni ku fefulela kafoo ni ku cisa ka mulilo, luli. Yeo ki niti. U ka kubukanyeza mabele a mwa lituli la hae.” Mwabona, na susumelizwe.

<sup>317</sup> Kono cwale Jesu hana tile, ne ba sweli kulibeleta... Mi ni babañwi baapositola bani kaufela, mwa ziba, ne ba sweli kulibeleta nto yeñwi yene sa taha. “Mawi, mawi! Oh, Wa taha. Kona fela zeli ku zona. Mushimani, U kaba ya mata. U ka lahaka Maroma bani kuzwa mwa lifasi. Mawi! U ka lundula Magerike bani kuhasana ka nzila *ye*, ni Maroma kuya ka nzila *yani*, Ha ka taha.”

<sup>318</sup> Ha Na tile, neli mutu fela ya ishuwile inge ba mu kashaka kuzwa neku le kuya neku lani. Neli sikamañi sani? Mulimu na ipatile Iliyena mwa bunolo. Oh, mawi!

<sup>319</sup> Mi ki Ha yema kwa mafelelezo a Liñusa la Hae, mi ali, “Ki mañi yakona ku Ni nyaza ka sibi? Kaufela sene ibulezi Bibele kuli Ni ka eza... Ha Ni sa ezi misebezi Ya Ndate, kona kuli mu Ni nyaze. Kono ki sikamañi sa bulezi Mañolo kuli Ni lukela kueza, se Ni si ka eza?” Sibi ki ku sa lumela, mwa ziba. “Ki mañi yakona ku Ni fa mulatu? Haiba Ni leleka mioya ka minwana ya Mulimu, kona kuli mu Ni bonise zemueza ka zona.” Ka bunolo!

<sup>320</sup> Mane aipa Iliyena kwa lifu! Kono, oh, ka la Zuhu kakusasana, haleluya, fani kona fa Na huhuzi fa sihoto. Na gefuzi muuku, ku lukile, muzwale. Eeni, ki niti. Mi buloto bwa kubukanyeza mwa lituli. Bu lobezi mwa liluli, ni Bupilo Bobusafeli mwahala bona, kulibeleta Lizazi lelituna lani le lu ka bulela ka lona, la Kutaha kwa Mulena, fani bupilo bwani habuka taha kwa Bupilo; mi luka zuhela ku ona mwa zuho, lu ngelwe ni Yena mwa mbyumbiyulu, mi lu yo kopanela mwa Lituli. Mi muuku uka cisiwa kwani; ona mitose yenze iicanganisa kuba bukaufi, ni kuli ka Li hohela neku *le* ni neku *lani*, ika cisiwa ka mulilo osa timi. Amen. Oh, ha ki Yomunde nji? [Kopano ili, “Amen.”—Mu.]

<sup>321</sup> Ne ba Mu timelezwi, Mulimu mwa bunolo. Kiñi? Kiñi? Yena mane na si ka kutaza kuya ka manzwi a mukutazi. Ali kuba. Na si ka kutaza sina mukutazi. Mwabona? Na kutilize sina... Na itusisize manzwi a bunolo bwa Mulimu, manzwi a cwale ka “silepe se si yendekilwe,” manzwi a swana sina “kota,” manzwi a swana sina “linoha.” Isiñi muluti wa za bulapeli, sina mwa litaba za bukutazi bwa kacenu, inge Dokota wa za Bumulimu, Dokota wa *Kuli-ni-kuli*. Na si ka eza cwalo. Na kutilize sina muuna wa mishitu yali kwahule kafoo. Na bulezi ka licapu, ni likota, ni linoha, ni lika ze cwalo zani, ni mabele, ni lituli, ni lika zeñwi ze cwalo. Na ka talimwa, kacenu, Na sepa, kuba inge mukutazi wa kapongisi ka mulola. Ni sepa kuli Na bizizwe kuli “mukutazi wa lisina” mwa lizazi lani, inza yemi fa lisina kwa Jordani kwani. Mwend-... Mulimu mwa bunolo, kuipata kwa butali bwa lifasi.

<sup>322</sup> Cwale halu batisiseñi. Jesu naize, “Na itumela ku Wena, Ndate, Upatile lika ze ku baba butali ba lifasi, mi uka li patululela bana babanyinyani babakona kuituta.” Mwabona? Mulimu uipata mwa bunolo, ku Kreste. Mulimu uipata mwa bunolo, ku Joani. Mwabona? Fela . . . Mwabona, Na—Na li . . . Munahane fela ka zona, Mulimu mwa bunolo, uipata Iliyena kwa butali bwa lifasi.

<sup>323</sup> Cwale lu ka kwala, ka muzuzu fela, kamba yemibeli, kakuli ha Ni lati ku mi liyehisa hahulu.

<sup>324</sup> Mutualime, ha lu yemeni fa muzuzu nyana, ki nto ye ni ama kasibili fela. Mu nahane ka lizazi le lupila ku lona, lu kwale ka se cwale. Mu nahane ka lizazi le lupila ku lona, fo Mulimu ha taha mwa sibaka sesinyinyani se si ishuwile mo lubile lu pila, inza folisa bakuli. Ni bafumi, ni bainuneki, ni baba itutile hahulu, “Mazazi a limakazo a felile. Hakuna sika sa kuli foliso ya Bumulimu.”

<sup>325</sup> Mwa hupula Liñusa lene Ni kutalize ku zwa ona fa sibaka nyana sa mubu wo fa, kakusasana hane Ni fundukile, ka za Davida ni Goliati?

<sup>326</sup> Bali, “Kana uka yo kopana cwani ni lifasi la kwande kwani wena, Muzwale Branham, ni zona Ze kaufela?”

<sup>327</sup> Se nili, “Hani koni kuziba mo Ni ka yo kopanela ni zona. Mulimu ali, ‘Zamaya’” Mwabona? Ku felile, mwabona. Ki Linzwi la Hae. Na Li sepisize. Hola ifitile.

<sup>328</sup> Mi Lingeloi lani, le mu bona fa siswaniso fani, hane litile kwa nuka kwani zazi leliñwi, lilimo ze mashumi amalalu zefitile kwa mulaho haluka fita ka Mbuwana yetaha ye, kamba mashumi a malalu ni zetalu kwa mulaho, nitaluse, ka Mbuwana yetaha ye; ni kubulela kuli, “Sina Joani Mukolobezi mwa na lumezwi,” fapila batu baba eza likiti zeketalizoho kamba mane kufitelela, “hola itile fo Liñusa la hao ha li ka yumba lifasi.”

<sup>329</sup> Mwa hupula twaniso, haiba yomunñwi wa mina naliteni kwani. Na sepa, Roy Slaughter, kamba babañwi ba bona babaliteni mo, mwakona kuhupula lizazi; kamba babañwi, musala Bo Spencer, kamba—kamba mañi kaufela yakona kuba wa sicaba sa bakale mo bao bakona—bakona kuziba, mwabona; George Wright, kamba alimuñwi wa bona, mwabona, mwa ziba cwalo, mo ne kuinezi. Kono kana ha Li sika eza cwalo nji? [Kopano ili, “Amen.”—Mu.] Li ezize cwalo.

<sup>330</sup> Mi kipeto mwahali, hane ba li hanile, ni kubulela kuli, “Ki foliso fela ya kunahana.” Mi Mulimu afetuha ni ku luma, sinyonde se si holofezi kwani se si sa buleli, mi sa foliswa ka Mata a Mulimu.

<sup>331</sup> Lyle Wood ni Banks, hane luinzi kwani, ni kuziba kuli Mulimu na pakile Niti. Fani, katapi kakanyinyani, kene ka shwile, nakatenge wa tapi, ne ka futukile mwa mezi. Kono Moya

o Kenile wa bulela, lizazi la kwa mulaho, kuli Na ka ba bonisa Kanya ya Hae ni kueza sika ka sona. Mi kwani kakusasana wani, inge ni yemi fani, Moya o Kenile wa tahafafasi mwa mukolo wani, mi se Ni nanuha ni kubulela kwa katapi kani. Mi ne ka futukile mwa mezi, inge ka shwile, ka licika la hola; maaka a kona ni mala ne li labukezi fande kuzwela mwa mulomo wa kona. Ka kutela kwa bupilo, ni kutapa kuya inge tapi yeiketile hande. Seo ki sikamañi? Mulimu yaipata Iliyena mwa bunolo.

<sup>332</sup> Mulimu wakona ka ona macwe aa kuzusa bana ba Abrahama. Mulimu wakona kufolisa sinyonde, kamba tapi, kamba sika kaufela. Haiba uka tisa Liñusa la Hae patalaza, mi batu bapalelwa ku Li lumela, Mulimu wakona kuzusa sinyonde ku Li lumela. Haleluya! Mulimu wakona kuzusa tapi yeshwile. Wakona kuzusa sinyonde se si shwile. Wa kona. Wakona kueza sika kaufela Sa bata kueza.

<sup>333</sup> Ha ki kalimelo ni yeo kwa lusika loo! Haba sweli ku sitatala ka Lona, ni kukanana ka Lona, mi, “Ha usika eza se ni kueza *sani*.” Mi Mulimu aluma folofolo ye bunolo mwateni. Mwabona? Ha ki kalimelo ni yeo! Neli sikamañi sani? Mulimu mwa bunolo, mwabona, inza iponahaza Iliyena kuba yomutuna, oh, mawi, ku omanya baana ba lusika lo baa, ka ku sa lumela kwa bona.

<sup>334</sup> Cwale, ba nahana cwale inge mo ba bile ba nahanelia kamita, li lukela kuezahala ka nzila ya bona. “Cwale, haiba kuna ni sika sa kuli foliso ya Bumulimu . . .” Inge, muuna wa Katolika yana ni bulelela zeo. Mutangana, busihu bobuñwi, na ni bulelezi cwalo. Mwa ziba ka zona. Naize . . . Yo Ayers, yene Ni ilo bona ka za mushimani wa hae kwani kwa Houston, na ize—na ize, “Kihande, cwale, haiba—haiba yani neli mpo ya Mulimu, ilukela kutaha mwa keleke ya Katolika.” Mwa bona? Mwabona? Eehe, ba Methodist neba hupula kuli Ika taha mwa keleke ya bona. Ni Mapentekota neba hupula kuli Ika taha kwa keleke ya bona. Kono ne I sika taha ku yeñwi ya bona.

<sup>335</sup> Ne itile ka Mata a zuho ya Jesu Kreste inza iponahaza Iliyena. Yeo ki niti. Luli, Wa ezanga. Eehe. Mu Li talimele fela. Musike mwa Li tuhelela kumi fittelela. Mulibeye mwatasa pilu ya—ya mina, mi mu Li hupule. Mu Li nahanisise.

<sup>336</sup> Lina ni kutaha ka nzila ya bona, ku za bona, lizwe kwa kopano ya bona luli. “Mi hakusi cwalo, ha ki Yena, mwabona. Ki za kuikupulela fela, kamba ki diabulosi. Ki za—ki za . . . Ha ki Mulimu. Kakuli, haiba ki Mulimu, Una ni kutaha,” ka nzila yabona fela, mwa bona, “ka mo lu Li tolokezi.”

<sup>337</sup> Cwalo kona Jesu mwa na tezi kwa Bafarisi. Ne lina ni kuba ka nzila yani. Mwabona? Haiba za bona . . . Haiba Mulimu na kaba ni—ni kuluma me—me Mesia, neba na ni zona kaufela inge li tolkilwe ka mwa Na ka bela. Mi kakuli Na tile ka kushutana, konakuli, “Ne si Mesia. Na li sa mwa bonyazi cwalo. Nali Baalezebubi.” Kono neli Mulimu yana ipatile mwa bunolo.

<sup>338</sup> Mutwaleti ulukela kuba mutu ya itutile ku ze cwalo... Kihande, alimuñwi, hakuna kukakanya... Zazi ni zazi, mwaha ni mwaha hane bana ni, eehe, kuketa bakutazi ba bona ni ku ba luma kusili sina bakutazi, ba proselite ni kuba tisa mwateni; mañi ni mañi na hupula kuli, "Yo ikaba yena mutwaleti ya lukela kutaha yani." Kono Mulimu a mu tisa kuzwa mwa lihalaupa mo ne kusina sikolo sa bukutazi ni hanyinyani, mwabona, ni lika ze cwalo. Mwabona? Mulimu uipatanga Iliyena mwa kuishuwa ni mwa bunolo.

<sup>339</sup> Kono cwale mulibelele. Ka kukwala, lu bulele cwana. Kono kuhana Liñusa la Mulimu le libunolo; ku—ku—ku Li hana, nzila yebunolo ya Mulimu, ki ku shwelela Kuyakuile. Cwale, cwalo kona mo kuinezi... Lubulela ka bunolo mo Li inezi, mi batu ba nahana kuli, kihande, bakona ku Li seha ni ku mata fahalimwa Lona, ni ku Li eza ka nzila yeba bata kueza ka yona, kono ki kukauhana kwa Kuyakuile ni Mulimu.

<sup>340</sup> Bene ba shwile mwa mazazi a Nuwe, mi bene ba si ka teleeza kwa liñusa la hae, neba shwile. Mi Jesu naile teñi mi a yo kutaza ku bona mwa litamo za lififi, mwa lifu la Hae, A si ka zuha kale. Mi Aya kwa lihele, ni ku kutaza kwa mioya yeneli mwa tolongo, yene si ka baka mwa mazazi akuba ni pilutelele kwa Nuwe; kanti liñusa le li bunolo la Mulimu, ka mutu ya bunolo, ne li kutazwa. Aya kwateni. Mi ali, "Nuwe na kutilize kuli Ni kaba teni fa, mi ki Na yo niteni." Yeo ki niti. Mwabona?

<sup>341</sup> Bani bene ba palezwi kuteeleza kwa liñusa la mupolofita, Mushe kwande kwani mwa lihalaupa, kuli na amuhezi ku Mulimu, Siita sa Mulilo se si pakilwe hande, mi a ya mwa lihalaupa. Mi ni kulika kuzusa kopano ni kuibupa cwalo ka yona, mi ba bulaiwa ni kushwela mwa lihalaupa, mañi ni mañi wa bona; kono basali, Joshua ni Kalebu.

<sup>342</sup> Mi kulo kwani, ba—ba Bafarisi nebali libofu hahulu kuli batokwa kubona zani, kacwalo ba talima kwa mulaho ni kubulela kuli, "Bokuku aluna ne ba cile manna, nebacile manna mwa lihalaupa."

<sup>343</sup> Mi Jesu ali, "Mi bona, kaufela bona, ba shwile." Ne ba boni Kanya ya Mulimu. Ne ba zamaile mwa Liseli la... Ne ba zamaile mwa Liseli. Neba zamaile mwa Liseli la Siita sa Mulilo. Neba zamaile fapila Kubateni kwa mata a Kona. Neba zamaile mwa libaka zeo Moya o Kenile no ba konisize kuzamaya ku zona. Neba cile manna yene wanga kwa Lihalimu, yana ba fanga Mulimu. Mi, ba lateha, ni kuya kwa lihele. "Bona, mañi ni mañi, ba shwile." Haiba munga linzwi leo, ki "kauhano ya Kuyakuile" fapila Kubateni kwa Mulimu. "Bona, mañi ni mañi, ba shwile." Mwabona?

<sup>344</sup> Mañi ni mañi yana hanile Jesu na shwile. Mwabona se Ni talusa? Kuhana bunolo bwa Mulimu bwani! Ha ki kueza fela sika... Mu li, "Kihande, Ni ezize mafosisa." Hamu lukeli

kulieza cwalo. Mulimu ha li amuheli ka nzila yeo. Muka shwa, Kuyakuile. Kihande lu nahana ka taba yeñwi. Cwale, lina ni kupakiwa hande ki Mulimu, mwabona, mi kipeto, haiba ku cwalo, ki Linzwi la Hae. Mwabona? Oh! Inge bani bene ba hanile Mushe, bene ba hanile Elia, bene bahanile Joani, bene ba hanile Jesu, mwa lizazi la bona.

<sup>345</sup> Kwanu, haluboneni ni mi bulelele nto yenyinyani. Mi, cwale, Ni sepa kuli ha Ni holofazi hahulu. Kono, mutualime. Ka zazi leliñwi Ne ni bizelizwe kwa Houston, Texas, kuli ni yo isa swalelo. Ka kukopanya batu hamoho, ku kutaza liñusa, ni kuisa sicaba kwani ku yo nyatela swalelo ya—ya mutangana yo ni kalibe yo. Mwa ziba kuli neba keni mwa butata. Na sepa mu li balile zeo mwa mutende. Mi yani neli mwana wa mutose wa Bo Ayers wa mushimani.

<sup>346</sup> Mi Bo Ayers ki bona bene ba kopile siswaniso sa Lingeloi la Mulena, se mubona fani. Mutu wa Katolika wa Roma; mi musala hae neli Mujuda. Mi ba nyala musizana wa Mujuda yo. Neba sa ambolangi za bulapeli mwahala bona, ni zeñwi, ze cwalo. Mi Ted Kipperman, yanali ni yena mwa musebezi, nainzi ni ba Douglas Studios.

<sup>347</sup> Mi cwale hana tile kwani, kone kuna ni Bo Best, Dr. Best, wa kwa keleke ya Baptist, hana putile ñindi ya hae mwataso ngo ya Muzwale Bosworth, ni ku inyanganyisa, ni kubulela kuli, “Cwale ni napule, inge aeza cwalo.” Ali, “Ni ka buha litalo la muuna muhulu yo ni yo li paheka mwa muzuzu waka mo ni balelanga, kuba kupuzo ya foliso ya Bumulimu.”

<sup>348</sup> Mi Ni sikaya kale kwa Houston, Texas, Mulena Mulimu ani bulelala kuli ni ye kwani. Mi Nenili kwani ka Libizo la Mulena. Mi mina kaufela mwa ziba kañi ni lika zene tahile kwateri. Mu li balile mwa libuka, ni zeñwi cwalo. Mi ki zani nelili fani. Mi busihu bwani... Neni lika fela kuzamaya ka kuikokobeza.

<sup>349</sup> “Kiñi,” neba bulezi kuli, “ki sikuwa sa litimbi ze siyalezi.” Dr. Best ali, “Ha ki lika zeñwi kono ki sikuwa sa litimbi ze siyalezi.” Ali, “Hakuna batu baba lumela mwa foliso ya Bumulimu, lika ze cwalo. Sani ki sikuwa se si siyalezi.” Neba sa zibi kuli neli Mulimu mwa bunolo. “Kiñi,” ali, “muuna wateni mane hana ni sikuwa sa mutu yaile kwa sikolo.”

<sup>350</sup> Na itutile hahulu ka za likolo za ma digiri anakona ku fumana, kufitela a hupula kuli na ka lyanganisa Muzwale Bosworth kumu bitela fafasi, ni cwalo. Kono hane litile kwa Linzwi, na sa baliwi nihaiba kuba wa bulishumi kubene ba ka likana ni yena. Mwabona? Mi Muzwale Bosworth na zibile fa na yemi. Buñata bwa sicaba sa habo, se siinzi fani, nesili teni kwa kañi yani. Mi awa neili teñi luli.

<sup>351</sup> Mi ki ha lu nenauna luli, ali lu sikuwa sa litimbi ze siyalezi. Ali, “Batu baba nahana hande haba lumeli zeo.”

<sup>352</sup> Muzwale Bosworth ali, “Fa nako nyana fela.” Ki hali, “Ki batu babakai mwa muleneñi mo,” neli mwendi ba seti sauzande busihu bwani, bene bainzi mwahala luna cwalo, “Ki batu babakai ba muleneñi wo, baba yanga kwa likeleke zetuna, zende za Baptist ze, ba bakona kupaka cwalo ka za ñozi dokota kuli ba folisizwe ka Mata a Mulimu kukala fa tezi mwa muleneñi wo Muzwale Branham, muyeme.” Mi baba mianda yemilalu cwalo ba yema. “Ku cwani cwale ka bao?” Neli taba luli. Mulimu na ipatile mwa bunolo. Mi ki hali, “Muzwale . . .”

<sup>353</sup> Mi ali, “Amu tise mufolisi wa Bumulimu yoo. Ni mubone ha lyanganisa mutu, kona ni ka mubona kasamulaho wa silimo kuzwa kacenu.” Mi Ted Kip- . . .

<sup>354</sup> Mi Ayers kwani, yena luli yana napuzi siswaniso se, ali, “Bo Branham ha ki sesiñwi kwanda kuba muhateleli. Ni boni musali, yana bile ni kolu fa mumizo wa hae, sina *cwalo*, mi,” ali, “na hatelezi fela maikuto a musali yani. Lizazi lelitatama Na yo ambola ni yena, mi na sina kolu.” Ali, “Muuna yo na mu hatelezi fela mwa maikuto.” Mi, oh, na ni nyefauzi luli. Ali Ne ni lukela kulelekwa mwa muleneñi wani, mi na lukela kuba alimuñwi yana lukela kueza cwalo, mwabona, ni zeñwi kaufela ona cwalo. Neli miñolo Yemituna mwa mutende wa ha *Houston Chronicle* fa pampili yafa pata.

<sup>355</sup> Na si ka bulela nihaiba linzwi. Nenili fani kueza musebezi wa Ndate, mi ona sani kipeto; na ina ni Linzwi lani. Ki yena yana ni lumile kwani, mi ki musebezi wa Hae.

<sup>356</sup> Busihu bwani hane Ni ya kwani, Se nili, “Na—Na—Na—Na hani mufolisi wa Bumulimu. Na batili. Haiba kuna ni yabulela cwalo,” Se nili, “wa fosa.” Mi se Nili, “Hani lati kubizwa kuli mufolisi wa Bumulimu.” Se nili, “Haiba Dr. Best kwanu ukutaza puluso, kona kuli hakoni kutabela kubizwa kuli Mupulusi wa Bumulimu.” Mi se Nili, “Kanti, Na ni kutaza foliso ya Bumulimu, Hani lati kubizwa kuli mufolisi wa Bumulimu. Kono ubulela kuli ha ki Mupulusi wa Bumulimu; kaniti, ha yo cwalo. Nina ha Ni mufolisi wa Bumulimu. Kono, ‘Ka miupa ya Hae lu folisizwe,’ Ni supeza fela ku Sani.” Mwabona?

Mi kacwalo, yena, “Bukuba!” Mwa ziba, inza zamaya zamaya cwalo.

<sup>357</sup> Mi se Nili, “Kono haiba Kubateni ni yona mpo ya Mulimu ye, ona Lingeloi la Mulena le, haiba nji Yeo kona puzo, Yeo yakona kupakiwa.” Ka yona nako ye, ki yo musali muhulu ataha, inza alabanafafasi. Ali, “Hakuna tuso ya kubulela cwale. U bulezi kale za ka.” Mi se Ni zwela fande.

<sup>358</sup> Mi se Ni ya kwa Houston, ona muleneñi omutuna wani, iliñwi ya litolopo zende hahulu ku zeliteni mwa naha, kai ni kai. Ha Ni kena mwahali mwani, ka zazi leliñwi, neli maswabisakutalimela tolopo yani. Mikwakwa neli fela masila. Litafula za kulukiseza mwa sibaka, ona mwa Mukwakwa wa Texas wani; mi se Ni yo

kena mwa Rice Hotel, mone kupila babapali ba mafilimu, mi na shetumuka mwa malibela ani cwalo, kone ku lekiswa lico, mi situwa sa mwahali ne si sweli kuwela fafasi, ni mubu ono matehilwe kwa limota unzo wezi fafasi, ni masila ni busafa. Ni ku sa utwana mwahala bakutazi mane nisamba kuba Ni be ku zeo kamba nihanyinyani mwa bupilo bwaka.

<sup>359</sup> Kiñi? Kuhana Liseli ki ku zamaya mwa lififi. Ki bani bana ba bona bainzi mwa nzila ya lifu. Kulukile. Mulimu na shetumukile. Fani bunolo hane bu bonahalile ni kuhaniwa, mi Mulimu aponahaza Iliyena mwa bunolo bwa Hae.

<sup>360</sup> Mi kwani neba nani siswaniso se si ngelezi lifasi. Niheba ba sayansi neba bulezi kuli ki Sona fela Sibupiwa sinosi se si kile sa swaniswa ka buipiteli cwalo mwa litaba za kale za lifasi; mi siteni ni mwa Washington, DC, mwa muyaho wa maswaniso a za bulapeli. Ki sani, bunolo bobu bonahalile, kanti. Mwabona? Mwabona? Mulimu Iliyena kasibili naipatile mwa bunolo, mi ni kuipatulula Iliyena. Mwabona?

<sup>361</sup> Cwale, Na ipatile Iliyena mwa lifu la Kreste, kono a ipatulula Iliyena mwa zuho. Oh, maawi! Ni zeñwi cwalo, mwa kona, luna fela . . . lwa kona . . . Hakuna mafelelezo ku zona; ki kuzwelapili fela kubulela. Kono ki fo he cwale, mwabona.

<sup>362</sup> Kuhana kubulela kuli kuna ni liseli la lizazi, ki ku kena mwa malibela a ndu ya fafasi ni kuitima kwa meto kwa liseli. Mi yeo ki niti. Mi, muhupule, nzila fela yemukona kufosa ka yona, pili ki kuhana zelukile. Mwabona? Mi kuhana ku kwalula meto a mina, muka pila mwa lififi. Mwabona? Haiba muhana fela kutona, muka bona cwani? Mwabona? Mutokomele lika ze bunolo. Ki lika zenyinyani ze musiya inge li si ka ezahala, ha ki lika zetuna ze musweli kulika kueza—kueza. Oh, mawi!

<sup>363</sup> Mi, mutualime kwanu, haluboneni ni mi bulelele. Mwa Mal- . . . mwa Mateu 11:10, Na bulezi kuli, “Haiba mukona ku li lumela, yo ki yena.” Mwabona? “Yo ki yena yana lumilwe fapila Ka.” Neli bunolo.

<sup>364</sup> Ne ba Mu buzize zazi leliñwi, kuli, “Ki kabakalañi bañoli kanti ha ba bulela kuli . . .”

<sup>365</sup> Yena, Yena ali, “Mwana mutu uya kwa Jerusalema. Ni ka fiwa mwa mazoho a baezalibi, mi ba ka mu bulaya Mwana mutu. Mi Uka shwa, kono ka lizazi la bulalu Uka zuha hape.” Ali, “Musike mwa bulelela mutu ka za pono yeo, kulo kwani.”

<sup>366</sup> Mi balutiwa, cwale munahane fateni, balutiwa bene ba zamaile ni Joani, ni ku ambola ni yena, kuca ni yena, mwa lihalupa, baina fa likamba, mi ki habali, “Ki kabakalañi baluti haba bulela kuli Elia uswanezi kutaha pili? Wena ubulela kuli Uya ku yo takiswa, mi uka zuha. Ki wena Mesia, unge lubona. Cwale ki kabakalañi bañoli . . . ? Mañolo a luna kaufela abulela fa, ona Mañolo atoloka patalaza kuli, Kreste asika taha kale, kuti Elia una ni kutaha pili.” Eehe. Mwabona?

<sup>367</sup> Mi ali, "Sa tile kale, kono ha mu si ka muziba." Cwale, neli bomañi bani? Balutiwa.

<sup>368</sup> Ni ka holofaza fa, hanyinyani fela cwale, kono ha ni talusi cwalo, mwabona; mwa mizuzu fela yetatama yelikani, mwabona, fa muzuzu fela, kamba yemibeli, kono bakeñisa fela kuli mukone ku utwisisa. Kana mwa ni utwa? [Kopano ili, "Amen."—Mu.]

<sup>369</sup> Mutualime! "Kiñi?" Ona baana bene ba zamaile ni Kreste bani, "Kiñi Mañolo kanti, pili, abulela kuli Elia uswanezi kutaha?" Mi nebali balutiwa ba Joani, mi mane kanti ne ba si ka mu ziba. "Ki kabakalañi Mañolo abulela, ni baluti?" Mwa bona se Ni talusa? Mwabona? "Ki kabakalañi Mañolo a bulela kuli kuli Elia uswanezi kutaha pili?" Ona balutiwa luli bene ba zamaya ni yena, "Ki kabakalañi Mañolo abulela kuli uswanezi kutaha pili, lika ze li si ka ezahala kale, ni ku to kutiseza lika kaufela?" Na ezize, mwendi kwa batu baba likana silezi, mi kona fela bene ba liteni. Mwabona? Ki bona fela bene ba lukela ku li amuhela. Bani ki bona fela bene ba lukiselizwe ku libona.

<sup>370</sup> Jesu naize kuli, "U tile kale, kono ha mu si ka mulemuha. Kono na ezize fela ona sa na bulezi Mañolo kuli kona sa na ka eza. Na ba kutisize, mina kaufela baba Ni amuhezi ni ku lumela ku Na. U ezize ona cwalo sa bulezi Mañolo kuli uka si eza. Kono ba ezize ku yena sa bulezi Mañolo kuli baka si eza. Yena sa tile kale, mi ne mu si ka lemuha."

<sup>371</sup> Kana mu itukisize? Ni bata ku mi kakamalisa hanyinyani. Kuungelwa kukaba ka mukwa o swana. Kukaba ka bunolo hahulu, hakuna ku kakanya kukaba ona cwalo, kufitela Kuungelwa kutahe leliñwi la mazazi aa mi hakuna mutu yaka ziba sesiñwi ka zona. Cwale, musike, musike, musike mwa yema cwale, kono mubalisise fa muzuzu nyana. Na ziba luli nituha ni kwala cwale. Kuungelwa ku ta taha mwa nzila ye bunolo hahulu kufitela katulo itaha, mi baka bona Mwana mutu, mi ba kali, "Kana ne lu sa lukeli kuba ni sa *kuli-ni-kuli*? Mi kana nekusa lukeli kulumelwa ku luna Elia? Mi kana nekusa lukeli kuba ni Kuungelwa nji?"

<sup>372</sup> Jesu uka li, "I ezahalile kale, kono ne mu si ka ilemuha." Mulimu mwa bunolo. Mwabona?

<sup>373</sup> Cwale, biki ye luka kena mwa tuto ye tungile luli fa kuluta Linzwi. Cwale, mulemuhe, Kuungelwa, kukaba babanyinyani hahulu babaka ya ku Munyaliwa yani! Haina kuba li . . .

<sup>374</sup> Cwale lwa bona baluti moba bezi ni zona? Bana ni mapampili, mi ba ya, inge ba bonisa bali kutaha batu baba kuma fa teni milioni kwetu; ba Methodist kaufela, haiba ki mukutazi wa Methodist; haiba ki wa Pentekota, kaufela Mapentekota ba taha. Halina ku swala kwateni.

<sup>375</sup> Ikaba teni, mwendi alimuñwi uzwa mwa Jeffersonville, mutu fela yaka tondahala cwalo. Ba kali, "Kihande, mwali kuba . . ." Baba siyezi babañwi habana kuziba. Kuna ni alimuñwi yaka

zwa mwa Georgia. Mwabona? Kuna ni alimuñwi yaka zwa mwa Africa. Mi halu buleleni kuli ku kazwa batu baba mianda ye ketalizoho, ba bapila, baba kaya wa kucinciwa kwani. Cwale, sani haki—sani haki mubili wa keleke. Yo ki Munyaliwa. Yani ha ki keleke. Yo ki Munyaliwa. Mwabona?

<sup>376</sup> Ke—ke keleke ika taha ka likiti kiti, kono zeo ki mwa zuho ye tatama. “Neba si ka pila ka myaha ye sikiti.” Mwabona?

<sup>377</sup> Kono, ku Munyaliwa, haiba batu baba mianda ye ketalizoho neba ka zwa mwa lifasi ona muzuzu woo, lifasi hakuna ze li kona kuziba ka zona. Jesu naize, “Kukaba alimuñwi mwa mumbeta; mi Ni ka nga alimuñwi, ni siye alimuñwi.” Yeo ki nako ya busihu. “Kukaba bababeli mwa simu,” kwa neku leliñwi la lifasi, “Ni ka nga alimuñwi ni siye alimuñwi. Mi sina mo ne kuinezi mwa mazazi a Nuwe, kona mo kuka bela ni fa kutaha kwa Mwana mutu.”

<sup>378</sup> Munahane! Lika kaufela lika zwelapili fela kuba mo libelanga kamita. Liñusa la tumelo ye fitelezi lika hasana, mi, taba yapili mwa ziba, sesiñwi, “Mukutazi yo, uya kusili, hana kukuta. Kubonahala kuli uile mwa mushitu, ku yo zuma. Hana kukuta ni hanyinyani. Mi mutangana yo uile kusili. Mwa ziba ze ezahalile? Na lumela, musizana yomunyinyani yani, u—u kakatezi mwendi kwa sibaka kokuñwi, mwa ziba, kuna ni mutu ya ngile musizana yani ni ku mu tundanisa, kamba mwendi u mu nepezi mwa nuka. Nasi ni mutu.” Licika la bona . . . ba nainte naini mwahala baba . . . Lu bulele kuli alimuñwi mwahala baba handeleti milioni ki yena yaka ziba sika ka zona; mwabona, kwanda kuli mutu ya mu ziba, abulele kuli, “Musizana yo utondahalile. Kiñi, Ha ni utwisisi. Ali kuba azamaye fateni cwalo.” Batili.

<sup>379</sup> Mi cwale habakali, “Ma—ma mabita aka kwaluha.” Kana mabita aka kwaluha cwani? Kanti, Ha—Ha nina nako ya kukena ku ze, ku zene Ni bata kueza. Ni ka nga se, mwabona, ka kumi bonisa fela bunolo bwa Mulimu. Mi ona kalsiamu yani, potashi, ni lika kaufela, foo—foo . . . Lika kaufela zeli ku mina, ze kona kuswaliwa, litala fela mwa lushwana. Yeo ki niti. Mi kisikamañi se si eza lika zeo, li lubakeha mwa kuba moyo ni bupilo. Mulimu wa bulela fela, mi Kuungelwa ku ka taha. Hakuna kuezahala cwalo kwande kwani, mi Mangeloi atahe ku to katulula mabita, ni kunga situpu se si shwile sa kale mo. Ki sikamañi seo? Ne si pepezwi mwa sibi, ka kukala. Kono, haili Omunca cwale, o bupilwe mwa kuswana kwa ona, mwa ziba. Mwabona? Haiba luba ni ona *woo*, luka shwa hape. Mwabona? Hakuna . . . Mu li, “Mabita aka kwaluha. Bafu ba ka zwa.” Yeo yakona kuba niti, kono ha ki ku kwaluha ko mubuleli kuli kona ku kwaluha. Mwabona? Yeo ki niti. Mwabona? Hakuna kuba cwalo.

<sup>380</sup> Ikaba kunutu, kakuli Na bulezi kuli Uka taha “sina lisholi la busihu.” U lu bulelezi kale zeo, za Kuungelwa.

<sup>381</sup> Kona ku katatama katulo; sibi, likoto, matuku, ni lika kaufela. Mi batu ba ka lilela lifu kuli li bange, yeo cwale seli katulo. “Mulena, kiñi katulo ye haitaha ku luna, kanti No bulezi kuli kukaba ni Kuungelwa pili?”

<sup>382</sup> U kali, “I tile kale, mi ne mu si kailemuha.” Mwabona? Mulimu uipata Iliyena mwa bunolo. Oh, mawi! Ku lukile. “Ku felile, zeo li ezahalile kale, mi ne mu si ka lilemuha.”

<sup>383</sup> Ki kabakalañi balumeil ha ba sa lumeli lisupo ze bunolo za Kutaha kwa Hae?

<sup>384</sup> Ba libelela lika ze kaufela ze bulezwi ka Mañolo, mi—mi kweli ika unsufala ni kulikelela fahali...kamba lizazi, mwahala musihali, mi kukaba mikwa ya mifuta kaufela. Oh, kambe nelukaba fela...Nina ni ze ñozwi fa ka zona, mwabona, ze bonisa kuli lika zani li cwani. Mi lukaba ni zona mwa kukwaluha kwa Maswayo aa ona biki ye, nihakuli cwalo, mwabona. Mwabona? Ki fo he cwale, kakuli se li fitile fela, kono ha mu si ka li ziba. Mubone haiba ku cwalo, haiba Lingelo la Mulena lika kwalula Maswayo ani mwateni cwalo. Muhupule, a swailwe ka Mishika ye patilwe ye Supa yani. Mwabona?

<sup>385</sup> Cwale ki sikamañi? Kiñi batu ha ba sa lumeli bunolo bwa sikwata sa batu baba ishuwile se, mwabona, mi ni—ni Linzwi la lisupo la Mulimu? Kiñi ha ba sa li lumeli? Inge fela mo libezi teni kamita, ki Linzwi la Mulimu la niti le li iponahalize. Ki, ba talifile hahulu mi ba itutile hahulu kuli ba lumele Linzwi le li bunolo le li ñozwi lani. Ba bata kubeya ku Lona. “Ha li talusi *se*. Ha li talusi *sani*.” Mwabona? Li talusa ona Seo.

<sup>386</sup> Muteeleze. Haluboneni Ni bulele cwana, kapili luli, cwale. Niheba lipono za fanga Mulimu mwa sibaka se mo, ha ba li utwisisangi. Kona libaka ha mu utwanga ni bulela fa matepu, kuli, “Mubulele se ibulela pono. Mubulele se ibulela tepu.” Cwale, haiba mwa tona hande, muka bona nto yeñwi. Mwabona? Ni sepa kuli ha Ni lukeli ku si swala mwa lizoho laka ni ku mi bonisa sona. Mwabona? Mwabona? Mwabona? Muna...Ki—ki se fa. Lu kwa mafelelezo. Mwabona? Eeni, sha. Baituti ba tuto baba talifile ba li latehisa. Lipono ze bunolo, ha li patululwa mwa bunolo bobu cwalo, konji ha li apesa fa litoho za sicaba. Mwabona?

<sup>387</sup> Kakuli Ni bonanga lipono, ni mi bulelezi kaufela ze ezahalanga haluile kwa kuzuma kwani, mi, mwa ziba, sani si sitatalisanga fela batu. Mi kwani Mulimu ali luma kwateni ka mulelo ona wani, mi akuta ni ku to li toloka hape, kubonisa ka za kushwa kwa boma, ni lika ze cwalo. Mi ni kukuta ku to bulela ka zona, kale li si ka ezahala. Mi za ezahala ona cwalo fela mwa Na bulelezi kuli li ka ezahala. Mwabona?

<sup>388</sup> Mi, ibo, Joani natile kwani mi apaka. Hana ize, “Haki na Mesia, kono ki Na linzwi la ya huweleza mwa lihalaupa.”

<sup>389</sup> Mi cwale ona balutiwa bani se bali, “Kiñi kanti, bañolii ni Bañ... Mañolo a luta kuli Elia uswanezi kutaha pili?” Mwabona? Bunolo bwa Mulimu bwa zamaya, bufita fela fahalimwa litoho za sicaba.

<sup>390</sup> Haluboneni ni nge se, mi kasamulaho lu kwale. Ni kaeza, ka tuso ya Mulimu. Mwabona? Mutualime. Cwale halu si shetumuneñifafasi. Mi, Mu—Mu ni swalele ka kuzwelapili ku mi bulelala ko Ni kaya, mi cwale... Mutualime. Muni swalele ku liyehisa. Kono, ka lihola nyana fela, luka kuta.

Mutalime, halungeni kaloteli nyana ka enge.

<sup>391</sup> Likakaufela ki ka mulelo. Mu kopana mo kakusasana cwana ka mulelo. Ni cile kwa ndu ya hao, Charlie; Nellie, ne mu ni tatehezi, neli ka mulelo. Ni... Likakaufela ki ka mulelo. Keleke ye iyahilwe ka mulelo. Hakuna sika sesi sina mulelo ni libaka.

<sup>392</sup> Halungeni liloteli nyana la enge cwale. Kana mwa ni utwa nji? [Kopano ili, “Amen.” —Mu.] Halunge liloteli nyana la enge ni ku li talimela. Ki sikamañi seo? Ki liloteli la enge. Li zwelezi kai? Ku lukile. Halungeni liloteli la enge le cwale, kifo, mi lu bulele kuli ki enge yensu. Cwale, enge yani ina ni mulelo. Yakona kuñola swalelo yaka mwa siñ... kuzwa mwa tolongo. Yakona kuñola swalelo yaka kuzwa mwa sibaka sa lifu. Yeo ki niti? Yakona kuñola Joani 3:16, ni kupilisa moyo waka ka kulumela Cwalo. Kana ki niti yeo? [“Amen.”] Kamba, yakona ku nyatela tumelelo ya lifu laka. Mwabona? Yakona ku ni atula kwa Museto wa Katulo. Ki ka mulelo. Kana ki niti yeo? [“Amen.”]

<sup>393</sup> Kihande, halu talimeñi fa enge yenyinyani yani ni kubona ko izwelezi. Cwale, ki enge. I beilwe hamoho, ni milyani hamoho ni zeñwi cwalo, kufitela iba enge. Mi ki yensu. Ha mu ilotiseza fa sapalo sa mina, ika si tampakanya.

<sup>394</sup> Kono lupangile mezi a kutakulisa mibala abizwa mutakulo. Mina bahame muitusisanga mezi a kutakulisa mibala abizwa Clorox. Kihande, Haninga liloteli lililiñwi la enge lani ni ku li lotiseza mwa sikotolo sa—sa mutakulo, cwale ki sikamañi se si ezahalile kwa enge? Mwabona? Kiñi? Mutakulo upangilwe, u fumanwi ni kupangiwa ka milyani, hamoho, oka luba luba mubala wani hahulu kuli mane ha mu koni ku ufumana. Cwale, siemba sa mutakulo wa mulyani wani ki mezi.

<sup>395</sup> Mezi ki H<sub>2</sub>O, yeli haidrojini ni okisijini. Mi sibeli sa haidrojini ni okisijini, sibeli sa zona, zakona kupanca mane ha li bapali. Mi, he, haidrojini ni okisijini ki mufuse fela. Seo kona sesili sona, yeo ki niti, mufuse wa mulyani, ki mufuse fela wa mulyani. Cwale, cwale mu li beye fela hamoho, mi mukaba ni mezi. Kono, mu li lubake, mukaba ni haidrojini ni okisijini, mi i zwelepili fela kukuta mwa mulaho.

<sup>396</sup> Cwale, ka kunga se, halu ngeni... Mi Hani koni. Cwale kwa kona kuba licaziba za milyani babaliteni mo. Mi Ni bata ku bulela kuli, kakuli kuna—kuna ni kuba licaziba ba milyani

baba kateeleza ku ze, Ha ni zibi mubelekelo. Kono Ni bata fela kutatulula ka nzila yaka ye bunolo, kusepa kuli Mulimu uka ipatulula Iliyena mwateni.

<sup>397</sup> Mutualime, Ni nokela liloteli la enge lani mwa—mwa—mwa mulyani wa mutakulo. Ki sikamañi se si ezahala? Kapili sitampatampa se sinsu sa zwa. Hamukoni ku si fumana hape haiba nemuka si bata, si zwile. Hamuna ku si bona hape. Ki sikamañi se si ezahalile? Cwale, hakuna ze mubona ze zwa fateni. Hamu liboni. Kiñi ha mu sa li boni? Kakuli li lubilwe.

<sup>398</sup> Cwale, sayansi ikona kubulela kuli, “Ikutezi kwa sibaka sa yona sa pili sa ma asidi.”

<sup>399</sup> Kana ma asidi azwile kai? Mwabona? Kihande, mu li, “I zwile kwa—kwa lika zeñwi.” Ku lukile. Lubulele, ka mutala, kuli, “Lufulo kona lo lu panga ma asidi.” Cwale lufulo lu zwile kai? “Kihande, neli, lu ka bulela kuli, lufulo lu pangilwe ka mukamo wa ma molekyu.” Kanti ona ma molekyu ao azwile kai? “Kwa ma atomu.” Ma atomu bo azwile kai ona? “Kwa ma elekitroni.” Ma elekitroni ao azwile kai? “Liseli la kozimiki.” Mwabona, muya inge mupotoloha fela kupalelwa ku lifumana, za milyani zeo, cwale. Mi, haiba ki sika ni kubupiwa kwa sona, sina ni kutaha ka Mubupi.

<sup>400</sup> Kacwalo, hamuyo mo ka kozi. Hani mi fitisi ka twelufu seti, kamba wani kiloko, ka kozi. “Mihato ya yalukile i zamaiswa ki Mulena.” Mwabona? Kuna ni libaka la zona. Kuna ni libaka la kuli mu lumele. Kuna ni libaka kuli musike mwa lumela. Inge fela—inge fela za enge.

<sup>401</sup> Cwale halu fitiseni seo fafasi. Cwale, nto yapili, lubulele kuli, kasamulaho lukutela kwa... Luka li kutisa hape ka kuba ma molekyu. Cwale, lungile molekyu, Ni kali, nombolo ya 1 ialulwe ni molekyu ya 9, ialulwe ni molekyu ya 12. Cwale, haiba iba 11, neika ba ye fubelu. Kono i—i bile 12, kuli ipange bunsu.

<sup>402</sup> Mi luka shetumuna nto yeo kwa atomu. Neli atomu. Mi  $9^6$  haialulwa ni  $+4^3$ , itisa kalabo ya atomu  $16^{11}$ . Haiba neli  $16^{12}$ , neikona kuba mubala wa pepo. Mwabona? Konakuli muzwelepili ku seshetumuna fafasi cwalo.

<sup>403</sup> Ibonisa kuli nekuna ni sesiñwi kwa mulaho kwani, ka kukala. Yeo ki zibo fela ye zibahala. Ki pupo. Ina ni kuba ni Mubupi. Mi izwile ku Mubupi, mi kipeto ifumanwi ni kubewiwa mwahala ze, ze shutana. Cwale, sayansi haikoni kunga atom  $B_{16}$  kualulwa ni 12, kualulwa ni 14, kualulwa ni seo kaufela, kwande ona cwalo, kuli ipange sanii. Mulimu ki yena yana li ezize.

<sup>404</sup> Mi kipeto si taha fa sibaka fo iba fela ma atomu, kipeto sayansi ikala ku li swala cwale. Mi kipeto itahe mwa ma molekyu, mi bakona kukala kuibona hande. Mi kipeto ya tuluka, kuzwa fani, kuba mwa sika sisili fela. Mi, taba ya pili, itaha mwa milyani, mi kipeto ba li kopanya lika ze hamoho.

<sup>405</sup> Cwale, haiba mutu, hasika eza kale sibi. Na kwala, kono musike mwa latehisa seo. Mutu hana ezize sibi, na ikauhanyize ili yena kuzwa ku Mulimu, ni kusila mwandala omutuna, mi aikenya iliyena mwa lifu kwa neku le. Na zwile. Hakuna nzila ya kukuta ka yona. Luli. Hakuna nzila ya kuli akute ka yona. Kono cwale hana kutile, Mulimu a amuhela sa kuyolisa, yeneli ngunyana, kamba puli, kamba ngu, kamba nto yeñwi, kuba mali; ao Adama na bulezi ka ona, kamba—kamba Abele, kwa neku leliñwi la mwandala.

<sup>406</sup> Kwa neku lani, ki mwana Mulimu. Ki ya pepilwe ki Mulimu. Ki muca sanda wa lifasi. Wa kona ku zamaisa ze bupilwe. Wa kona kubulela lika mi zaba teni. Kiñi, ki mubupi, yena kasibili. Ki ya pepilwe ki Mulimu.

<sup>407</sup> Kono, hana silile, a kauhanya bwana bwa hae. Ki muezalibi, ka sibupeho. U mwatasa mazoho ni tamaiso ya Satani.

<sup>408</sup> Mi Mulimu anga sitabelo, sa mulyani, wa mali, kono mali a lipoho ni lipuli na si ka takula sibi. Na kwahela fela sibi. Haiba Nina ni sitampatampa se si fubelu fa lizoho laka, ni ku si apesa ka busweu, sitampatampa se si fubelu seo sisali fateni foo. Mwabona, sisali fateni foo.

<sup>409</sup> Kono Mulimu aluma fafasi, kuzwa kwa Lihalimu, mulyani otakula sibi. Ani neli Mali a Mwana Hae Luli. Kuli, sibi sa luna se si bakezwi ha si wela mwa mulyani otakula wa Mulimu, kulika ku si fumana hape! Mubala wa sibi ukutela hape ku tuyemeli wa luna, ni kushetumuka mwa nako ona cwalo, konji hasi yo wela fela mutamelezi, Satani, ni ku mu kakatela kufitela Lizazi la Katulo.

<sup>410</sup> Ki sikamañi se si ezahala ku mwana? Utaha mwa kutwano ye petehile ni Ndate hape, inza yemi kwa neku leliñwi la museto wa mwandala, kusina nihaiba kupuzo ya libi ka yena. Hakusana nihanyinyani, hakusana sitampatampa sa mulyani o takula se si kona kubonahala kai kamba kai. U lukuluhile. Haleluya! Inge fela Clorox yani, kamba enge yani mo isa konahaleli kubonahala nihanyinyani, kakuli si lubilwe ni kulumelwa kwa mulaho hape. Mi cwale sibi se si bakezwi hase si bakezwi ni ku cupwa mwa... Muuna kamba musali ya cupwile mwa Mali a Jesu Kreste, aka bulaya mibonahalelo kaufela. Ni molekyu kaufela ya sibi ikutela ku diabulosi, ni ku siyala ku yena kufitela Lizazi lani la Katulo, ko bukamuso bwa hae bwa Kuyakuile buka nepelwa mwa Lisa la Mulilo. Mi kipeto pakani ya mwandala ya kwaliwa, mi haisana kuhupulwa ni kamuta. Mi mutu uyema ali ya swalezwi, sina mwana wa mushimani wa Mulimu. Bunolo!

<sup>411</sup> Mushe, mwatasa mali a lipoho ni lipuli, ni buipuleli bwa hae mwa Linzwi la Mulimu! Mi Mulimu nakona kunga muuna ya bunolo yani, ni kubeya Manzwi a Hae mwa mulomo wa hae. Mi a paka kuli nali mutanga wa Jehova, kakuli na zwezi kwande

mi Jehova a ambola ni yena ka pono. Na zwezi kwande, aotolela mazoho a hae kwa upa.

<sup>412</sup> Mi cwale, muhupule, Mulimu na bulezi ku yena. Ki muhupulo wa Mulimu. Mulimu wa itusisanga mutu. Mulimu na bulezi ku yena. Ki niti. Na ize, “Zamaya u otolole mulamu wo, mwa lizoho la hao, u utalimise kwa upa, mi uli, ‘Linzinzi!’”

<sup>413</sup> Mushe, mwatasa mali a puli yani, ngu, azwela kwateni mi a anga kota, aisupa kwa upa. “KISONA SA BULELA MULENA. Ha kube linzinzi!” Kwali kuba ku utwahale fateni kuli kuna ni nzinzi. Azamaya akuta mwa mulaho. Li bulezwi kale. Mi ki muhupulo, cwale u ubulezwi, wa bonahala. Ki Linzwi la Mulimu fo cwale. Li tahile mwa milomo ya mutu, muuna ya bunolo mwatasa mali a poho, poho ni puli.

<sup>414</sup> Nto yapili mwa ziba, nzinzi ya mubala wa butala yakala kufufa fufa. Nto yetatama mwa ziba, seli libunda kutala patelo. Neli sikamañi seo? Neli Linzwi la Mulimu, lene li bulezwi ki Mushe, ki Mubupi. Kakuli, mwatasa mali, na yemi fapila Kubateni kwa Mulimu, mi Manzwi a hae luli nasi manzwi a hae.

<sup>415</sup> “Ha muina ku Na, ni Manzwi a Ka aina ku mina, konakuli mukupe kaufela se mu bata, mu ka si fiwa.” Kikai fo iyemi Keleke?

<sup>416</sup> “Ha kube limbotwe!” Mi nekusina fateni simbotwe mwa nahaa. Mwa hola iliñwi fela, za tala kueza liñokolwa zelishumi mwa butungi, mwa libaka. Neli sikamañi seo? Neli Mulimu, ki Mubupi, yaipata Iliyena mwa bunolo bwa mutu.

<sup>417</sup> Cwale Ni bata ku mi buza nto yeñwi. Haiba nji mali a poho kamba a puli aitusiswa sina mulyani o takula, kanti mane ona akona fela ku kwahela, na konile kubeya mutu mwa siyemo sa kubulela Linzwi la Mulimu lelikona kubupa ni kutisa linzinzi kuba teñi, kiñi hamukona ku sitatala fa mulyani o takula wa Mali a Jesu Kreste Akona kubulela tumale mi twaba teñi?

<sup>418</sup> Musike mwa eza cwalo, musike mwa sitatala ka lika ze bunolo. Mu lumele kuli U sa siyala ali Mulimu. Oh, mawi! Swalelo ya sibi! Oh, mo Nilakaleza kuli kambe Ni kona . . .

<sup>419</sup> Mi, mwa Mareka 11:22, “Ha mu ka bulelala lilundu leo kuli, ‘Shenya,’ mi musa kakanyi mwa pilu ya mina, kono mulumela kuli ze mu bulezi li ka ezahala, oh, mwakona kuba ni ze mu bulezi.”

<sup>420</sup> Mawi, Nina ni mapampili amalalu kamba amane. Lu lukela fela ku li siya lizamaye. Ni itumezi.

<sup>421</sup> Mulimu kuipata Iliyena mwa bunolo. Kana mwa bona? Kuna ni se si fosahalile kokuñwi. Kuna ni se si fosahalile kokuñwi. Mulimu ha bulela sika, Ha koni kupuma. Na file sepiso. Mwabona? U ipata Iliyena mwa bunolo. Ki nto yebunolo hahulu!

<sup>422</sup> Ba baitutile ni baituti ba bulela kuli, “Ah, ki . . . Oh, ki kuakaleza kamba nto yeñwi. Mwa ziba, ki . . .”

<sup>423</sup> Mulimu wakona kuikutisa kwa mulaho Iliyena kufita mwahala nako, ni ku mi bulelala ona cwalo kusina kumbwinja za kwa mulaho kwani ze ne ezahalile ona cwalo, ku mi bulelala ona cwalo kusina kumbwinja se muli sona kacenu, ni se mukaba sona ku ze taha. Zeo isali ka mulyani o takula wa Jesu Kreste, Yakona kunga muezalibi ni ku mu takulela sibi hakena mwahali Mwani, mi kipeto uyema fapila Kubateni kwa Mulimu.

<sup>424</sup> “Mi ha muina ku Na, ni Manzwi a Ka aina ku mina; mwakona kukupa se mu lakaza, si ka ezahala. Ya lumela ku Na, misebezi ye Ni eza uka ieza ni yena.”

<sup>425</sup> “Mu Ni nyaza cwani? Oh, kana milao ya mina haisika bulela kuli bona be Linzwi la Mulimu nelitile ku bona, ili bapolofita, kana ne mu sa ba bizi ‘balimu’? Mi cwale mukona cwani ku Ni nyaza ha Ni bulela kuli Ni Mwana Mulimu?” Ba palelwa ku si bona. Ba palelwa ku si bona.

<sup>426</sup> Cwale, Keleke, mwa Mañusa atatama, kuzwa busihu bo kuya kwapili, musike mwa palelwa ku si bona. Mwabona? Mubone lizazi le lu pila ku lona. Mi, muhupule, Mali a Jesu Kreste azwisa sibi ku mina, kuli mane halisaliyo mwa kupuzo ya Mulimu, nihanyinyani. A takula sitampatampa kaufela.

Sibi ne si siile sitampatampa se si fubelu,  
Yena asi tapisa busweu twaa sina litwa.

Mi fapila Lubona,  
Ni yema ku Yena nili ya petehile.

<sup>427</sup> Oh, mawi, Ni kona kuba cwani ya petehile? Nikona kuba cwani ya petehile? Kakuli Mali; ha ki na, kono Mali ani ayema mwahala Mulimu ni na. Na A amuhela. Mi U abeile...Na ni muezalibi, kono yena ki Mulimu. Kono bupilo bwa mali buyemi mwahala ka, ili pulao ya sibi, kacwalo Mulimu uni bona kuba yomusweu sina—sina mezi ali mwa—ali mwa mulyani o takula. Sibi sa ka si felile. Mane ha si koni kufita ku Yena, kakuli kuna ni Sitabelo se siliteni fani.

<sup>428</sup> Ikai tumelo ya luna kuli ilumele Linzwi la Mulimu leli bunolo? Ona sa bulezi fela Mulimu, mu Munge ka Linzwi la Hae. Mulimu uipatanga Iliyena mwa bunolo, mwa sikwata se nyinyani se si ikokobelize, kono leliñwi la mazazi aa Uka ipatulula Iliyena sina mwabile Aeezeza mwa mazazi a kwa mulaho. Kana mwa Mu lata? [Kopano ili, “Amen.”—Mu.]

Na Mu lata, Na Mu lata  
Kakuli Uni latile pili  
Ni kuleka puluso yaka  
Fa kota ya Kalvari.

<sup>429</sup> Mwa Mu lata? [Kopano ili, “Amen.”—Mu.] Mawi, Kana Ha ki yomunde? [“Amen.”] Na kolwa Ni kusepa kuli Liñusa lika tisa se Li lomezwi kueza, kuli Li ka mi isa mwa sibaka se musike kutalimela fa lika ze tabisa fela meto. Kamba zeñwi...Hamu

bona Mulimu mwa butuna, mutualime ka buishuwi mo libezi lika, mi kipeto muka bona Mulimu. Musike mwa Mu bata . . .

<sup>430</sup> Fani Elisha hana kutezi mwa liñope lani, musi wa tushana, mali, mishika, mamonyi; mi, mwabona, yona mifuta ye ya maikuto yelubile ni yona, mali kwa lipata mi ni mwa mazoho, ni maikuto ni lika zeñwi kaufela. Ne li si ka nyanganyisa mupolofita yani. Na inzi ona cwalo sibaka luli kufitela autwa Linzwi lelisisani le libunolo, (neli sikamañi Sani?) kona Linzwi, kona aikwahela kwa pata ni kuzwela kwande. Mwabona, sani neli Sona.

<sup>431</sup> Hupula, mulikani, usike wa bata lika zetuna, tuna . . . Mu li, "Mulimu, U bulelanga hahulu ka butuna, lika zetuna. Kuka taha nako haku kaba *se, sani*, kamba *sesiñwi*, lika zetuna luli." Ni sepa mwa lemuha ze Ni ambola. Mwabona? "Zetuna, lika zetuna, mwabona! Mi, oh, foo se ha si ka ezahala, sikaba se si tuna, se situna sina *cwana*."

<sup>432</sup> Mi hasikaba se si ishuwile hahulu, kufitela mu mbwinja taba kaufela, muzwelepili fela ona cwalo. Mwabona? Mi muka talima kwa mulaho ni kubulela kuli, "Kihande, sani ne si si ka ezahala . . ." Mwabona, si mi fitile fahalimwa toho, mi kanti mwa li kuba mu Si bone. Ne si fitelezi fela. Mwabona, ki lika ze bunolo hahulu. Mwabona? Mulimu upila mwa bunolo, mwabona, kuli aiponahaze Iliyena mwa butuna. Ki sikamañi se si Mu eza butuna? Kakuli Wakona ku ikusufaza Iliyena.

<sup>433</sup> Muuna yomutuna, ya mata hakoni kuikusufaza iliyena; una ni kuba muika wa tuto. Mwabona? Kono ha ki yomutuna mane. Ha ba yomutuna hahulu, kona kuli uba yomunyinyani sina *cwana*, mwa bona, wakona kuikokobeza iliyena.

<sup>434</sup> Sina muhalalehi wa kale kwani kwa Chicago hana ize, "Mutangana yani ananuha, ni tuto ya hae kaufela ni lika zeñwi." Ali, "Na tile fafasi, inza lila, toho yali kuinamela fafasi. Ha zwela fande, ali ya swabile." Mi ali, "Kambe na kambami sina mwa na shetumukela, na ka shetumuka sina mwa na kambamela." Kihande, yeo ki niti. Mwabona?

<sup>435</sup> Ikokobeze ili wena. Ube fela ya ikokobelize. Usike wa lika kuba lingwangwa. Fela—fela ulate Jesu. Mwabona? Uli, "Mulena, haiba kuna ni nyoko kaufela mwa pilu yaka, haiba kuna ni bumaswe kaufela, Ndate, Hani lati kuba cwalo. U li zuse mwateni. Hani lati kuba cwalo. Oh, Ni bata kuba mwa palo ni alimuñwi wa bona, mwa Lizazi lani, Mulena. Mi ni bona kuli Lizazi lani li sutelezi."

<sup>436</sup> Mwa bona Maswayo ani akala, haiba Mulimu uka Akwalula ku luna. Muhupule, Yena fela anosi ki yena yakona kueza seo. Lu itingile ku Yena. Mulimu ami fuyole.

<sup>437</sup> Mi cwale Ni sepa mulisana wa luna ukaba ni linzwi ni mina, la kubulela; kamba kuli abulele, nitaluse, ku—ku mina, lusika kopana kale musihali woo. Mi Ni nahana kuli sebelezo ika . . .

Sebelezo ya lipina ki ka sikisi seti, mulisana? Mi ki . . . [Muzwale Neville uli, “Ikala ka sikisi seti.”—Mu.] Sikisi seti. Mi ki . . . [“Minyako ika kwaluha ka sikisi.”] Minyako ika kwaluha ka sikisi. Sebelezo ya lipina ika kalisa ka sikisi seti.

<sup>438</sup> Mi haiba Mulena alata, Ni ka kutaza, busihu bo, fa tuto ya Buka ya Maswayo Asupa. Mi kasamulaho, la Mubulo busihu, mupahami wa pelesa yesweu. La Bubeli busihu . . . Mupahami wa pelesa yensu, la Bulalu busihu. Pelesa ye seta ye situhu, pelesa ye seta. Mi ni mupahami wa pelesa ye fubelu. Mi kona lukaya ku ya busilezi . . . ya bune, ya buketalizoho, ya busilezi, mi ni la Sunda busihu. La Sunda kakusasana, mwendi ikaba sebelezo ya kufoliswa. Hani zibi.

<sup>439</sup> Cwale muhupule, lu ipile ku Mulena, luna bañi hamoho ni keleke, kwa sebelezo ya Mulimu. Mulimu ami fuyole.

<sup>440</sup> Ni—Ni liyehile ka hola mutumbi. Kana mwa ni swalela? [Kopano ili, “Amen.”—Mu.] Ha—Hani, mwabona, Hani tabelangi kueza cwalo. Kono, mwabona, Ni—Ni kaba fela ni mina yona biki ye, mi Ni ka mi siya hape. Mi Hani zibi ko Ni ka ya; ona ko Aka ni isa fela. Mi Ni bata kubeya muzuzu kaufela o Ni kona, kakuli Ni bata kuyo pila Kuyakuile ni mina. Mulimu ami fuyole.

Cwale, Muzwale Neville.



*MULIMU UIPATA ILIYENA MWA BUNYINYANI,  
NI KUIPATULULA ILIYENA MWA MUKWA OSWANA LOZ63-0317M*  
(God Hiding Himself In Simplicity, Then Revealing Himself In The Same)

MUKOLOKO WA SINULO YA MASWAYO ASUPA

Liñusa le ka Muzwale William Marrion Branham ne li kutilizwe lwa pili mwa Sikuwa la Sunda kakusasana, Liatamanyi 17, 1963, ili fa Branham Tabernacle mwa Jeffersonville, Indiana, U.S.A. liingilwe kuzwa fa tepu ya magesi ya manzwi kusina ku zusa sika mwateni ku ya Sikuwa. Toloko ye ya mwa Silozi i hatisizwe ni kuhasanyiwa ki ba Voice Of God Recordings.

LOZI

©2019 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitusiswe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangelí ya Jesu Kreste. Buka ye hailekiswi, kuatiswa mwa buńata, ku nepelwa fa moyá wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleńi ku sina tumelelano niba Voice Of God Recordings®.

Ka litaba zeńata kamba ka libuka zeńwi ze liteni, shangwe muńolele kwa:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)